



救偏瑣言

益壽堂

浩兄贈存

九年仲秋念日於下行



3 1772 9948 8

MG  
R22.21

救偏瑣言印刷小引

警思岐黃之術。其理至微。其法至奧。非有因時制宜之思想。不能著手而成。即如以先賢之方。醫今時之症。往往有不驗者何也。蓋因時代不同故耳。溯查黃帝定甲子。乃自下元始。上中下三元甲子。氣候各異。人稟氣候而生。其氣體亦隨甲子為轉移。若以上元之方。治下元之症。自多柄鑿。今人普通智識。每以先賢著書。奉為圭臬。致多膠柱之失。要知時代不同。即宜變而通之。方能奏效也。學貴乎因時制宜。今鄙人室伯康之子晉風岐之孫先後同患痘症。俱為重險。素知畢俊峯先生為醫痘之和緩。延請診治。其論症擬方。悉中竅要。竟能出險入安。因與討論痘科。據云。痘科各書。惟費氏救偏瑣言。最可取法。余治痘四十餘年。純宗此書大旨。無不應手而愈。惜板片零落。書亦寥寥。恐將湮沒矣。於是借俊峯之書一讀。始知著書。係在明末清初。正值上元時代。彼方今用。自能奇驗。至論痘毒原理。尤為精詳。自孩體先天。以及發痘。無不一一備載。此書若儲於家庭。使子孫能明其理。於血統關係。可

救偏瑣言

引

北京共和印刷局代印

保永安。若公諸社會。可爲研究是科之方針。豈不兩有裨益。鄙人等。是以邀集至契。捐資排印百部。並請俊峯先生作釋疑論一篇。一併附印敬送同志諸公。以爲參考之一助耳。並將助資諸公登列於後。

增旭谷

械仲芄

聯厚山

谷福亭

姚倬雲

康夢岩

李玉書

錫虞臣

于仰彭

有碩臣

敬元甫

侯德甫

佟瑞堂

以上各助資五元

發起人

張伯康

同識

關鳳岐

捐資十元

捐資二十五元

費德封先生傳

先生諱啟泰字建中德封其別號也系出江夏遠祖曰汎爲漢梁相居于茗生子鳳爲棠邑令父子相繼爲廉吏累傳至雄字爲亭中元延祐進士仕淮海道再傳至贈君恭字節庵有才名聲著鑠院生子傑字核齋于明正德中起家縣令卓異召對累遷經筵侍從爲冢卿晉階一品尊賓師賜蟒玉貤封奕然一時子龍字懷核嘉靖間兩中副車爲大司空劉清惠愛珥高節有外父風子道元字養恒承廕爲都督府參軍著按易心鏡錄行世生二子先生其次也少具逸才習舉子業試輒冠軍前刺史及鄉先達無不引爲後勁同學之士取資于先生者皆破壁去而先生獨奮于遇不以淪落少損益自勉勵穿穴經傳期于言規行矩篇厚風流以綿先世之澤旣壯名益熾然清白之裔家愈中落因自嘆曰人不得爲良相卽爲良醫自素問而下無不窮極精奧凡陰陽消長氣運剝復洞然于中一遇危証如對大敵必出全力以勝之獨行其是而不疑力排衆議而不顧所活何啻千萬人

前此官于斯者如陳繡谷馬還初劉魯庵胡霞丹官方山張淑之何鐵岸龔震西劉爾符皆傾心推服樂與之交先生落落自如絕不作曳裾態及里人某以事繫獄幾無生理先生憐其母老子幼力請釋之不令其家人知也此與少年時還行道遺金同一轍矣生平不苟訾不苟笑不苟臧否人物深自降抑雖販豎必與鈞禮雖造次必無雜言終夜篝燈達曙唯以著述爲事約三十餘年規成救偏瑣言一集前輩韓太史求仲潘中丞昭度姚侍御世所方中丞歐陽皆爲之叙而逡巡不出至己亥歲乃傳播域中凡天地偏駁不平之氣人事偏執不平之見皆以是書救之其書理微而顯旨該而約懷奇古茂淹綜經史不屑拾時唾餘讀者當自知也聞尙著有續集名曰一見能醫其苦心慧業定足爲濟世津梁宜其精誠所格鬼神通之求醫于懸筆者每大書曰此病非費某不治斯亦奇矣及年八十志益不衰手持一參同契與人言輒置不倦是時太守吳蘭次重舉逸老社于峴山先生同吳訥如沈方平方歐餘諸達尊時婆婆其上如是者又六七年乃卒生

五子英度驥且復駟負俊才弱冠補博士弟子惜與驥蚤逝度以諸生克振其家世英且復俱有乃父風諸孫七八輩卓越偉器而廷召廷徵尤蜚聲藝苑隆隆蔚起德封其有後乎費編修之達余首拔士也嘗爲余言先生乃其諸父行因僕指而述其行事真古君子也聞德封之風者可以興矣

史氏曰吳興山水清遠名公鉅卿接踵林立邦之人若固有之獨一德封輒交口頌述不置何歟費之先長房仙于漢孝先仙于宋今德封之名蚤爲閭苑所惟重仙乎仙乎余于德封亦云

賜進士及第通議大夫

日講官起居注詹事府詹事兼翰林院侍讀學士加禮部侍郎年家眷弟華亭沈荃頓首拜撰

救偏瑣言小叙

嘗思道無名象虛寂無爲感而即應妙用無窮不可得而思議不獨大道爲然醫

之爲道上關運氣下切痼瘵而寄生命誰曰小道能不靈變乎哉至痘之一症有常有變吉凶反覆生死尤限於日期一不洞徹而失圓轉可生之痘陷於不起詎以泥文執象克任斯道乎論痘自放點以至落痂賴氣血制化其毒而終始其功以故前人執此而按期定法據症立方雖有不齊大都以扶元爲重治毒爲輕防危慮患咸以虛脫爲虞常道其宜爾也抑知痘犯元梟烈毒猶夫火宅不第制化有所不受連氣亦爲毒氣血亦爲毒血矣視變爲常而反倒置有不速其斃耶况時有變遷痘多變局試閱今之敗於虛者几上殘花斃於毒者大林秋葉也虛與毒之辨似是者居多此非成見所能別亦非聰明所能定也能以四大機關一深求而參合之痘之不等於前今之斃類於毒可坐而照矣令痘悉斃於虛其於充實之體當不登於幽錄迺有痘未及漿而便是慘者何也其於薄弱之軀自不留於塵世迺有漿不煩助而得有以稱慶者又何也衡其毒迫於虛何得以虛而忽其毒毒之所在命懸頃刻亦奚暇論小而襁褓大而早婚與值病後哉挈其

當務之急得靖殺身之毒斯見大智余蓋歷來治驗筆難廣記信不誣也妙在參其毒耳如篇中所載種種惡形惡色與夫症狀之猖狂神情之擾亂其與氣虛者固已遠隔參商更異夫內蘊不拔之毒見症若虛深潛燎原之火見症若寒較之暴厲而發揚者險惡尤爲莫測恒多並形也而色獨異並色也而形不侔並見症也而所致不同並日期也而規則難施細合端詳無非烈毒肆虐尙有首尾一轍法非不勁末路尙有餘氛舍順與逆之外凡費推敲者往昔容有今殆罔不其然是痘雖與逆鄰未得遽與逆視而卒流於逆者非初昧於不知即擯於不治有計挽回且前且却而存畏縮比比皆然以此惡局偏峰俾不終害於偏非得偏以偏救何能以救其偏妄作所以是名也譬之冬衣裘夏衫葛寒煖使然也濟大旱必需霖雨治洪水自宜排決事理當然也行其無事而已由來治病易明理難理明一任症之縱橫變態不爲似是所眩不爲規則所畫不致誤於曲謹亦不受愆於已甚隨在皆宜頭頭是道矣余少業儒不獲一售既思以庸才縱得倖進於世何

補檢家藏醫籍及諸家痘疹潛心三載草草應事留心於茲前人不我欺也殆自甲子更始於古法所必然者漸覺不當所必禁者漸覺相宜然猶不敢自信竊見泥古而執成規者不第崇補助陽致輕變重重變逆即知其痘屬血熱急來緩應同歸於盡可勝道哉儘有本宜涼解亦不害於參芪者幸其內無隱伏外不甚暴偶合於從治法非正治當然也却舍易而求難矣余雖不敢貿焉從事究所以然之故而不得則當然者終難自信謂其先天耶何以今昔乃爾謂其歲氣耶何以歷年無改苦心參究於枕畔閒以思民病固因六氣而轉六氣之運本陰陽太乙而分時行物生寒暑代謝陰陽在歲位也總持歲紀充積其數陰陽有大運也必甲子一週而一氣之大成始伏將來乃進自不規規於歲位而得滿充積之數者是則民病之改易其應大運可知蓋大可以覆小小難以該大萬化皆然大運於陰陰中亦自有陽是陰爲大而陽爲小矣大運於陽陽中亦自有陰是陽爲大而陰爲小矣逐年歲氣大運之散殊也計歲位而紛更者不明運氣之大局也執一

局而不移者更令造物無陰陽化工無運氣矣是大造不分而分不定定謂無定準也而却有恒恒則貞於久而有以見其運之大謂有定準也而又代巡巡則無定局而有以見其大而運以證往昔痘多虛寒大運在寒水也今多烈毒大運在相火也相火之爲令最厲民病多暴邪陽烈火亢極似水惟此運爲然甚則客忤中惡人強力勇者藥餌有不及待往往迭見痘值其運無惑乎血熱更多惡暴矣閒有氣虛陽中之陰終非昔之虛寒並例往昔寧無血熱陰中之陽終非今之烈毒等象乃知痘之不同出自陰陽而陽在相火更見獨異無論與濕土寒水陰陽殊絕卽如風木木爲火母風且動焉非純陽之自乎雖火令有待而陽局基之是將乘未乘之象也如燥金金屬秋陽燥因火至非純陽之後乎雖盛餘必謝而火局猶存是將除未除之象也二氣不得與亢陽比擬猶謂其陰陽之界耳乃若君火旺於夏而象離敷榮暢茂物皆賴焉火故名君純陽得令之象若過而及熾不幾與亢陽無別然君火雖熾水一制而正令卽可復也相火獨異焉者太虛之邪

陽不藉木生不受水制五行常道不能閑其局者應痘烈毒如斯令不禦之於格外垂斃何挽歷考方書惟仲陽清解獨勝究其功用適宜君火之時局僅治毒火之常全書暨金鏡錄補瀉兼施其所調劑偶中陰陽之合令尤爲蹈常之法諸方得肯綮者亦間有之皆備一時之急至法能禦變不忽於始不懈於終而輟旋造化良法未之見也惟玉髓篇開示奇形怪痘責人不識夫亦當年時值其運而有是痘則是痘以前寧無是運是運常轉法不及見據能開示者法亦似乎能備惜知及而力未充尙非勁敵若夫陳魏兩家魏主溫補保元陳主燥實固本一切視以爲末意曩時運必寒水濕土痘合當然法故得以如是令遇君火險必變逆一櫻相火誠利刃矣諸家治法陳列於前凡有可宗便有當戒惟在取裁者何如耳何有一薛氏尤取燥實更善述其所著將爲世則徒知痘之一局不知局以時換知道之一端不知道有全體若此迷途類推古來元梟烈毒見有可畏便真正不敵邪不衡勢之孰緩孰急惟務養正之說矣能知道無定體而想圓轉之法其識

自寡安望識力並到者乎致令可生之痘反促其斃不責於虛便咎於逆冤慘及今而無已也是道不在求合運氣總以四大機關一一深求而參合之迪知病真之所在便覺運氣之所致不求合而自冥合得其時措之宜操縱惟我人見爲異我得其常亦何偏之足云神理不踰常道惟在會心者得之余之妄作恐在暗中摸索第與東行而西向者即如石如杯并不得而名狀矣故不以狂瞽自分而冒妄作不以瑣言爲贅而蹈數窮良以學至化境并無可言魚兔若未入手筌蹄在所必藉昔節菴陶君著傷寒瑣言諄諄而不憚煩其殆先得我心之所同然者乎妄作粗成諸親友謬爲鑒賞遽爲叟授梓余殊愨然後適因兵火中阻得少加參考今殘年紀七料難精進勉力竣事祈大方誨我

嘗

順治己亥菊月吳興七十老人費啟泰建中氏自序於惠迪堂

自題瑣言小引

譬雖小道亦道中之一事究其綱領條目經常變化與大道無兩樞軸也然大道無名言爲糟粕所以至教無言言亦引而不發矧一事中之管見而更瑣焉瑣則贅矣贅不令人厭乎第此道關人生死而且日期有限不反覆致詳而簡畧從事虞同志者經目而未必經心過而不入容有之矣昔節菴陶君有傷寒瑣言諄諄而不憚煩其殆先得我心之所同然者乎步武未能效察可愧耳

# 救偏瑣言釋疑論

夫痘之一症，有常有變，常者順次收功，變者瞬息可慮。治痘之書，錢仲陽則主清涼，陳文中則主溫補，痘之熱燥者，清涼固宜，而寒濕者，辛溫亦是。又王節齋論，以陳文中木香異功等方，乃一偏之術，若遇痘瘡淡白，泄瀉腹脹，屢寒者，宜之。若遇勇盛稠密紅紫，大便燥結，屬熱毒者，非清毒涼血不救。自陳文中方法盛行，每遇熱毒者，悉不救，誠哉是言也。所論深獲我心，惟清初吳興費建中先生，迺治痘專家，膽識俱優，著有救偏瑣言一書，遵古不泥，折衷至當，其以治驗之方，積而成秩。所治痘症，大半近於險逆，故重清毒，然而補托者，間亦有之。其立論，以氣受毒制，不能領毒外出，血受毒制，不能載毒外透，氣血領載之能力既失，不敗而何。是以專主逐毒，毒去而氣血之力自伸，理論正當，誠爲痘科之準繩。雖臨症指南、鄭氏註解，以及瘟病條辨，均有譏刺此書之語，是譏刺者，均未領會其法之奧妙，不過紙上空談而已。余所以信而不疑者，在同治光緒年間，痘症頗多，卽宗費氏遺法。

屢治屢驗。保其生命者。奚止數百計。大凡痘症。脉微肢冷。不渴不燥。痘色灰白。錫皮皺濕。神情懶怯。吐瀉不燒。氣微等像。宜用保元湯。異功散。兼飲以嫩雞湯。燕窩粥。以培元氣。若遇紫滯干紅。身燒燥渴。形如茱萸之扁。皮板頂凹。須投歸宗湯。必勝湯。以鬆肌清血爲要。如遇元梟烈毒。身燒如烙。氣噴似火。謔語咬牙。穢氣舌膩等症。非急用費氏清毒之法莫救。甚願吾同道諸君子。詳參此書。臨症必有效果。勿爲臨症指南。瘟病條辨。及陳修園所論。治痘不外溫補等語所惑也。余友寶伯康諸君。素知余宗此書有驗。捐資排印多本。施送以備參考。囑余解釋斯書奧妙。是以畧陳大意。敬望吾同道諸君注意耳。丁巳孟夏北平畢崇禧俊峰氏謹識。時年七十有一。

救偏瑣言目錄

卷之一

救偏總論

論氣

原痘論

論血

卷之二

治痘運掌賦

推廣規則錄

治痘須知大運論 附治驗

論治痘權宜 附治驗

治痘藥性摘要賦

卷之三

發熱論 附治驗

升發論 附治驗

疏表 附治驗

達裏 附治驗

痘有首尾疏達訣 附治驗

痘有不宜疏達訣 附治驗

卷之四

放點痘治準

稀有內症 附一忽視之戒并治驗

密有充肥 附治驗

陷有毒滯 附治驗

綻有囊薄 附治驗

薄有浮表 附治驗

平扁與不鬆辨 附治驗

氣拘與毒絆辨

嬌紅非血熱辨 附治驗

血鬱非氣虛辨 附治驗

卷之五

起脹症治準

攻毒總訣

申明毒火深藏等症 自鼻竅至蚤疥紀廿有七各有治驗附後

卷之六

申明貫珠攢簇怪痘

圖狀怪痘惡形 紀十有七種下詳治法各附治驗

圖狀怪痘惡象 紀十有八種下詳治法各附治驗

申明惡色並治法 附治驗有五

申明四毒頁 各有治驗

申明痘白雄標 附治驗

申明泡湧 附治驗

申明痘佳症惡 附

申明飛漿 附治驗

卷之七

涼血撮要訣

清火症治準

涼血清火不拘首尾論 附治驗

分別毒火論

卷之八

論行漿

清火窮源論 下有詳明五條

論補氣

論補血

論健胃 附治驗

論血虛咬牙 附治驗

論氣虛作痒 附治驗

卷之九

論痘變症有不常不古

痘症變幻總論

論血熱作痒

論熱毒下利 附治驗

論火擾不寐

論汗有補瀉 附治驗

卷之十

論實表

論安神 附治驗

論氣虛寒戰 附治驗

論脾虛作瀉 附治驗

論火毒咬牙

論熱劇寒戰 附治驗

論胃熱不食

論渴有虛實 附一處渴治驗

論結痂 附治驗

論落壓

論餘毒 附一氣血兩虛治驗 血熱不養娠婦痘 附一失治一戒并附治驗

痘後調護宜謹

痘前諸瘡宜急治 附三治驗 附誤治之戒 附失治之戒

論大黃 論石膏

論豬尾血 論濁陰

瑣言備用良方

清肌透毒湯 直達透肌散

溫肌透毒散 寬中透毒散

疏肝透毒散 清熱解毒湯

調中湯 涼血攻毒飲

鬆肌通聖散 清涼攻毒飲 即瀉黃散

清暑透毒湯

必勝湯

清金攻毒飲

消癰快毒湯

錢氏百祥丸

散結湯

寶氣飲

滌邪救苦湯

豬尾膏

蟻針法

平順清解飲

賽金化毒散

疏邪實表湯

既濟湯

涼膈攻毒飲

窮源透毒散

神應奪命丹

養榮附氣湯

潛榮散

萬兩黃金散

一名無價散 一名四聖散

養榮透毒湯

散火鬆毒飲

托裏無憂散

保元八珍湯

回陽反本湯

實脾固本湯

納穀散

哺黃納穀散

補液湯

清金解渴湯

安神散

清宵忘晝飲

硃砂六一散

金蓋散

滑肌散

水楊湯

保元回漿散

活絡透毒飲

忍冬解毒湯

撥雲散

消疔解毒散

加味內托十宣散

回漿合宜散

溫紛撲肌散

百花膏

快肌膏

牛黃八寶丹

奏凱和解飲

參歸化毒湯

雙仙化毒膏

和脾宣化飲


救偏瑣言卷之一

吳興費啟泰建中父著 男

救偏總論

太極判而天地分。天地位而萬物育。生生化化不外於陰陽相濟。而成時行物生之令。一有偏勝。雨暘便不能時若。四時便不能順叙。而萬物俱為病矣。妙於調變者。是在於太過則洩之不及則補之。偏以偏救。而後可以救大造之偏。人肖大地亦猶是焉。元氣即天地之陽。五液即天地之陰。有是陽則一身之生長有源。有是陰則一身之滋養有本。是陽之為陽。非陰不成。陰之為陰。非陽不就。猶天地之生化。宜相濟而不宜偏勝者也。否則陽勝則陰虧。虧久則竭。竭則陽亦隨之矣。陰勝則陽衰。衰久則脫。脫則陰亦繼之矣。所謂氣和則物生。氣偏則物病。氣絕則物死。理固然也。妙於藥其偏。而還歸於無過不及者。是在醫之衡量耳。矧痘之一症與

度文起  
英孟育金訂  
且復曙遠



他症不同。一有偏勝。生死捷於反掌。尤非他症之可緩也。蓋痘有順逆。險三項。順與逆。無藉於醫矣。至險之一症。亦自有三項焉。有險中之順。險中之險。險中之逆。險之順者。痘原平易。治者。何用過求。按日數而循規則。痘自依期而起。依期而脹。貫漿結痂。亦順叙而功成矣。若過求之反失中和之的。若險之險者。症必偏陷。非氣血虧於不足。即毒火盛於有餘。若規規焉。峻補虞其太實。重瀉虞其虛。至第酌之於輕重之間。聽浮沉於其際。何籍乎醫之有哉。至險而逆者。症已偏陷。而勢又猖獗。虛幾不及補。毒幾無可清。所爭在於一線。而固不容髮。其機不容少待。猶之入虎穴而取虎子。若存畏縮。何能挽造化於人工也。然所謂補救其偏者。亦甚難矣。識見不真。先迷向往之路。膽力不雄。同歸廢弛之地。理障未捐。難神變化之用。是必膽與識俱。心隨理運者。而後可以語此。夫識見何以難真也。有如白者。辨其爲虛而抑知有血鬱之白。紅者。辨其爲熱。而抑知有嬌艷之紅。密者爲凶。得充肥而何妨於密。稀者爲吉。有內症而何貴於稀。頂喜其綻。痘不蒼而縱歸何用。陷則

爲虛色。若滯而陷。豈緣虛致皮薄者。慮其漿清。有浮衣而非真薄。漿黃者。慶其蒼老。有板黃而非真蒼。毒滯不鬆。誤認以爲平扁。根窠毒紆。錯羨以爲能拘。以膿成便爲無恙。以痲落即快收功。此由識見之不真。形色之莫辨。一也。作痒者。補之於氣。咬牙者。養之於血。寒戰者。助陽。咽乾者。補液。補中健胃。施於食之不思。定志安神。行於夜之不寐。汗多則實表而虛亡陽。解頻則固脾而虞氣洩。夫固用藥之常法。業是者所習熟也。殊不知症有似是而非。僅是毫釐之謬。誤認以非爲是。殆至千里之差。每見養血而牙仍齩。助陽而戰適增。開胃而食愈不思。安神而躁愈甚。斂汗止瀉。俱屬抱薪而救火。定痒生津。猶之助桀而爲虐。病自炳於星日。昧者竟。是朦朧此識見之不明。致施治之差訛二也。膽力何以貴雄也。偏僻之性。固所最忌。設有補不宜重者。重而不覺。伐不必過者。過而不知。此蓋偏之爲害。而誤不淺也。若見爲車薪之燄。而僅以杯水之救。見若江河之潰。而將撮土之防。可乎不可乎。惜焉任事。病在鹵莽。不若曲謹之爲愈。趨向既真。而當機畏縮。何如必至之有。

成也。病故有舉手而應心者。有事半而功倍者。有竭其心思。盡其藥力而始奏效者。蓋病有淺深。功自有難易。若概期於速效。藥餌未半。更端遂起。是何異廬山一竇。棄井九仞也哉。此膽力之未雄。卒廢於半途者三也。理障何以難捐也。凡人出於臆度者。猶存疑畏。自見爲理者。居之而不疑。蓋理本無障。執之卽爲障。略舉一二言之。如放標時而升發者。理也。執升發於放標時者。障也。清解於起脹候者。理也。執清解於起脹候者。障也。補拓於貫漿之際。收斂於結痲之時者。理也。若執於是期必拓。是期必收者。皆理之障也。痘有變遷日期難執。嘗有痘雖初放。均不在於升發時。雖起脹。寧必事乎清涼。寓補於瀉。何嫌於貫漿而解利。用散爲收。何病於結痲而疏發。入門之始而不循規則。是無階梯。臨症之時。而必拘繩墨。何以司命。往往株守者。終身迷而不悟。此繇理障之不清。至臨症之多乖四也。前人處方立論。有就症而論症者。有因時而制宜者。有矯前人之僻。而言下不無過激者。有慮後人放佚。而立論不無拘檢者。亦有喜行溫補。凡症歸於虛論者。有樂於清解。

凡症歸於熱治者。總之一隅之見。不可徇言。卒之迹不可泥。如泥於言。卒。即如春夏爲順。秋冬爲逆之說。而拘之。則春夏無不起之痘。秋冬無生全之症矣。有是理乎。如局於一隅。宗文中必致害於血熱。信仲陽必致損於氣虛。守魏氏而概用溫補者。未有不致誤實實。而夭折生命者也。貴在因其法而窮其理。彙其紛而歸於一。是謂得之。至臨症當機。其著見明顯者。迎眸自照。不必猜疑。其隱伏莫測者。多似是而非。當必細察其形。詳驗其色。形色未燭。復於神情而繹之。容有可疑。更於內症而參之。則庶乎似虛寒而反實熱者。難逃。似有餘而反不足者。莫掩。似平易而實危困者。何度。似必斃而實有可生者。自在調之得當。扶元見化毒之工。施之不合。即爲伐性之斧。治之得宜。蕩滌即保護之丹。用之不當。即爲腐腸之藥。首尾徇。却與中和而適合。小心曲謹。適與敗謀而同事。苟非膽與識俱。從心所欲者。何可以語此。

### 原痘論

痘一胎毒耳。名之曰痘。取象形之義也。有謂天瘡者。以先天所種。非後來之毒也。然所謂先者。非懷娠時母感。七情六慾。幸熱燻炙之毒。當二五妙合。精行血就時。當下之毒也。何也。孩體以精血而成。精血以情慾而媾。有是身。則有是毒矣。精血爲成身之本。情慾在會合之先。先孰最焉。同一情慾。而痘有順險逆之分。何也。精血厚而情慾淡。更得性恬味薄者。合天地化生之理。得陰陽和合之宜。其稟旺。其毒輕。痘瘡自順。有血旺而精薄。有精強而血虛。或偶爲七情所擾。或適爲辛熱燻炙所乘。至交媾時。或男淡而女熾。或女淡而男濃。是精血不能無病矣。其痘自險。至若積爲七情所擾。或嗜厚味無厭。或久服興陽壯火之藥。皆足以致火。治髓淪肌。更兼男女俱熾。樂及於縱。卽精血極旺。而精乃毒精。血爲毒血矣。以毒精毒血而成此孕。其能保痘之不逆乎。又有欲洩而強閉。以貪歡會。此又逆之最速。不終日而可斃。是謂悶痘。此順險逆之由分也。究其出也是痘。未出時。果屬何象。出則布於周身。未出時。着於何地。古來列說紛紛。皆是捕風捉影。不知人身百骸未生。

元始之初先結右腎。謂之命門。以其爲受命之門也。其毒如一小櫻桃。即結於此臟。如膽之繫於肝者然。內所包孕者僅氣而已。順者其氣清。險者其氣濁。逆者其氣黑。毒惟有囊包孕。故未有感觸。藏之若無。一洩而吉凶便判。可見稀症之方。理之所無。藥即刀圭。亦何從而稀之。若可以稀。則可以化之。使無矣。有一富翁。晚年得一子。訪此道於余。余以此理言之。弗聽。出得意之方。十餘以相質。據方有巧思。然雖無益。却亦無損者。余亦不之禁。彼一一如方而預圖之。及後出痘。最逆無倫。不及透點而斃。神奇不根於理。總屬虛誑。試問清與濁。濁與黑之呈見何如。清者其毒輕。感觸其竅。一任氣領血載。徐徐而出。出於蘊藏之地。漸而升於脾絡。猶太極。而分兩儀也。自脾而行於肝。勢猶寬緩。未之分布。猶兩儀而分四象也。次第而至於心肺上乘之地。而始分布於外。猶之四象變化。庶類自繁。熱故得以和緩。越三日而見標。漸漸而出。先於頭面。次及乎身。以至四體貫漿結痂。亦自上而下。所以謂心肺之痘爲上。氣濁者。其毒湧盛。遇有感觸。非若清者之從容緩布也。一出

本位燔熱燥渴。經於脾絡。一及乎肝。毒其莫禦。非領毒之氣受塞。即載毒之血被灼。所以熱不三日而即見。不暇論其形色各症。第驗筋抽脉惕之象。而症已非輕矣。所以肝經之痘爲險。有未及乎肝。而於脾即發者。勢尤猛烈。一出本位。毒便猖狂。熱及周時。痘卽一齊湧出。或見點而累日不起。氣血俱受其困。凡通臟腑。無不見其凶象。第驗其腹痛唇焦。其餘症自惡。此險中帶逆。濁而兼黑者。其象如斯。黑者一觸其竅。勢若砲烈。未及離乎本位。毒卽肆虐。并亦不容分布氣受其錮。血受其瘀。凡通腎臟之地。無不聽其攻擊。卽如腰如被杖。屈不能伸。已下其喪無日矣。要知五臟見症。皆出於腎。第腎爲稟受之地。諸臟爲分布之所。緩急關生死之界。緩一步。則毒輕一步。緩而至於心。緩至者也。肺則次之。故心肺爲順。肝則界於緩急之間。故爲險。至於脾則急矣。腎則急而更急。若迅雷之不及掩耳。故爲逆。然則腎痘之不救。以人力之不及施也。若謂腎不受毒。諸臟獨可以受毒乎。更有變黑歸腎之說。得毋以腎爲玄武。其色故黑耶。若是則赤當歸於心。青當歸于肝。黃當

歸于脾。白當歸於肺。赤與白白與黃痘固宜有之色。青獨非所忌乎。何獨慮腎而不及肝耶。總以血瘀則黑。血爲毒瘀其毒自不可解。豈有變黑歸腎之理乎。有因虛而不起者。必其兼毒盛者也。毒得其輕。雖虛何害。毒若猖狂。氣血成何用耶。

### 論氣

人身之氣。得太極之陽而神爲之主。輕清象天。源於太虛。本於剛健。無形而爲形。君無體而能體物。爲生命之根。合乾道焉。溯有生以前。孩體何肇。如萬物之資始。乾元也。既生以後。長養何從。如萬物之暢茂於陽和也。運行不息。無礙不達。如日之經天而行健也。情彩洋溢。潤乎一身。如天喬之敷榮于化日也。衛護于外。六淫不擾。如乾陽透地。而陰霾莫能晦其照也。充實于內。至老不衰。如悠久成物。而亘古莫能究其竟也。自孩而少。少而壯。壯而老。旋轉一身。周而復始。宛如一貞下起元。而太極之乾道也。至於塞天地。入水火。變化飛升。何莫非真氣之妙用乎。應乎痘瘡。氣得其正者。必透暢快。脹必如期。頂尖而脚圓。頭而先身而至。以見痘之非

氣弗領。升發於陽。而輕清上升之義明矣。包血成暈。不令脚散。磊落分明。不令細碎。雖密必成顆粒。以見氣之拘制其毒。而陽剛之義昭矣。放點明潤可觀。成漿肥黃悅目。收壓結癩。不乾不燥。以見氣之津液外旺。而證敷榮之象矣。紅而得白白。而得黃黃。而得老。以見氣之運行不息。成血之功。而合乾健之體矣。痘從無而至有。見點以至成痲。靡不成形于氣。以見氣之體物不宜之象矣。是氣得其正之局也。令毒火太盛。而氣爲毒壅。火太盛。而氣爲火蝕。氣本輕清。而屬陽也。爲毒火所虐。則不能上升。而痘必倒置。頂必不能尖綻。或平或陷。而反制于毒矣。不能蓄血定位。痘其稠密細碎。而界地不分矣。氣主乎神。神被火灼。色自不能光澤。或乾紅。或紫滯。連血亦爲不榮矣。氣主動盪。一爲桎梏。氣必不能化毒。或外剝。或內攻。而成熟無望矣。安冀其有終乎。氣若不足。則又餒而不振。雖無壅遏侵蝕之患。亦終虧拘領成熟之功。邪正不並立。正氣一虛。邪毒進步。變毒蜂起。其殆疾如反掌。故毒制于氣則吉。氣制于毒則凶。氣虛而不能馭毒。則從補。毒盛而虐陷乎氣。則當

攻。或補氣。或攻毒。總不令氣爲毒害。斯明乎太極之理。而治氣莫能出其右矣。

論血

人身之血。得太極之陰。重濁象地。稟輕清之氣。以成其體。而具資生。承剛健之氣。以厚其用。而主長養。有乘載之功。柔順之德。合坤道焉。當胎元包孕。孩體何成。如萬物之資。生於坤元也。自孩至長。長而至壯。如萬物之長。養于博厚也。得氣而生。得氣而旺。如土脉之賴于陽和也。隨氣運行。周流無滯。如陰柔之以順爲德也。灌溉五臟。榮養一身。旺于內。明足以察秋毫。心足以應萬事。當炎暑而不畏熱。旺于外。則筋強而力倍。髮潤而爪華。唇若桃舒。而面若杏吐。如天喬之敷榮于地道也。榮極則枯。旺極則衰。髮鬢頽而五色眩。精髓虧而天癸絕。類若草木之零落于冬土。而宛然一太極之坤元也。至于尸解蟬蛻。脫化而軀殼如生。何莫非真陰之妙境乎。應乎痘瘡初見一點紅。昭其爲痘。以見血之載毒而出。同於載物之功矣。紅而能潤。色得以呈乎外。以見血不自呈。而需輕清之氣明矣。紅而能白。白而能黃。

黃而能老。血得以化而成膿。以見血不自化而藉剛健之氣又明矣。歸附周圍得  
以圓淨。放白。眼鼻得以封塞。黃熟。周身得以脹滿。以見血隨氣運而象順德之無  
疆矣。痘本從無而有。點而遞至於成痂。以見痘之皆屬血體。而合乎資生之理  
矣。放點如粟。起脹如豆漿。黃如膿。以見痘之血體日繁。而合乎博厚之道矣。漿足  
漸收。成痂落靨。以見痘之收斂於陰。如冬令之解葉辭條。而歸根于土矣。是皆血  
之制毒而然也。令反爲毒制。而血失其正。血本爲榮而屬陰也。爲毒火所燦。痘自  
不能榮潤。輕則愀紅。而重則紫艷矣。血本運行而流通者也。爲梟毒壅闕。痘必血  
瘀。輕則椒皮紫黯。重則紫背浮萍黑如灑墨矣。血本賴以滋養者也。爲毒火逼迫。  
血必妄行而致失血之患矣。尙冀其載毒而出。放白成膿。收痂落靨之境哉。此係  
血被毒害。而非血之不足也。血若不足則白而不紅。氣縱有領毒之功。而血無載  
毒之力。以致有頂而無盤。氣足以包血。成圓血不能以附氣。成暈。以致空殼無漿。  
痘賴血體而成膿。毒賴膿成而毒解。膿乏其本。即毒得其旺。亦何能濟。

其缺陷哉。故血虛之症。必當養於平素。以補氣之功。易補血之功。難也。治血與治氣同參。斯妙于治血而明乎太極之陰者矣。

救偏瑣言卷之二

治痘運掌賦

病有表裏虛實。藥有補瀉溫涼。取症不可偏據。合外內與脈詳。表似虛兮。必合內而評論。症似實兮。更參脈以相商。理在窮源兮。須究其致。不必他求兮。豈可恃常。痘更變而莫測。非若他症可傍。有似虛兮。反實。有似熱兮。反涼。變症百出。千形萬狀。欲求變幻。先知三項。順若治而多事。逆若治而招謗。險能通變。治痘賢良。有如熱和緩兮。體潤神開爽兮。如常。淡紅其色兮。如杏蕊之舒露。尖綻其形兮。如笋芽之透狀。毒火輕淺。氣血兩旺。漸漸光壯兮。紅變爲白。氣尊血附兮。白變爲黃。膿成始於頭面。終於四體。次第不紊。珠結肇於人中。未及足脛。陰陽和暢。飲食加殮兮。二便調順。痲落滋潤兮。瘡色榮光。何用醫林之藥石。何須父母之驚慌。假令面顏

青慘兮。涎湧氣促。如畏刀鋸兮。兩目徬徨。腰膝曲而如折。青紫點如萍樣。手足撩亂兮。身無安放。啼聲不出兮。意甚慌張。灑墨兮。四體暨乎胸背。失血兮。口便合乎瘡瘍。腹脹如鼓兮。神情悶亂。額汗如淋兮。厥冷非常。此等逆中最速。悶痘即日能亡。更有立刻可斃。唇舌滿口如霜。設若輕與湯劑。反致毀於熱腸。

遍身蚤班蚊迹。藍癢焦紫如傷。一片兮。蛇皮蠶殼。成粒兮。水泡空囊。根堅硬兮。黯滯。頂嬌嫩兮。油光。面目掀腫兮。痘卒不起。四心泛白兮。面不行漿。額攢聚而如麻。額細碎而平脹。額下糊糝。託腮絲來不吉。顛頂盤聚覆釜。自古非祥。功將九仞兮。痰壅氣喘。時方發翊兮。咽啞水噎。目之有點兮。按之無粒而必敗。形雖磊落兮。根無盤助而堪慌。濃未成而泡湧。紫白同歸於盡。漿未行而痒沸。燥溼總屬悲傷。頂破乾赤兮。痘如剛去。頂破乾黑兮。凹似煤坑。地角數點乾黑兮。壓似內出而圈不斂。暨其鼻準若是兮。兩額平斂而及印堂。紅暈散漫而不附氣。離血散而乖張。徹夜無眠兮。漿後豈容如是。終日不食兮。痲後寧保無坊。漿不成痲兮。和皮粘去而

如剝。硬痂燥黑兮。嵌入紅暈而如鑲。頭搖身拱。足擲手揚。躁亂不寧。猶之發始熱。如炮熾更甚於曩。痛楚不堪兮。衣衾難動。身如捆綁兮。困苦着牀。拳唇鼓頰。尋衣摸裳。手足振戰而無措。欲言無語而皇皇。目開睛定兮。口吐涎沫。神情恍惚兮。身無主張。有本逆而不治。有失治而致戕。凡此同歸於逆。謾誇痘內岐黃。

要知何爲是險。閱時須要端詳。痘使稠蜜兮。色猶滋潤。色或乾滯兮。形還稀朗。即使蜜而兼滯兮。顆粒分明而綻突。其或平而兼陷兮。不至脚癩而空洋。崗貫珠而成形兮。餘痘尙得。充肥間堆聚而成象兮。諸痘猶能光壯。出之太遲兮。淹滯而神情不迫。出之太驟兮。毒湧而勢不猖狂。欲知其密兮。四五相連而擁簇。欲卜其稀兮。單見其形而老蒼。大熱得靜兮。毒隨熱出而無慮。微熱躁亂兮。毒與熱閉而宜防。發必期盡透。欲其暢。氣不充拓兮。歸附則厚。血不紅活兮。郭廓則壯。舌刺焦黑兮。痘不焦枯而莫慮。臉若塗硃兮。紅中泛頂而休慌。喉間乾噁兮。聲音能曉。空窻失血兮。不及目與瘡瘍。神若昏憤兮。非痰喘而莫棄。狂言譫語兮。非焦紫而能康。

唇腫裂而焦黑。腹絞痛而莫當。目下線紅。瞳毛若鎗。皮毛若刺兮。痛猶膚剝。叫喊不已兮。寢食俱亡。此等惡症。皆毒潛藏。痘若磊落。可異無殃。若夫腰如被杖兮。毒攻本位。遇發始而未可遽絕。頭如斧劈兮。毒參陽位。初見痘而還宜審量。作痒兮。禁止能定。搔破兮。流血流漿。泄瀉而痘瘡不變。有因利而痘反安康。體戰慄兮。神不昏。兩齒鬪兮。身安靜。痘使陷伏兮。囊窠未隱。精神困乏兮。飲食方強。

灰白而目未開。膿水薄而痒未作。身不成痂兮。有痘疤而莫慮。面痂乾薄兮。漸堆結而何傷。漿停燥實兮。空地復補而可喜。收靨黑薄兮。根窠得泛而無殃。痂乾絕無腥臭。須知餘毒尙伏。腐爛臭惡如屍。須防生蛆攢痒。發癢發疔。身熱不宜炮熾。發癩發疹。紅潤爲洩毒牖。浸淫不斂兮。土虛不能制水。潰爛不收兮。火旺燦金之象。疤凸赤兮。因風熱所搏。疤凹白兮。因虛成陷坑。

險居可生可死之界。得生失死之塲。援之得兮。罔不起。投之一失。罔不亡。險症多般。須挈紀綱。一一求之。志無定向。一以貫之。運如反掌。辛溫滋補之症。繁多得一

眞虛而盡括。寒涼攻解之治不同。得一眞實而俱囊。窮其眞。虛眞實之源達其極。熱極寒之變。權其輕重較其短長。用補用攻。應必如響。勢如寬緩而直達兮。必違常格。勢若急迫而更似是兮。可不窮理而通方。徒據日而定治。尋春於昏夜。第見病而治病。隔靴而撓痒。神理豈規則能定。妙訣惟洞徹陰陽。元陽得足兮。痘無氣虛之患。眞陰得旺兮。痘無血熱之防。邪陽旺而五液虧。陰寒盛而眞火滅。陽極則厥而似陰。陰極則躁而似陽。氣血得勝兮。毒火退聽。毒火雄裂兮。氣血滅亡。畏矣哉。邪毒之進退。大矣哉。氣血之消長。

氣爲陽。而毒火侵炙兮。爲蝕氣。或煩熱。或燥渴。口膩如脂。喉間乾噤。痘色輕則乾。而重則滯極則燥而枯。有舌起芒刺。有唇縮燥硬等象。血爲陰。而毒火侵炙兮。爲燥血。或大便燥結。或小便短赤。夜不成寐。唇焦舌黑。痘或乾紅。或紫黯。或板黃。或焦黑。收痂燥硬。爬肌搔肉。痂不能落。○毒火衝突。氣分兮。熱如火熾。爲亢陽。或顛狂。或叫喊。或大渴不已。或喜冷思涼。有皮肉擁腫。有面目光亮。有口熱如爐。有

唇腫如炊。有痘起浮衣。有發空泡。有水泡。有重頂。有迸裂。或氣湧。或填脹。或頭汗如淋。或面目預腫。過期腐爛。毒火衝突血分兮。爲血熱。或界地不分。鋪紅肆溢。或眼赤如硃。或迫血妄行。有從口鼻而出。有從大小便而出。有從瘍瘡當頂而出。痘或焮紅。或紫艷。或發血泡。或發紫泡。毒火盤據氣分兮。爲氣滯。不能預毒。痘出不快。不能峻頂。或平。或陷。不能化毒。難以成漿。或板。或堅。或硬。不能成熟。難以拘毒。或密。或細。或堆聚成形。或貫珠成象。不能磊落。一身之氣。均爲毒錮。而失其尊。毒火盤據血分兮。爲血瘀。瘀於內。根窠無量。有頂無盤。痘色白黯。與肉色無別。難以載毒。瘀於外。根盤紫黯。有發蚤癩。有發蚊迹。有若紫背浮萍。難以成漿。一身之血。悉爲毒錮。而失其附。毒火外虐兮。輕則抵穿筋骨。頭面潰敗。毀容殘相。重則如失水之魚。剝膚之木。毒火內虐兮。輕則使膿便血。如木之有妬。重則潰腑潰臟。如菓之腑仁矣。此非氣血之不足。咸受毒火之傷殘。至若氣虛不振。兮。無能領毒。亦頂平。亦頂陷。有灰有白。爲餒而不充。稿而不澤。無

能拘毒。脚不能斂。無能蓄血。盤不圓淨。或皮薄。或皺軟。爲不蒼老。血虛不榮兮。無能載毒。歸附不厚。行漿淡薄。不能發臭。疤不紅潤。面不榮光。終無血色。

知其侵炙兮。則知氣血之燥烈。急解以制其火。涼血以潤其燥。開其牖而清徹。之不使至於焦枯。知其衝突兮。則知氣血之搏激。急蕩滌以攻其毒。苦寒以制其燄。涼血以救其陰。兼於蔬表而令宣暢。不使至於外剝。知其盤據兮。則知氣血之拘囚。急蕩滌以開其閉。破而以導其瘀。兼於蔬達。拔其深根。而不使內潰。知其氣虛不振兮。則知毒無駕馭。或溫補以致其旺。或峻補以復其陽。或開鎖以禁其虛滑。不使淪於脫去。知其血虛枯槁兮。則知毒無乘載。或滋養以厚其體。或重補以振其漿。不令流於空殼。

百凡變症。惟此推詳。不必以痛爲實。以痒爲虛。以燥爲熱。以戰爲涼。出運之根宗。洞達。隨在得從心之爽。不求合矩。自不踰方。莫謂參芪非發痘之劑。蕩滌非治痘之方。莫謂行漿無寒涼之法。收斂無疏達之商。此理若明。尤得豫而克濟。徹彼乘

土迨未雨而可防毒至潰而攻之。覓犬於見兔。元至脫而回之。補牢於亡羊知微。之顯而得預爲之地。知風之自。而悉致病之詳。

痘出不快兮。主乎升發。必究其繇兮。寧第蟬蛻蜂房。其或表邪外束兮。必解散而毒有出路。飲食停內兮。必食消。而毒無攔擋。毒火熾盛兮。奪其勢而不使壅逼。氣虛不振兮。助其元而令彼發揚。其源得濬。其流自長。貫漿同於一轍。結痂甯有參商。表如太實兮。鬆之不徹。毒火仍閉而爲虐。表若太虛兮。固之不實。真氣終洩而爲殃。裏若太實兮。攻之不暢。氣血仍困而受虐。裏若太虛兮。補之不實。真元終乏而何漿。實必至於內潰。虛必至於亡陽。更若加乎顯倒。何異抵痘於鋒鎗。妄異成膿。求魚毀網。即此一端。可以推廣。

膿若成而毒未盡。治毒何能遽止。氣雖足而血未收。涼血何以鬆放。不則竟爾收斂。餘毒必至彰彰。亦有當收不收。脾氣必困。中央此宜實脾燥溼。助痘收斂。何妨口渴不因火炙。生津補液相當。便瀉不因火迫。固脾實土爲良心。虛不寐兮。自宜

定志。胃虛不食兮。助納爲強。腠裡虛而汗洩。還宜實表。神不守而多言。務使神藏。邪毒淨盡兮。悉從乎補。餘毒留連兮。可廢平章。總歸虛治兮。不通之論。不明剝復兮。安用彼相。補必期足。攻必期暢。藥不勝病兮。何言九似。治之過當兮。誰云力量。酌其虛而溫之。補之熱之。固之不爲實實。明其實而涼之。瀉之寒之。解之不爲虛虛。首尾不拘。惟理是傍。痘若平易。好奇必誤。痘若偏陷。適莫宜亡。常道不諳兮。無此庸俗。尋常不化兮。烏得爲良。

推廣規則錄

道有位機。階梯必從規則。學期自得。畫一何能推廣。孩體初熱兮。視其溫壯。溫則輕而壯。則重溫。心神爽方輕。躁亂莫慶。壯則痘起。猶輕。毒滯尤重。壯熱按其燥潤兮。潤則水濟。猶輕。燥則亢陽尤重。兩眼昏沉兮。如睡未醒。唇口手指。矧惕兮。神情恍恍。胃火上銜而嘔吐。邪熱下注而傾腸。此因毒趨百竅。是皆出痘之象。吐不必治兮。邪從吐洩。利不必止。名毒以利暢。其或發搐兮。惟利關節。毋爲驚治。其或狂

躁兮。惟清煩熱安神必戕。治先疏肌消食。升發透毒爲良。表邪因其輕重。輕則前胡荆芥重則芎蘇乾葛。風寒可用辛散。風熱惟宜清徹。內傷何獨不然。食輕麥蘗山查。重必青皮枳實。發痘隨症相宜。蟬蛻蘆芽桑虻。咽喉凡痘宜清。牛旁與夫甘桔。惟有內傷嘔吐。甘桔亦宜暫撤。毒盛內伏兮。攻不宜緩。身如火炙兮。早撲可滅。遲則養虎貽患。致令將來無策。無論漿不能化。縱發何能得出。亦有胃塞而嘔。脾虛而瀉。非因欲痘而然。痘瘡偶因發洩。其必目眵低陷。天柱軟側。足冷頭溫。神情虛怯。重語聲輕而顏。皓白必先安胃醒脾。茯苓車全。腿米。縮砂。陳皮。甘草。扁豆。蓮心。配合。方於痘所宜兼。並行不悖。揀擇。令亦疏肌消食。何異霜而重雪。痘若險中帶順。率由舊章。乃得。痘看稀密兮。稀爲輕而密爲重。稀得榮綻爲輕。蜜更不鬆。尤重。蜜其色之紅白兮。白屬血虛。而紅屬血熱。白而嫩薄。血真虛也。血虛者慮其漿清。紅而壯熱。血真熱也。熱則防其紫黑。預平預陷。有氣虛氣滯之分。氣虛者淡白。氣滯者板赤。淡白充拓而可起。板赤。疏達而勃勃。根壯根堅。有毒鬆毒錮之殊壯。

者。圓綻而鬆。堅者縮而硬。結圓綻可以弗藥。硬結非透可出。活血透毒。起脹時之工夫。涼血清火。成漿前之規則。活血如紅花紫草。透毒如山甲蜂房。清火蒼連犀角。涼血丹皮地黃。囊殼得鬆兮。不必再透。色轉紅活兮。何用再涼。痘犯熾熱。涼解何拘首尾。痘若虛寒。溫補何妨巔末。淡白而兼色嫩兮。參芪保元爲最。淡白而郭殼老蒼兮。芎歸熟地爲良。小水短赤。道赤絲來必用。心煩噪亂。涼膈散快胸堂。疏表以毒透爲期。涼解以火清爲傍。咽喉時防阻塞。莫犯辛酸冷熱。頭面時防搔痒。最忌醴穢腥香。皮薄漿清。托裏而膿自足。灰白平陷。氣足而痘自發。癢分虛實。溼爲虛。而燥爲實。虛則倍以參芪。燥者黃連生地。便分滑滯。滯爲毒。而滑爲虛。毒則惡實。紅花黃連木通滑石。虛則木香訶子茯苓陳皮參朮。亢極作戰兮。必燥熱而腫赤。氣虛寒戰兮。必冷白而皺涇。充極重以清火。而佐散氣。虛急以回陽。而偶煖。牙鬪於發痘之始。責於肝腎之火伏。齒憂於漿成之後。責於腎肝之少血。虛當重。以芎歸熟伏勿令火遏。曰不思食兮。有胃虛火閉之殊。夜不成寐兮。有心虛熱。

擾之別。邪熱迫。而液沸。腠裏虛而汗洩。總令補瀉合宜。勿使虛虛實實。形不鬆色不活。水楊湯和入胡葵。而可浴。或黑黯。或破傷。化毒丹調入臙脂。而急貼。氣血錮閉。豬尾膏透活。無雙黑黯。乾紅無價散。能令紅活。未應收而燥斂。生地重以兩許。應回結而溼潤。不收薏米防風荅朮。餘毒未盡兮。審其透伏。伏則疏肌透發。透則活血解毒。體虛而毒未盡。參歸化毒湯宜。神爽而熱未和。地骨小柴亦得。肢節腫。歸尾牛膝爲君。佐以紅花羌活。兩目紅腫。羚羊荆芥爲先。次以甘菊羌活。木通赤芍連翹。燥熱生地皆合。熱蒸不斂。細茶未收之。而可乾。和皮脫去。金蓋散敷之。而自結。種種有實有虛。有寒有熱。不得以陷爲表虛。以綻爲表實。以吐瀉爲裏虛。不吐瀉爲裏實。不可以漿後爲虛。漿前爲實。痘多疑似。毋爲其惑。欲得其真。必詳參合。詳其似是實非。衡其當務爲急。痘若偏枯。宜以偏濟。症無定局。妙在權宜。以補爲瀉。以瀉作補。究其離乎規則。合乎日期。同乎鉅燧。原不下於通方。五行順叙。即顛倒之核機。顛倒核機。即生尅之常理。

治痘須知大運論

天以陰陽而運六氣。運有大小。小則逐歲。而更大則六十年而易。小大有不合。大運於陽。歲位居陰。是陽中之陰。猶夏日之亥子時也。大運於陰。歲位居陽。是陰中之陽。猶冬日之巳午刻也。民病之應乎氣運。在大不在小。不可拘小節。遺其本而專事其末也。譬之星理。以命爲主。流年利鈍。焉能移其大局乎。病而於小大俱合。無論矣。有於大運則合。歲氣相違者。自從其大。而畧變其間也。此常理也。間有於小則合於大相違。更有於大運歲氣俱違者。偶爾之變。亦當因其變而變應之。如冬溫春寒。更有若夏令飛霜。隆冬雷電。時令不無怪異。民病豈無悖常。但不可以常理論也。總以大運爲主。不以歲氣紛更。強合乎病。又不設成見於胸。惟症爲的。與司天不合而自合。庶乎其近道矣。若概謂當先歲氣。毋伐天和。似非世則之言。嘗藉東垣一以保脾爲主。河澗一以滋陰爲重。子和一以蕩滌爲先。皆能表表於世。總得挈領提綱。故得一本萬殊之妙。不則當年豈無歲氣。而必各取其一耶。至

於痘症有獨取于辛熱有得意于寒涼。有扼要於保元。是亦治痘之明手。何不見有逐年之分別耶。要知大運之使然。非三氏之偏僻也。如曰偏僻。則當年各操其一以應世。何以得各擅其勝乎。成平以禮樂。戡定以干戈。此世運推遷之理。人事當然之局也。後學不明其故。各效其一而不通變。亦有畏其偏僻。而第據症按期。有侈談歲氣。以是高卓。皆不知循環之大運者也。余先君養恒。治痘肇於神宗初年。以及謝事。大運寒水。痘多氣虛。即血熱之症。至行漿時而火無不清矣。漿後而毒無不解矣。即有變症。悉屬真元不繼。縱有火毒未盡。亦不過強弩之末。總歸虛治。無不響應。昔魏之保元。正是時之真訣也。及予於丁巳至癸亥。尙多氣虛。與曩局較若一軌。自甲子而血熱者漸多矣。其毒亦漸深矣。向補宜從重者。變而宜輕。瀉宜從輕者。變而宜重。殆及丁卯。所宜重瀉者。雖極清極解。而亦弗靈矣。勢必蕩滌而元臬之勢。始役然猶放標起脹時之權宜也。至壬申後。蕩滌之法。向施於成漿前者。竟有首尾而難免者矣。歷年以來。居然成一定局。間有宜溫補者。不過百

中一二而已。見大運轉於相火矣。治痘不同。其固如此。試問痘之形色症狀。亦有異於前乎。無以異也。第多內症焉耳。伏毒焉耳。痘如稀疏者。其熱宜和。乃有非乾焦如炙。即頭汗如淋。其神宜爽。乃有非啼號不已。即昏憤如迷。唇有不見掀腫而口熱如爐。舌膩如脂。目有不見紅赤。而睫毛倒堅。兩頰如硃。色令紫滯。譫妄其宜。每見肥紅而語言錯亂。色如灰白。厥逆其常。每見焮紅而愁肢冷。期至漿滿。痛脹何奇。每見放標而即如膚剝。時方透點。煩熱何妨。每見落痂而熱猶火熾。有時時而乾嘔者。有頻頻而腹痛者。症難悉舉。使內無伏毒。何以其若是也。使伏毒而僅以規則治之。毒其能治否耶。見相火應病怪異。乃爾也。自古氣運靡常。純駁無定。痘故變態靡常。補瀉無定。是知今之非昔。其殆日後之非今乎。乃見前賢住哲。道雖不同。其趨一也。若使易地則皆然者矣。詎任胸臆者所可彷彿者哉。予於當事時。懷冰兢惟恐偏僻。致誤庶幾。屢應屢驗。稍可自信。亦有莫挽者。明知其逆不必治。不過熱腸所迫耳。

附乾焦如烙頭汗如淋一治驗以證大概

故友孫貞老。遺一子。四歲。庚寅莫春。出痘。甚勻朗稀疎。而綻突。其熱宜和。其神宜爽。而躁亂如失水之魚。乾熱如紅爐之炙。頭汗卒如雨。下蓋痘梟毒內擾。則躁亂。烈火燔極。則燥炙。痘瘡最惡者也。而况頭汗如淋。頭爲諸陽之首。輕清最上之地。邪毒不易犯者。而犯之。以下可知。所以先賢謂毒參陽位者死。症屬不治。所幸惟初見。勢雖騰湧。而毒尙未有定位耳。大黃二錢。石膏三錢。黃連六分。生地三錢。佐以地丁。青皮。荊芥。蟬蛻。木通。山查。連投三劑。而頭汗即收。熱勢頓減。因減而減。石膏黃連。加丹皮。滑石。牛旁。餘俱照前。服過四劑。痘五朝仍壯熱。而紅暈如硃。以痘起齊。而毒火儘發於外也。躁亂如前。而更渴。大便三四次。照前方。復用黃連。石膏。倍加生地。至九朝。漿甚老。而少滋潤。紅暈未淡。胃氣不開。熱亦未減。寢亦未安。以一方。至十二朝。諸邪悉退。寢食俱復。以金銀花。貝母。甘草。山查。牛旁。荊芥。木通。門冬。扁豆。收癩落靨而愈。

附一稀朗紅潤叫喊不已治驗

驥村嚴五侯兄一子。甫一週。出痘稀朗。可以數紀。且紅潤可觀。及其身熱如炮。愁楚不堪。兼窠粒不鬆。此內有伏毒也。若以稀疎紅潤而概目之。則誤矣。予卽以大黃六分。石膏生地各錢半。佑以荆芥丹皮山查蟬蛻葛根青皮連投二劑。大便去三四次。熱與愁楚稍緩。又投二劑。熱和神定。窠囊亦鬆。宛然順痘矣。然此霧色。乃藥力強制而來。非天然之本質也。藥一不繼。毒勢必復然矣。有一不韻同道而讚曰。此痘本順爲其所愚。再用此劑。必然致誤。不知重劑妄投。痘卽極順。一瀉而卽變矣。何能反得鬆透而神定也。主人不解其理。遂中止弗藥。至八朝。仍復熾熱。徹夜叫哭而至失聲。頭面擦破。身上紫滯。誨聽讒言。徬徨無措。復邀予視。尙喜破傷而未乾。焦色滯而囊未隱。仍用前方倍加大黃生地黃連。減葛根。臨服和入大桑蟲。日以二劑。速以化毒丹。調入油胭脂內。將綿紙做如膏藥。以貼破傷之處。次日痒卽止。色轉紅活。叫哭頓愈。又二劑。漿足飽滿。頭面復貫。連紙鬆擽。膿漿四溢。壯

熱亦和。十二朝用金銀花地丁生地牛蒡荆芥木通甘草連翹山查。調治收功。痘後乳食倍進。大便較痘前反實。神色甚旺。夫以一歲芽兒。痘且似順。一有伏毒。必得如此而後愈。餘可知矣。

### 論治痘權宜

治痘百千妙訣。不越補瀉兩途。痘症百千形狀。不離氣虛血熱兩項。氣見其虛。無症是實。血見其熱。無症爲虛。得補諸邪自解。宜瀉正氣自復。補瀉之法。用於常則易。用於變則難。人第知其以補爲補。以瀉爲瀉之成法耳。不知補瀉之變幻。有用補以成其瀉。有用瀉以成其補者。如痘不起發。以之疏表達裏。是以瀉爲瀉也。乃有固中實表而痘適以起者。非以補成其瀉也乎。如漿不能化。以之保元拓裏。是以補爲補也。乃有涼解疏達而漿適以足者。非以瀉成其補也乎。此內經瀉東方而以南補西方而以北也。舉一而言。三隅可知。知此則補不必拘於時瀉。不必拘於候時。而一以補焉。當不至於助毒。一以瀉焉。當不害於元損。時而依期傍候。蹈

矩循規。祇見行其無事。非爲胸中無識矣。於此不能權宜。凡可生之痘。皆淪於不起。然痘家喜補而畏攻者多。信攻而畏補者少。醫亦依傍。繩墨者多。達權通變者少。往往從補而致斃者。更十居八九也。

附治驗

先君一友孫瞻老。已酉歲。一長公忽一日內傷而吐。次日見痘甚密。自朝至暮。絕無起勢。先君以鬆肌透表二劑。猶之弗藥。次日便以保元湯。參芪各一錢。加芎歸。蟬蛻。外以姜桂少許。以爲之使。日進二服。景况依然。三朝以參芪各三錢。餘亦類加。至四五朝畧起。終頂陷囊薄七朝。以參芪五錢。配嫩鹿茸膏半盞。餘佐如前。仍無沛然之勢。一友從旁論曰。抑邪得補而愈盛耶。先君曰。果爾。則煩熱躁渴。痘色蒼老。礬紅。今皮薄色白。頭溫足冷。求一熱而不得。是不可以得其故乎。乃以參芪各一兩。鹿茸膏大半盞。一劑而痘即峻發。綻突如珠。根紅頂白。不一日而漿即肥。其後收痂落靨。不假餘力。是以補爲瀉之一驗也。今無是症矣。

雉城臧侏葵兄。一公郎八歲。羸瘦如疴症。丁癸。僅存皮骨。庚寅仲春見痘。若以理論。脾主肌肉。瘦削如此。脾德當何如耶。况痘賴氣血終始其功。而氣血之源。根於脾胃。是痘之當以保脾爲先。可無再計。而孰知身熱如炮。目紅如火。躁渴不已。弱血如膏。痘色則椒紅黯滯。此梟毒與烈火發卽內。攻若不通變。七日期當內潰矣。余以大黃四錢。石膏七錢。生地兩許。佐以桃仁赤芍荆芥地丁牛旁木通。臨服和豬尾膏一盞。日服二劑。或三劑。六朝加黃連。自放點以至成痂。以一方而終始其局。約用大黃筋餘。生地石膏二十餘兩。猶尾血十餘碗。而始收功。若此者。以毒火雄烈。首尾如一日也。苟不滌除淨盡。不免功虧一簣矣。痘後精神煥發。飲食大進。而肌肉生長。是以瀉爲補之一驗也。

治痘藥性摘要賦

方不合宜。厥疾何瘳。藥不明性。方從何合。山查寬氣道而鬆痘。消食亦宜。桔梗順肺氣而清喉。藥中舟楫。蟬蛻發痘之必需。甘草解毒之莫缺。前胡清風熱之痰。亦

能下氣。葛根散肌表之邪。兼能解渴。薄荷清風痰而散驚。鈎藤利驚搐而散悸。木通導赤除煩。毒從溺解。牛旁清喉解毒。邪從肌洩。枳殼下氣寬胸。青皮散結消食。檳榔豁痰逐水。殺蟲去積。枳實倍於枳殼。推牆倒壁。澤瀉利水通淋。豬苓速於澤瀉。川芎助清陽而升頭角。毒火上炎者宜。審木香理滯氣而溫。脾胃乾紅色滯者。何涉。大黃驅臬毒而不留。破惡瘀而不守。不令內潰。石膏解煩渴之如烟。退炎炎之火。烈不使焦黑。姜蠶催漿定痒之一隅。白芷托頂排膿之偏卒。荆芥散風熱而清。血中之炎。徹上徹下。防風散風邪而行。周身之閉。驅風燥溼。生地黃涼血之聖劑。潤燥無雙。熟地黃補血最良。右莫能出麻黃發痘而透淵潛。寒勝則宜。陳皮消痰。而開逆氣。燥烈則撒升麻。升散而上提。火炎必戒。白芍斂陰而退熱。莫投血熱。山甲力透重圍。其性燥烈。地龍無地不透。最能活血毒。凝滯而不透。紫草當行。血乾滯而不榮。紅花莫失。羚羊清乎肺肝。犀角解乎心熱。黃芩瀉肺火。而涼大腸。失血亦宜。黃連瀉諸火。而解熱毒。乾嘔聖藥。赤芍藥破血中之滯氣。療毒壅之腹痛。

牡丹皮退陰中之伏火散血熱之氣結。桃仁佐大黃而退浮萍。血瘀必用。地丁君紅花而散紫黑。毒結尤良。貝母治毒痰而利心肺。桑皮瀉肺火而治氣逆。滑石利六腑之塞結。溺赤尤宜。杏仁開心氣之閉塞。止嗽亦得。連翹均足瀉火。花粉可以解渴。當歸補血虛之要劑。鹿茸振血冷之幾脫。豬尾膏透伏毒之深藏。無價散轉黑陷爲紅活。佞府留毒。化之無敵。珍珠毒凝痛楚。定之還須。乳沒牛黃。護心解毒。清火開痰。琥珀利水除煩。安神散血。黃芩振氣虛之不充。排膿托理而實表。人參補真元之不足。滋助五臟而內益。桂爲參芪之使。壯血虛冷。附起虛脫之疴。回陽反本。白朮止吐瀉而健脾。茯苓利水道而滲溼。金銀花解痘後之餘毒。地骨皮退痘後之虛熱。茯苓酸棗寧毒盡之心虛。訶子肉果塞脾虛之滑瀉。山藥助脾而益腎。米仁收溼而助脾。邪留下部。行走必需。牛膝毒存筋骨。通散無逾。羌活小柴解痘後之潮熱。引藥入肝而主升提。麥冬清心肺之煩渴。生津補液。非虛弗合。佞參去浮游之火。解咽痛而快癢。山梔夫曲折之火。清肺胃而止嘔。木賊草退餘毒之

目翳。甘菊花療痘毒之目疾。扁豆蓮肉助脾無嘔無喜。竹葉燈心清心可出可入。藥品浩繁。惟貴精擇。純熟其性。泛應不竭。

救偏瑣言卷之三

發熱論

痘瘡未形。熱兆其先。何以其自熱始也。蓋痘本一先天毒火。毒而係乎先天。毒自內出可知。而且濟之於火。其爲熱毒又可知。熱毒發於內。而欲達於外。其有不熱者乎。然熱症繁多。何以別其爲痘之熱也。毒一萌動。出乎包孕之地。其勢旁達。細察其毛竅則聳簇。按其肌肉則矚惕。唇口必濡跳。手指微抽掣。有似驚意。但驚則顯見而迫。彼則隱微更緩耳。其所以然者。以毒尋竅而出故也。其氣腥穢冲冲而起。眼必昏沉。胃必嘔吐。氣濁而神不清。所以然者。以胃與目。神與氣。屬上焦而主輕清。目更係五液水會之地。爲腥穢所干。自搖動而不得清寧矣。凡發熱而有是象者。痘之熱也。古人驗中指獨自冷者。亦謂其中指通受納之開。胃爲穢毒所

衝。而故失其常也。又卜其兩耳。紅筋必輕。紫筋必重。與夫耳翕冷熱之辨。亦爲耳乃腎之竅。水受火之搏也。然有驗有不驗者。必合驗前象之爲最確耳。寂無所感。痘自鬱然而萌動者。其象如斯。若先感寒邪。必鼻流清涕。面顏青慘。翕翕發熱。不免於淅淅惡寒。頭疼拘縮而無汗。啞兒烏知其疼。驗其眉愁是也。若感風熱。則面赤聲重。涕唾稠粘。氣粗鼻塞而氣熱。太陽筋惕。身有微汗。若傷飲食。胸腹按之必愁。彈之如鼓。口中噁腐酸臭。大便或閉或瀉。閉則轉矢氣極臭。瀉則如注。穢臭倍常。驚則面有青氣。但不惡寒。手足兢跳而不拘縮。卒然啼哭。而若有所見。神情恍惚。如人捕捉。緊抱則安。稍動即悸。甚則或斜視。或上竄。手足拘攣。角弓反張。四者皆客感。本非痘象。然皆足以致痘。痘若因感而動於中。必合痘象而見於外。症雖多般。總不離熱是熱也。痘雖未形。而痘之吉凶生死。未始不判於當下。如客感無侵。則毒無阻礙。更得熱勢和緩。體膚滋潤。微兆其欲痘之象。別無可虞之症。將來放點。必氣領血載稀疎。綻突榮潤可觀。吉之兆也。如痘本輕。客邪太重。

重在表。則腠理閉密而毒無出路。重在裏則中宮填塞。而毒難宣暢。重在驚。則神情虛惕而毒不得振作。縱令痘無可虞之象。而客邪有變痘之虞。是謂險從順變。而吉中不能無凶矣。若夫壯熱煩渴。或大便燥。或小水赤。或不耐衣被者。不必問客邪犯與不犯。熱象如是。痘自匪輕。難乎其爲吉矣。至於熱如火熾。體膚更燥。發渴不已。口熱如爐。鼻燥唇裂。目紅頰赤。小便癢而大便閉者。此熱之盛而凶之至也。乃有徧體燔灼。而四肢則冷。體燥如炙。而頭汗如蒸。有靜則燥熱如炙。動卽汗洩如油。唇口焦裂。舌起芒刺。目紅。而睫毛倒豎。面赤而板硬如腫。鼻衄成流。溺血如膏。置身體于坭水之中。則快。嚙冰雪于咽喉之下。則爽。有一於此。是熱盛之劇。窮凶之至。而與死幾鄰者也。又有骨節煩疼。腰如被杖。徹夜無眠。身無安放。靜則昏瞶如迷。躁則如魚失水。筋抽脉惕。甚至手足俱揚。皮毛刺痛。甚至衣衾難動。有叫喊而不休。有欲啼號而莫得。目閉者終日不開。直視者終夜不合。舌弄如蛇。天柱倒側。此等惡症。熱如炮烙者有之。頭溫足冷者有之。唇焦頰赤者有

之青慘黯滯者有之。即一體之中。寒熱相判者有之。陰陽殊絕者有之。始不可以數紀也。所以然者。以毒火有隱見之分。非真有寒熱之介也。迺若從前所論熱之身溫有壯。壯而有潤有燥。燥而有劇與不劇者。何以故。以毒火有輕重之別。在氣在血之不同耳。火毒初萌。有血當其先者。血當其先。則血之受毒倍於氣。有氣當其先者。氣當其先。則氣之受毒倍於血。毒所以有在氣在血之症也。血屬陰。以陰遇火。則自熱。火毒得其輕。則熱自透而能和。氣屬陽。以陽遇火。則熱自壯。火毒得其輕。則熱雖壯而能潤。令重者而血當之。身之賴以滋養者惟血。血爲烈火煎熬。則血失其養。其熱自燥。而體不得潤矣。令重者而氣當之。身之賴以運行者惟氣。氣爲壯火所蝕。則氣失其運。而脉絡爲之阻塞。遏鬱處則冷。衝突處則熱似火。汗如蒸矣。重極者而血當之。以有限之血。而抵無涯之火。猶杯水而敵車薪。鼎沸於內。則妄行空竅。蓄聚於中。則凝結成瘀矣。血至於瘀而氣有不受困乎。尙冀其能領毒而發見也。耶。不熱自有之矣。外見青紫如傷。藍癰如証。是其驗也。重極者

而氣當之。以陽剛之性而櫻。烈毒之火。陽既亢而毒且厲。陽亢則熱極生寒。火極似水。毒厲則萌動即攻。未幾欲潰經絡隊道。悉爲毒錮。尙冀其能蒸發而熾熱也乎。凡見悶亂無聲。面顏青黯。是其驗也。所以悶痘之斃。不俟終日。總以無所容其發洩焉耳。故熱雖發始之症。而熱之輕重緩急。不可不知。輕者不治而自愈。緩者從容而可圖。重若忽而必敗。急若懈而何追。挽回調劑。古人必按痘之形色而後推敲。施於緩者則可。其重且急者。痘雖未形而兒體之生命。已在涉春冰而蹈虎尾。乘痘未及見。毒雖猛而尙未有定位。火雖烈而尙未及燎原。此誠轉危就安之機。起死回生之會也。必侯察形驗色。其勢已成而牢不可破矣。况乎形從氣見。色以血呈。欲卜形色之美惡。卽氣血安危之機而逆睹矣。欲察氣血之機。卽發熱時之景象而昭然矣。誰謂發端非究竟乎。火未至而先烟。雨將至而雲合。由來其機如此。得此位關。於發熱時之調劑。不必求合於痘。而自中的。若泛以熱治。未有不致悞於重。而急者矣。

附治驗

朱吉人兄小公郎。甫及百日外。忽一夜身熱如焚。躁亂不寧。次早舌即有胎。乾燥如炙。口內如爐。頻頻乾嘔。筋抽脉惕。腹硬如石。而有痘象。余固知其惡痘將萌。烈毒沸湧。故發始便猖獗也。勢雖危篤。幸痘尙未見。挽回惟冀此耳。即以黃連三分。石膏七分。大黃三分。佐以荆芥葛根地丁赤芍木通丹皮蟬蛻青皮乘毒無定位時。連投二劑。勢不稍緩。照前方。加生地錢許。又二劑。而痘見矣。其細密如針砂。色甚乾紅。絕無生理。仍以前方用大黃七分。桑蟲一大枚。又二劑。解毒垢甚多。三朝如針砂者。悉行退去。稍成顆粒。着色轉紅活。筋脉尙惕。熱猶火熾。徹夜啼號。其餘減半。以一方貫至九朝。根紅頂白肥潤可觀。十朝成漿頓足。神亦稍安。熱亦減半。照前方減大黃石膏十分之四。十一朝熱勢復然。啼號如故。膿漿迅速。乾焦紅暈尙是焮赤。前方倍加生地大黃石膏。外和猪尾膏。并大桑蟲以鬆透其餘。十二朝發癰如霞。晚即安睡。焦痂鬆擡。色亦滋潤。至十四朝。如前惡症般般復作。牙齦腫

腫有細細二牙。爲毒擁出。點乳不能進。是時予在潯中。次兒將針挑去。照前方調牛黃珠末分許。方得吮乳。諸症稍愈。十六朝子歸往視腦後。與環跳起一大癰。前方加貝母羌活減生地。石膏乾葛服至二十朝出膿收功。

又

仲文張兄。二公郎。癸未仲冬。忽身熱如火。神即昏潰。舌刺如煤。唇口焦黑。身上如針刺血癢。不紀其數。溺血紅鮮。肉嚼筋惕。有若驚悸。固知其痘。趨百竅而然。第此惡象。宛然一悶痘景色。斷非輕劑可挽。即用石膏一兩。大黃五錢。黃連三錢。生地一兩。佐以青皮荆芥地丁丹皮。天寒稍配蜜炒麻黃二分。姜一片以行之。大劑灌下。即嘔。仲老曰。奈何。余曰。毒火上衝。水火搏激。兩不相下。故爾。任其嘔逆。彼上而我下之。藥一進步。當必受納矣。二劑便覺稍差。漸而得進。直至第八劑。方全受納。如此大劑。服過十餘劑。方始見痘。及其見痘。可以數紀。唇舌猶然煤黑。溺血復然。至九朝後。焦唇始退。舌亦有津。年已八歲。問之方答。神覺蘇醒。至十二朝後。尿血

得淡。胃氣日開。十六朝而全愈。服過大黃十餘兩。石膏生地。約有二觔。得以成功。是早圖之一驗也。

又

竹溪沈公挹兄。一小愛年及週歲。一日身熱如焚。汗出如雨。兩目徬徨。如畏刀鋸。即用大黃四分。黃連三分。石膏二錢。餘佐以丹皮木通山查。青皮蟬蛻。連進二服。次日神色定。放標數點。磊落分明。熱勢復然。又二劑熱和。神爽。痘甚稀疏。色亦頗潤。遂減苦寒。蕩滌以中和之劑。至八朝漿足回好。

升發論

升者。提清氣以上達也。發者。開百竅以四播也。世俗但知以毒透毒。不知升發之義者也。痘自包孕之地。萌動而起。達於肌肉。見於皮毛。一皆從竅而出。竅有阻塞。則毒無出路矣。周於一身。徧於四體。一以頭面爲主。清氣不升。則元首蒙蔽矣。舍輕淺之痘。不得沾沾以逐毒爲發也。故古人有以升麻葛根湯。謂已發未發俱可。

用以葛根。能開洩腠疏暢百竅。痘得以縱步而出。升麻能提氣上升。透發頭面。痘得以挈領提綱。其不專以毒逐毒可知。然成方又不可拘者。愚謂痘犯氣虛。腠裏不疎而自洩。必用乾葛。則重洩其表。俾氣愈虛。痘反餒而不振矣。痘犯血熱。毒火不提而上竄。必用升麻。則更提其燄。俾毒愈湧。致毒反攻頭面矣。又有謂一見紅點。便忌升麻葛根。愚謂氣虛則氣下陷。虛劇者。升之而猶未能上達。法必得補而可充。并升麻且不敢用。痘將何由而起。血熱則表裏壅遏。熱劇者。疏之而還虞未濬。法必攻之而得暢。并乾葛且不敢用。梟毒何自而鬆。此兩說者。各執一定見而不通變。學者不可以概法也。况升發之妙。亦非僅以提爲升。以疏爲發。疏則第可以逐寒邪。散風熱。提則第可以助清陽。發真氣。不惟真虛真寒。惡火惡毒。所不能調劑。即如飲食停滯。暑溼穢氣。孰非阻礙脈而碍氣道者。其得以兼攝否耶。存心於此道者。必審其何痘宜疏。當不虛其表。何痘宜升。當不提其毒。何痘宜升發。並行。兩用而兩得其効。何痘可以升發無籍。即得以無事爲工。何痘宜寬中。何痘

宜清徹。何痘以不發爲發。不以疏爲例。何痘以不升爲升。不以提爲則。總令氣之得以直達。不爲毒錮。不爲火蝕。不爲邪鬱。不爲穢閉。不使窒礙。不使消阻。得以拘領其毒而出。升發之梗概。庶乎其得之矣。得此機關。苦寒如蒼連。辛熱如桂附。補塞如參芪。湯滌如硝黃。何莫非升發之劑。此竅不得。山甲人牙。施如燥熱之兒。地龍尾血。投於寒凝之痘。桑蛀蟬蛻。隨痘皆宜。據日期而不敢多用。魚蝦雞笋。鑽瘡宜禁。凡遇痘而漫無區別。本透毒之利刃。與不能操刀者。而反割矣。若是則伎之又伎。似乎無可適從。要不外於表裏虛實之間。輕重緩急之勢。驗其形色。考其症狀。體其神情。參其脉息。一一而端詳之。治法與發熱之條無兩軸也。

### 附治驗

先君治一痘憲。副馮魯翁之孫。昌老之長公也。兩朝稠密無縫。皮薄色淡。身涼體靜。睡不合眼。神情困倦。面顏皓白。吐衄數條而俱死。此虛寒而鄰於逆者也。先君即以保元湯。加芎歸肉桂山甲數劑。而症僅中止。絕無起勢。仍以前方用參三錢。

莖五錢。外加熟附五分。日服二劑。六朝痘漸起。色漸紅。囊漸蒼老。肢體亦緩。參至四錢。莖六錢。附七分。喜便不瀉。更加淮熟地膏半盞。鹿茸膏數匙。至十朝而兼得肥臃神情爽朗。寢食俱安。十四朝回結收功。因痲乾燥。防其餘毒。以參歸化毒湯。重以忍冬膏調理而安。

又

孝廉嚴蔚翁。一公朗六歲。丙戌仲夏見痘。乾紅色滯。頂陷不鬆。身熱如烙。煩躁不寧。按其胸膈愁痛。口有曖腐氣。累日不起。此毒火伏於內。而中宮有停滯也。以大黃二錢。青皮錢許。兼之蟬蛻荆芥赤芍紅花地丁。外用山查一兩煎汁碗半以代水。連投二劑。解宿糞甚多。痘卽頓起。痘色慳赤。仍用前方如黃連生地。漸漸放白成漿。第壯熱未和。虛餒尚在。前方貫至十二朝而始收回。脫靨得以成功。

又

孺山一故友鍾晉叔兄。有一小愛。痘直炎天受暑。煩擾非常。壯熱如焚。痘色乾紅。

累日不起。渴思井水不敢多與。僅一碗許便覺爽朗。求之不止。不覺飲及一斗。通身微汗。而神情始快。痘即隨起。色亦紅活。終以清火解毒收功。

又

韓太史一孫。子蓮兄之公郎也。甫及週歲。忽一日身熱如烙。昏迷不醒。似驚非驚。而有痘象。余固知其必痘。却屬火裡苗之症。非輕緩之劑。所能取勝者。以大黃錢許。石膏黃連。佐以清透達表之味。連投二服。而痘遂見。勢亦減半。至三朝。痘頗稀朗。自起發以至結痂。無甚風波而愈。向非早爲之計。而釀成之。始有不可知之局矣。

疏表

發痘機關。先辨表。表係痘瘡之門戶。表若無邪莫過求。表若干邪無出路。疏表必審是何邪。不可混同無區別。冒寒清涕在隆冬。蜜炒麻黃蘇與芎。傷風涕唾必稠粘。羌活荆防可去風。風熱相兼身燥熱。面赤辭辭口膩渴。前胡荆芥葛根宜。莫用

辛香與燥溼表症。雖無痘不鬆。亦宜三味無他擇。痘如起發表邪清。不可過用令肌洩。若還表虛痘必痒。表若留邪毒。閉塞亦有表清毒已透。痘出焮紅或紫色。此是血熱火熬煎血中之火當俾徹。荆芥一種妙靈丹徹。始徹終莫計日。

附治驗

一故友朱漢卿小公郎。痘稠密乾紅。一友以痘色乾滯。便以清火。而兼升發累日不起。予見鼻流清涕。體涼而且靜時。在春初。寒風凜凜。此熱毒輕而感寒。重毒火爲外邪所閉也。以溫肌透毒。散陳皮換荆芥。連投二劑。身體即煖。痘即頓起。次日鼻塞眼封。而痘發焯。身漸熱。痘日肥。清解治毒。調理收功。

又

韓聖翁五公郎痘。歲在己丑。稠密不鬆。眉愁腹痛。終夜不寐。其毒盛。可知蒼白乾滯。涕唾稠粘。頭溫足冷。其毒爲風邪。阻塞可知。急疏風以開。其膿佐於攻毒。以達其滯。至四朝。體漸熱。痘漸起。色漸紅。活但眉宇不開。筋脉時惕。以活血驅毒貫漿。

結痂而回。

又

一兒痘在三朝。目紅鼻塞時或噴涕。而涕甚膿。氣粗壯熱。痘甚稀。却色滯乾紅。無甚內症。呆呆不起。以大劑。荆芥穗。葛根。前胡。佐以黃芩。牛旁木。通丹。皮蟬蛻。青皮。赤芍。三劑。後而起勢沛然。六朝肥紅綻突。不假餘力。而順叙收回。

達裏

發痘機關當究裏。痘有未見先傷食。飲食內停。中氣阻。轉運失職。脾困苦。縱然痘順亦洩。遲設一痘險尤難布。要識如何爲內傷。口中暖腐氣非常。恒有吐瀉。交相迫。亦有胸膛難按掌。有轉矢氣甚酸。臭指彈。腹聲如悶鼓。此等內傷。悉非輕。萊菔。陳皮。枳實。君。青皮。等味。佐枯梗。欲其下降。必兼升。有升有降。理自然。前胡下氣。必推陳。木香。厚朴。姜砂。類。氣味辛香。與燥溫症。非燥渴方擬用。不可混作消食論。食若無多。僅帶消山麥。藥亦足應。輕重寒熱最宜分。若還倒置痘先困。

附治驗

予三兒辛酉生。兩歲出痘。時在孟夏。壯熱昏迷。痘色乾紅。顆粒稠密。然得分珠。亦不脚塌。自放點。以至三朝。絕無起勢。惟氣粗頓悶。轉矢氣極臭。細審未痘前。曾食何物。却食一苧頭圓子。重以枳實山查。桔梗前胡。廣皮麥芽。佐以赤芍。蟬蛻牛蒡。解結糞甚多。而痘即立起。且色亦紅潤。嗣後以痘甚密。功力雖難。而破竹之勢。始此也。

又

孝廉施禹翁一季弟。幼時出痘。道中始事之友。極其升發。四朝毫無起勢。狂煩叫喊。至於咽啞。目時上竄。始事者告辭去矣。子至舉家號泣。以爲必無生理。禹翁昆弟篤於孝友。懇予甚切。子視痘雖不起。而根窠尙在。芩稠密。礬紅。頂陷乾滯。身體反涼。予按其胸膈。手足皆起。診其右手寸關。洪滑而實。予知其內傷太重。而致痘閉塞也。遂以枳實五錢。青皮前胡各三錢。桔梗五分。佐以荆芥蟬蛻。用山查二兩。

煎湯代水是夜連進兩頭汁。次日午候又進一劑。下午一解宿垢極多。痘前縱食雞肉完而未變。將晚又解一次仍前極多。痘即頓然起發。神即安靜。身體大熱。但痘色依然未轉。前因中宮停滯。故毒火內伏。而不熱。今得通達。則火毒發見於外矣。神故得以安靜。嗣後以至結痂。終以涼血清解。痘漸紅活。漿漸肥膿。痂亦不薄。收功而愈。聊舉一二。以驗內傷阻痘者。

### 痘有首尾疏達訣

此疏達者。蓋言毒火有表裏俱盛。令首尾得以痘暢。不使壅遏。非指外感內傷也。

痘有首尾宜疏達。不可專以痘初發。初發之時固多宜。漿期斂候尤當察。若使表裏俱實甚。期在行漿正湧盛。疏表達裏不能權變症。百出趨愈遠。安望成漿毒化膿。壅遏毒火成內攻漿。期已得此中竅。期在收痂又當曉。謾道回漿宜斂陰。宜疏反斂終不清。致毒留連難跳脫。紅暈依然。痂燥黑輕則纏擾重則斃。多因誤斂少清徹。謾道漿後症無實。猶宜鬆達。反令塞毒。痂抓肉不能落餘毒。般般無休歇。輕

發癰疔重必悶。誤將惡毒爲虛論。首尾疏達痘如何惡毒。爲殃何知多。片雲能生兩滂沱前後。工夫須合符有一不侔知。未靖餘氛未殄得非荼。症一炮熱尙如囊。餘象和平那算康。痛苦神情仍未釋。鬚雖許可怎無傷。漿信肥膿形足羨。色猶嫩赤可云祥。形色神情俱似可。一惡當頭未肯降。一惡深藏根未拔。能虧九似至淪亡。只此類。推餘可概。可拘末路不通方。更有一痘最爲奇。痘出稀疎綻且肥起脹。成漿猶似順。順中倏。爾變崎蹊。逆嫌一點非虐話。結局雄疔要害踞。有痘稠密頗多虞。前局多虞後轉移。從此遞看渾似順。順中恒有伏干戈。前途棄甲從旁刺。結局疔痕徧體羅。早覺尙能謀治策。昧即攻心殞刻期。惡毒難靖猶難測。疏達工夫可忽微。

### 附治驗

清溪章繼美兄幾三旬矣。戊寅季冬在外家王復之處。忽然腰痛如杖。昏憤如迷。烈熱如炙。叩之不答。身體振。振肉矚筋。惕痘之象也。但腰如被杖。其痘必逆。猶幸

其岳。復老信余甚專。余得即用大黃山查各六錢。青皮羌活桃仁各二錢。佐以荆芥乾葛。佞參乘痘未見。萌芽甫動而預爲之地。庶望轉機于萬一。令一見痘腎已受攻無及矣。自申至卯連服二頭。汁次早發出。加芥如砂色更焦紫。自頭自足。并無容針之地。形色並逆。神情又惡。希冀何在。予辭弗藥。主人哀懇甚切。情不容却。遂用大黃八錢。石膏一兩。黃連二錢。生地兩半。佐以荆芥羌活葛根牛旁紅花桃仁蟬蛻等劑。加白頸地龍。每劑十條。又以豬尾膏半盞和於藥內。連服二劑。次日其如芥如砂。並焦紫色即退。顆粉分明。紅活可觀。竟若改換但無空隙之地。神情猶然昏憤。身體仍炙如炮。生機却在手矣。翁壻原是甥舅。尊與堂與其兄公瑾皆至。且驚且駭。且信且疑。復老力主其事。云如是之痘。非如是治法。萬無生理。余亦爲熱腸身任。前方不減不增。服至九朝。圓綻如珠。漿黃如蠟。神情與熱法終復如故。大便日去六七次。而不暢快。自發始以來水米不沾。內遣老嫗問曰。不食可無恙乎。余曰。安穀則昌。絕穀則亡。寧得無恙。第是痘不食。非以寒涼太過。非以蕩滌

傷胃而然。胃果受傷。氣血乏本。氣血果虛。漿從何自此痘。本逆所賴。汨於未發。臟腑不至潰敗。氣血得以融通。故得以成。漿如此然。藥力僅可以搜刮隱伏之毒。未能驅除燔灸之火。上焦清氣。何能便徹。只恐梟惡之毒。終非藥力能淨爲畏耳。次日十朝。正面有回意。絕不思食。日期漸迫。用大黃石膏各一兩。生地兩半。黃連山查四錢。佐以荊芥牛蒡甘草十二朝。胃氣忽開。神情纔爽。熱勢亦和。回結頗佳。時值獻節。渴想年糕。因而無物不思。次日便飯。便食肉十五朝。回到。諸症悉愈。痂落如松皮。後又滿口生疔。齒牙後落。又服牛黃珠末。并黃連解毒湯十餘劑。而漸愈。月外復發。一身血瘋瘡。身無餘膚。將白日始得霍然。是痘坑表達。驅毒導瘀。涼血清火。自巔至末。不撤一劑。而得收功。當危疑時。議論紛紛。有云平昔斷喪。腎虛而故腰痛者。有云稟氣素薄。而故神情昏倦者。有云從來肥甘不能入口。而胃弱者。有云如此稠密氣血有限。何能當此蕩滌者。有云痘瘡何曾有此治法。深以爲怪誕者。非復翁明。時局專信任。亦何能奏效。

又

銓部錢孺翁老先生一愛平時內熱。瘦骨如柴。乙未仲夏出痘。熱如炮熾。腹痛異常。身體不能轉側。口穢噴人。紫滯稠密。但不細碎。惟辛初朝。毒火雖惡。尙未有定位。以大黃四錢。石膏七錢。生地六錢。黃連一錢。佐以青皮山查荊芥葛根赤芍桃仁地丁紅花地龍臨服和豬尾膏蓋計。以一方服及六朝。色漸肥紅放白。腹痛稍緩。餘俱未減。仍用前方至九朝。漿甚克足。腹痛與熾熱較前尤甚。眠雖封而眼角流血。譫語不寐。飲食不思。前方增犀角倍加大黃生地石膏。減豬尾血。臨服以化毒丹。調入牛黃一分珠。末二分至十二朝。頭面發臭。方能進粥碗許。一日三次。腹痛與熾熱依然。至十八朝。而始跳脫。疏表達裡。涼血導瘀。清火驅毒。至始以至終。一方成之。是首尾疏達又一驗也。如此治驗。難以數紀。聊附一二以證其大畧耳。

痘有不宜疏達訣

痘有始終忌疏達。不第行漿收靨時。症犯氣虛難振作。發始須當預護持。痘賴氣

領方能透虛。更疏兮有何竇。毛竅况以氣爲衛。衛已疏洩何堪。再縱有客感謂傷氣。非若表實傷風例。疏邪還宜兼實。竟爾疏邪焉得起。氣能克塞令毒暢。氣虛裏實。猶希旺藉令通達。混同施。裏若虧兮損何地。即有停滯謂傷脾。非若脾強傷食例。消食毋使脾受虧。脾氣虛虧痘必危。莫謂放標功有待。始之不謹終何賴。

### 附治驗

無奇姚兄。幼時於壬戌之秋。忽一夜吐瀉三十餘次。口不能合。兩目失神。絕不身熱。痘出蒼然。若不知何自而致。痘甚細密。而且一齊湧出。僅得分珠。却無空隙之地。顆粒固滿。却似水珠。有頂無盤。乃劇虛寒劇之症。與逆相去幾希矣。症象固危。所希異者。氣血尙未離散。及早圖之。或可挽回。疏表達裡之劑。一不相及。初朝即用保元蕩。加白木木香當歸熟地訶子如是之劑。服至六朝。僅得中守而已。倍加參茸。外用鹿茸肉桂至八九朝。身得溫煖。窠囊覺厚。漿水及半。但不蒼老前方減。鹿茸肉桂訶子。加白芍茯苓金銀花。神目開爽。乳食大進。而回痲終軟薄。可見虛劇。

之症。首尾溫補。尙不滿其分量。其可循規則。而疏達也乎。第今無是症矣。  
救偏瑣言卷之四

放點症治準

痘未見點。豫卜其爲吉爲凶。惟於神情症象而求之。脉理而參之。然非極美極惡者。未易鏡其將來也。放點則有形可察。有色可詳。順逆險二途。昭然而覩矣。蓋形成於氣。色根呼血。氣正則拘領其毒。毒有所拘。痘雖密而得定其位。不糊糝。不細碎。顆粒分明。而脚必周淨。毒有所領。毒易達於外。痘雖密。頂綻突而囊蒼老。此氣得其正。而形其無間也。血正則榮載其毒。毒有所載。痘雖密而能安其位。根有盤助。囊厚其藏而饒涵泳。毒受其榮。痘不燥瀆。形雖密。淡而不白。紅而不嬌。此血得其正。而色其無咎也。反此則氣血反受毒制可知。有表裡俱虛。而出不快者。有表裡俱實。而毒壅滯者。有氣血虛餒。皮薄而色白者。有毒火熾盛。形惡而色惡者。千形萬態。總由此出。詳別證治於後。

放點於熱三日後。身涼神爽。顆粒鬆朗。淡紅蒼老。其餘可知爲順。不必服藥。放點熱不一日。烈熱乾炮帶火而出。不論稀密。色一紫艷。或嫩紅。其他可知。此梟毒烈火。及早圖之。不致日後。內潰急以攻毒清火。帶清肌透發。不可以初見而奮忽也。放點有身不見熱。神情困倦。偶因四旁痘氣相感而出。見痘色淡皮薄。此腠裡不密。肌肉不固。不能約束而然也。不宜疏散。仿日後有痒癢之患。以調中湯主之。放點有先因吐瀉困倦。頭溫足冷。適感時行而出。色淡囊薄。而掩滯不起者。此氣虛不振。不能透發。宜以升發中。即兼治本。免日後有倒陷之患。放點有熱如火熾。紫艷嫩紅。神情躁亂。累日不起者。急宜攻毒涼血清火。疏肌以透之。放點有僅數粒。色不甚紅。亦有甚白。身體溫和。神情清爽。不諳者目之爲順。不知其囊窠。累日不見粗壯。痘色不見光肥。浮沈其間。名爲等件痘。先見數點者。報痘也。四五日後。身必忽然大熱。神即昏憤。大隊梟毒。一時湧出。其痘稠密紫黯。大都不起。明者。即與挑破。吮鬆其毒。以藥胭脂貼之。內服豬尾膏。通天散。活血疏

透來勢猖狂。法必蕩滌庶可救。放點有毒火雄烈。氣血不能約束。一齊湧出火熱如焚。急宜攻毒涼血清火。放點熱猶火灼。乾燥如烟神情躁亂。不論稀稠。急宜攻毒。涼血清肌散火。緩則毒即內攻。無及矣。放點痘色乾滯礬紅。身宜壯熱。而反涼者。以毒火遏鬱于內。非真涼也。急宜散火疏肌活血透發。俟火透而後清涼。不宜遽與清火。放點痘甚稀疎却間。蚤癩或間紫黯。有若紫背浮萍。或犯貫珠堆簇神情愁悶。及諸般痛楚之類。多因惡毒盤據于內。表裡故不相符。不可因其稀而致忽也。卽當攻其伏毒。鬆肌活血。放點有唇烈嫩腫。甚有焦黑如煤。或口中穢氣不堪。或舌起芒刺。此毒火犯胃。急宜重以清火涼血解毒。重必攻之。放點皮毛刺痛。衣衾苦動。此毒壅于肺。急宜重以攻毒。鬆肌透發。失治。至行漿時。膿根不起。必至燥痒而斃。放點筋抽脉惕。叫喊不已者。此伏毒在肝。宜疏肝毒。重必宜攻。有咬牙者亦如之。放點譫語狂煩。如見鬼祟。此毒火迷心。宜涼血清火。兼之身熱。如烙或諸般痛楚者。尤宜攻毒。放點骨節煩疼。更有腰如被杖。此

毒在於腎。大都不起。攻毒刻不容緩。放點睥毛例豎。目胞下有血絲。如線絆於其處。或腹痛不已。身熱如火。肢冷如水。此毒伏於脾。急宜攻毒。兼清肌透發。放點小水有如醃魚汁。有鮮血如紅花膏。此毒火下注小腸。急宜攻毒涼血。鼻衄成流者亦然。放點大便欲解不解。或解時疾首蹙額。所解如漆如膠。有若瘀血。有若羊糞者。此毒注大腸。急宜攻毒。因勢而利導之。放點大便暴注如傾。有純解清水而躁亂者。此火擾大腸宜分理。涼大腸五臟伏火伏毒。惟下利稍輕。以大腸爲傳送之地。雖壅滯艱塞。終得因勢利導。放點顆粒稀疎。囊窠飽滿。而色有礬紅。有紫艷有晦色。此毒火在於血分也。宜解血分之毒。清血中之火。放點有歸附甚厚而囊窠不鬆。或平或陷。此血至而氣不至也。宜寬氣道。鬆肌疏透。兼他症凶暴者必下之。放點有郭殼圓滿。而盤助乾滯。此氣至而血不至也。宜清榮活血。兼他症猖狂者必攻之。放點有外感未愈。或風或寒。或風熱。或輕。或重。有累日不起。有起而不快。此爲表實。審其何邪而疏解之。令毒有出路。放點有飲食

未消。中宮阻塞。口中噤腐酸臭。腹內飽悶。痘出不快者。是爲裡實。急宜消化。令得宣暢。放點證治之大畧也。由此而推之。其餘可概矣。

稀有內症

痘欲其稀。稀則毒輕。不知稀而有內症。非真稀也。透於外。其毒則爲痘。藏於中。其或則見症。或躁亂。或痛楚。或乾臨。或昏迷。或失血。或叫喊。或洞瀉。或艱塞。或大渴不已。或脈惕筋抽。或咬牙弄舌。內症甚多。類此是也。無論氣血不足。即使有餘。亦爲毒所錮閉。而陷於無用。於囊窠不能鬆綻。痘色不能紅活。非血鬱而白。卽乾紅而滯。或紫艷。或深紅。或間癢。點唇黑如煤。頂黯如焮。非壯熱如炮。卽身涼而躁。痘卽可以數紀。亦何貴其稀也。儘有頂綻如珠。光明潤澤。一犯內症。便非真稀明者。燭其故。隨其症之所至。或宜疏。或宜達。或宜清火。或宜攻毒。或宜破瘀。或宜透發。乘毒未張大。及早圖之。容可保全生命矣。

總

外稀尤貴內安和 內不安和稀用何

訣 重必內攻輕內擾 蚤圖猶得幸無疔

附一忽視之戒

逢仲老先生。先朝時有一公郎痘止八十三顆。道中始事者。以痘甚稀。僅以輕緩之劑。按日期規則以治之。十六朝。咸以爲功成矣。延至廿六朝。逢老意中未能釋然。予適雉城歸。邀子往視。但見兩目徬徨。如臨白刃。乾嘔不止。愁楚非常。陰囊兩傍。俱有一小毒。如桃核大。隱於肌肉之下。色且黑黯。此餘毒悶焉者也。予辭弗藥。是晚卽斃。

又治驗

一友徐君一愛。未及半週。而痘甚稀。頗紅活。宛然一順症。惟身熱如火。至漿後躁亂。不寧。霎時收斂。而紅暈癩赤。痲甚焦燥。腰間與環跳處。發出兩癩。加掌大。板硬如石。掀腫如拳。其餘小疔。不許其數。痛楚甚慘。以必勝湯。日服二劑。外以胭脂調入化毒丹貼之。十朝至十六朝。以一方治之。疔漸起漸退。二癩潰而成膿。後以忍

冬解毒湯。加地丁當歸調治收功。

又

一范氏女三歲。痘可以數紀。而且綻突如珠。紅潤可觀。據痘似可弗藥。究其烈熱如炮。晝夜叫喊不已。左目焮腫如桃。以大黃生地荆芥甘菊赤芍黃連木通地丁青皮。自三朝服及十四朝始得身涼體靜回好。目亦無恙。如是之痘不能枚舉。聊紀一二以驗大略云爾。

密有充肥

痘畏有密。密則毒盛。不知密得充肥。其毒雖盛而氣血頗饒。氣血雖饒而或陷害於毒。亦何能透發於外。而覩其充肥。今充肥則氣血不爲毒害。可知充肥則氣血又得以制其毒。而化毒。又可知其毒雖盛。何畏焉。外有熱熾如火。或絳紅。或紫艷。或煩躁。痘雖充肥。毒亦猛烈。較之深藏隱伏者。彼得發見於外耳。又不得概以充肥而目之也。

總 毒無壅滯痘充肥 痘得充肥正有餘

訣 更得淡紅滋潤色 縱然稠密莫躊躇

附治驗

雉城臧璽老銓部。明遠公之子也。幼時出痘於壬戌甚密而得充肥。公以稠密憂虞。余曰痘雖密。窠粒綻突。色不乾滯。慮不在此。所可虞者。近於紫艷。身體太熱耳。以清熱解毒湯。日進二劑。五朝大解一次。餘無別症。未思飲食。次日而漿即老。紅暈熾赤。大便又三日不解。恐其成火褐症。謂主翁曰。急宜潤其大便。使毒以利鬆爲妙。成一火褐餘毒大重矣。前方重以生地滑石兩許。更加黃芩。藥未及熟。而燥痒卽發。舉家徬徨。急服之。更餘解黑糞極臭極硬。即爽快熟睡。紅盤漸淡。漸收。飲食大進。以忍冬解毒湯調治而愈。

陷有毒滯

氣不能充。則頂陷。陷則虛無疑矣。然必皮薄色淡。方合虛局。若囊厚色蒼。氣之本

體已具。未有氣虛而囊不薄。色不嫩者也。以氣爲壯火所蝕。壅遏不能上達。以故陷而不滿。不惟囊厚而且臃腫。不惟色老而且乾滯。尙有別症可參。與虛陷自是迥別。每見時師不審其由。一見頂陷。便爲氣虛。亦不識根脚之如何爲斂。如何爲癢。如何爲根鬆。如何爲毒絆。因其頂陷。連脚亦混言之曰。此痘脚癢頂陷。並血亦牽在其中。則曰氣血兩虛。必須大補。貿貿焉。竟以參茸保元固本。以實投實。致誤者。不可勝紀矣。悲夫。

總

痘瘡頂陷若菜萸

囊老乾紅豈是虛

訣

氣因毒滯無能峻

毒得鬆兮氣自尊

附治驗

竹溪沈公漸兄。四公郎二歲時痘。熱不二日放標。於足脛。歪斜闊大。如螺磨堅貼皮肉。週身細密無空隙。欠日蘆沙疊錢。問於通身。惡形不計其數。且痘色與肉色一般。肌膚板實無粒不陷。叫哭不已。脉惕筋抽。是毒滯血鬱之痘也。與逆之相去

間不一寸矣。以必勝湯。減桃仁生地加當歸。日進二劑。不見起發。乳不及半。大便去五六次。大桑蟲日以四枚。六朝稍起而未鬆。減蟬蛻葛根加增大黃。大便日去十餘次。至八朝漸鬆漸紅。身漸熱。成粒者起綻。成塊者鬆泛如毬。始成膿。乳食大進。未得安睡。時或叫哭咬牙。悉炤前方十四朝。堆結如殼。痂亦滋潤。以忍冬解毒湯。加當歸調治全愈。

又

驥村錢公劉兄。乃弟。東白先生之幼子也。痘及七朝行漿期矣。通身頂陷紫滯。其環跳處。堆聚如燕窩。俱板實不鬆。眼與鼻若未痘者。然並其頭面俱板實。晝夜躁亂。始無寧刻。時常乾嘔。筋脉抽惕。此毒伏於內。氣壅血滯故耳。始其事者。謝絕去矣。余以大黃四錢。紅花生地。蟬蛻牛旁地。丁荊芥。位參。青皮。黃連。外加白項地龍五條。服過三劑。大便日去三四次。痘稍有起勢。服及十劑。大便方去十五六次。所解皆是黑垢。如膠漆。臭惡無倫。通身頭面頓起脹。即時眼封且塞。而漿其沛然矣。

其環跳堆聚者。尙未鬆泛。仍以此方服。至次日十二朝。大解約去二十餘次。僅似清水。一老嫗驚惶而問曰。如此頻解。可無害乎。予答曰。痘今成膿。前躁亂。今安靜。皆便中來也。可許收功乎。予曰。必得環跳穴處。成漿結痂。飲食能進。便許無恙矣。至十四朝。醫上漿行且飽滿。胃氣頓開。大便即止。不假一分滋補。不假一分止塞。飲食日增。方以和解餘毒之劑而收功。

綻有囊薄

氣尊於中則綻。囊則氣似足然綻而不蒼。是空擡虛設也。綻何取焉。氣虛不能衛護。郭設隨毒而起。雖若圓滿而實飄薄。其色淡白。雖紅亦嫩。體必溫涼。人必懶倦。無論氣虛不實。其血亦自不足。不得曰其磊落而可喜也。其本質與嬌紅同體。薄似浮衣。症自迥別。乘氣血未至離散。及時早圖。未始不可以轉移也。不則必至痒癢而斃。

總

氣虛頂綻痘空囊

綻若囊空反不祥

訣 浮擡不實成何用 及早扶元免破傷

附治驗

雉城藏君陶兄。幼時出痘於庚申。甚稠密。甫及三朝。即起綻如珠。囊窠飄薄。歸附不厚。不甚安靜。身體微熱。四朝即用保元湯。加芎歸熟地。六朝漸漸肥紅。八朝囊漸蒼老。漿未及半。大便不實。而漿停重劑參芪。加川芎鹿茸膏木香白芷。漿得充足。後調理收功。

薄有浮衣

痘瘡皮薄。自是氣虛。蓋皮毛屬肺。肺主氣。痘之囊窠厚薄。頂綻頂陷。蒼老皺嫩。皆氣主之。未有皮薄而氣不虛者也。獨有浮衣。則不然。毒火猛烈衝突皮膚。其若皮隨其炮熾而起。如湯火炮燃之象。較之氣膚之薄。其薄更有甚焉者。孰知其本然囊窠。尚伏而未起毒火之清。本體自透。漸成蒼老。然果何以辨其爲浮衣也。其道一以貫之。氣虛之簿。其體自涼。其盤自淡。其神必倦。口不膩渴。大小便如常。諸凡

火象。自爾不犯。是爲眞薄。若盤暈。赤躁渴神煩。身熱如焚。或小便沁紅。大便閉結。或傾腸直注。不必一一。反是有一二千直。的確烈火無逃者。餘卽有似虛似寒。間乎其間。正其熱劇。隱伏之故。非雙關兩屬之症也。若以氣虛治。助其烈火。閉其毛竅。不得發洩。其外浮衣。勢必破碎。如乾豆皮。內囊肉色。燥赤如剝兔。並空隙之地。亦散漫游紅。煩躁擾亂。而莫可救藥矣。似是而非。不可不明辯也乎。

總

皮薄身涼屬氣虛

皮毛火逼起浮衣

訣

窠囊毒湧同於薄

一得清肌卽轉移

附治驗

後林潘中山兄。幼時痘症屬此。囊似天泡之薄。紅暈焮紫如霞。徹夜無眠。身熱如火。渠尊公宗老。在江右任所。內與乳母。深以毛薄爲不足。徬徨無主。予力辨其故而始信。卽用黃連犀角大劑生地。佐以荊芥丹皮蟬蛻牛旁。臨服調牛黃一分。自第二朝服至六朝。漸漸蒼老。散漫遊紅。亦漸歸附。根盤圓淨。頂白根紅。似以前方

服至九朝。膿漿滿足。前方如金銀花枝參。始終以涼血清火解毒。收功而愈。脫痲之後。尙多餘火。一路清解霍然。

又

予一鄉親年十七。勇力過人。忽一日身熱昏迷。週時即痘一齊湧出。稠密無空地。形與色宛似水珠。但根葉結卓。呼吸之氣甚雄。薄之非因虛也明矣。平昔勇力無論矣。其所以然者。氣與血均爲毒閉。兩不至之故也。以荆芥葛根赤芍紅花木通地丁紫草。重以青皮。外以山查二兩煎湯代水。日服三劑。次日頓然蒼老。第四日即頂白根紅。復用前方七朝漿足飽滿。其體原厚。緣爲毒過種種故爾。一開其肺。正氣勃然莫禦矣。兩痘浮衣則同。一爲火炮氣蝕。故壯熱遊紅。一爲毒湧血鬱。故昏迷色白。一涼血清火。一鬆毒活血。各究其致。遊紅者斂。色白者紅。囊窠均厚矣。

平扁與下鬆辨

何爲不鬆。板實而不暢滿也。何爲平扁。餒乏而不克拓也。其形若似。其致不同。一

屬于虛。一屬于實。然實亦有不同。一有可生。一有必斃。囊窠板實。氣爲毒滯。以故不能暢滿。若血猶歸附。受困惟在於氣。一治其毒。毒殺其勢。氣得以伸其轉運。血因以佐其流通。氣運血隨而痘自鬆。其可生者此耳。令氣血俱爲遏鬱者。囊固不鬆。根亦無暈。所謂痘色與肉色一般。此氣血俱不至之痘也。無可救藥。如身涼人靜。囊軟色淡。絕無乾燥壅滯之象。是謂平扁。由氣虛而不能峻頂也。早宜保元湯。倍用黃芪而振氣。內力得旺。而氣尊於中矣。虛實補瀉之界。不可以不明辨也。

總

毒滯囊窠謂不鬆 氣虛平扁莫能充

訣

不鬆形色無柔嫩 平扁何曾有板臃

附平扁治驗

烏程陳大尹乙巳歲一公孫。痘稠密乾紅。始任事者。有三人焉。先以升發後以涼解。五朝頂平。囊扁七朝。眼有開意。鼻將有息。三人辭陳侯而去。延先君以決生死。先君驗其頭溫足冷。非熱毒可知。而且身安體靜。毒已盡行于肌表。又可知。曰此

氣血虛餒。非毒滯不鬆之謂也。陳侯意中以爲必斃。問先君曰。先生可挽回萬一乎。先君答曰。痘瘡放點以至落痂。一以氣血終始其功。氣血克達。則得以領毒而起脹。氣血鼓盪。則得以化毒而成漿。氣血還源。則得以解毒而落靨。今痘不起脹。猶之更籌一般。籌得依刻而起。非籌自起也。必需漏水下壺。更籌得起。論及於此。陳侯大悅。先君以參五錢。芫八錢。鹿茸膏半盞。佐以芎歸淮熟地。少加肉桂。連投二劑。而痘即起脹如珠。再二劑。而漿即充滿。後以參歸化毒湯。收功而愈。是症不概見矣。

### 不鬆治驗

孝廉王遇老。一小公郎。甫三歲。痘在五朝。通身稠密。全不起脹。人不狂躁。熱亦不甚。有似餒而不充。余按其皮肉。則板探其口內如脂。而多乾嘔。則知其毒壅于內外。故不能起。非氣虛不振之論也。以大黃爲君。佐以疏表活血之劑。至臨服時。復持疑而問曰。毒滯攻之固其宜矣。萬一精神亦從而蕩焉。奈何。余曰。妄投則然。對

症不惟不損。正以護精神之地也。二劑服後便有起勢。乾嘔減半。而身反熱矣。是毒透達之象也。前方加黃連生地。服至十二朝後。以忍冬解毒湯而愈。

又

春元馮孝老。一小愛三歲。痘甚密。八朝絕不起脹。頂陷色滯。筋抽脉惕。日夜不寧。頻頻乾嘔。大便日去二三次。宛似一內虛平扁之症。始事者謝絕去矣。舉家哀號待斃。余視之頂雖陷而板實。色雖不榮而紫黯。未有內虛而形板實者也。而况紫黯其色乎。至于種種見症。皆毒火發洩無門之象。余以大黃青皮山查達其裡。荆芥牛旁桑蟲疏其表。紅花桃仁赤芍猪尾膏。以導其瘀。黃連石膏生地以清火涼血。二劑稍有轉機。又二劑更用化毒丹調入牛黃珠末。以化毒清火。大便日去十餘次。多而且暢。穢垢般般頂即起盤即潤。漿亦迅速。餘症未能跳脫。首尾一方。至二十朝而始霍然收功。

氣拘與毒絆辨

上文平扁與不鬆。指痘之窠囊而言。此拘與絆。指痘之根脚而言也。根主盤暈而屬血。血隨氣以爲通塞。氣得其令則毒受制於氣。氣能以蓄血定位。拘斂其根。不使旁溢。盤暈能圓。壯而紅潤。是氣交則圓必周淨之謂也。是爲氣拘。若氣失其令。受制於毒。氣爲毒錮。窠囊固不得鬆。而盤亦緊束如籬。按之結硬則根無盤暈矣。是痘神情大都躁亂。而體則不熱者。此屬不治。所謂陽毒易治。陰毒難理。是症無治驗。

總

毒絆根窠似氣拘 氣拘盤蓄痘充肥

訣

絆其緊束根堅硬 并亦無盤淚必揮

嬌紅非血熱辨

紅者。血之體也。血因火動而呈其色也。痘不遇火。雖紅必淡。紅則爲火迫矣。故古人有言曰。紅屬血熱。良有以也。蓋指紅深者而言。非所云嬌也。嬌則氣固不足。連血亦虛無幾之血。爲無根之火。遊行於皮膚間。故雖紅而實嬌。口必不膩。熱必不

壯。巢囊不能厚。日後必至敗於痒癩。其痘最惡。所以謂紅而嫩。不若白而老。嫩者。嬌之謂也。

總 痘令深紅是火炎 水紅榴子又虛看

訣 血虛氣弱嬌何嫩 皮薄漿清痒必纏

附治驗

戊午一沈氏子。痘密而紅。色嫩而薄。身不甚熱。察其神情內症。絕無隱伏深藏之毒。先以疏透。四朝而囊窠悉起。即以參芪芎歸淮熟地甘草山查日進二劑。七朝漸蒼次日漿行。十朝漿頗膩而不能老。寢食亦安。減血藥加白木山藥茯苓金銀花調治收功。自甲子以來。是症百無其一矣。

血鬱非氣虛辨

自屬氣虛。自古言之。何以既白矣。而云非虛也。蓋血著於外則紅。鬱于內則白。血受毒鬱。則血不能灌輸于痘。而潛伏于內。所謂血不至之痘也。然其空隙之地。必

有硃砂癍點雜于其中。即未必其然。或有數點紫滯乾紅。而露其朕兆者。即痘無可憑。或神情躁亂。唇口焦裂。渴膩如脂。或嘔血溺血。舌弄如蛇之類。色雖隱伏。端倪自見。若以氣虛治。投于丁香姜桂之屬。不俄頃而徧體焦紫矣。

總

毒壅血鬱不流通

血上難呈載毒功

訣

白即似虛機自露

細心參合掩何從

附治驗

孝廉王含叔三歲一愛。痘方見點。即便咬牙。周身痘色俱白。宛似氣虛。探其口膩如脂。背上有三四點。紫黯乾紅者。微露其端。則知其鬪牙者。肝腎之毒火也。色白者。血爲毒鬱而然也。以活血散火疏肌透發之劑。痘色漸紅。但紅而不潤。顆粒不鬆。頻頻鬱嘔。夜不成寐。三朝用黃連生地丹皮牛旁荊芥木通紅花青皮蟬蛻山查。臨服和豬尾膏半盞。日進二服。色頓礬紅而未活。唇口漸黑如煤。前方倍用黃連生地加滑石地丁。外以牛黃七厘。并豬尾膏。服至七朝。色方紅潤。頭面放白。乾

嘔減半。大便日去四五次。十朝漿亦堪回。唇殼已脫。照前方至十二朝唇復焦黑。痂老而燥。仍復咬牙。大便日解十餘次。絕不思食。前方大劑生地加石膏日進二服。牛黃每服一分。珠末二分。豬尾膏亦如前。至十五朝。鐵嘴復退。終不思食。大便約去三十餘度。痂落八九。四肢強直。仰臥如尸。十六朝唇口又黑。咬牙比前更甚。大便無度。俱如膠漆。或如藥汁。點乳不進。以蓮肉紅棗扁豆煮膿汁。灌入其口。嚥下。而此汁即出如漏。乳母以寒藥太過。脾氣損傷如此。皆有怨言。主人明理。謂此藥不投。何能起發。以至落痂。第痂已落。何復如此。叩余之故。予曰痘貴乎。終以餘毒脫卸之難也。若餘毒內攻。事已去矣。餘毒得透。可無虞矣。其餘毒必結於大腸。而故暴利如傾。又結於肝。而故咬牙不已。不則何以唇口猶如乾漆。三退而三結也。必得內毒成熟。有膿血便出。方可保全。然得精神有三四日可支。內毒一二日可熟便妙。是日十八朝矣。以牛黃七分。珠末一錢四分爲兩服密汁調下。傍晚解紫血甚多。逾時夾膿夾血倍于初次。卽睡去。至夜便尋乳食。咬牙頓止。唇口鬆退。

神卽蘇爽。至天明。解一硬黑糞如石。大便五日不解。乳食大進。收功而愈。

救偏瑣言卷之五

起脹證治準

痘之根透則爲起。囊綻則爲脹。起居先而脹繼之者也。痘初放點其粒如菽。遞及五朝前後表裏得以無邪。痘瘡不至偏陷。縱步而出。根透囊綻。菽而至於如荳。是謂起脹毒其盡行於肌表矣。以毒達其外。痘故得以起脹也。其象眼封鼻塞。氣尊血附。頂白根紅。白而粗肥。紅而能淡。光壯如珠。身體溫和。神情氣爽。飲食二便如常。是起脹之順者也。不須服藥。起脹時若表邪未盡。致毒不能盡行肌表。向來痰唾稠粘。或鼻流清涕。或面赤多淚。或面青聲重。或翁翁發熱。或浙浙惡寒。或毫竅直豎。至此猶未霍然。痘必未能起脹。仍必疎肌達表。而兼升發。古人言一見紅點。便忌升麻乾葛不可拘也。起脹時若有宿食未消。致毒阻塞於內。向來胸膈不寬。按之眉愁。口中噁腐酸臭。轉矢氣極臭。至此猶未跳脫。痘必應至不至。仍以

寬中化食而兼升發。古人言治雜症一寸。痘子落後一丈。不可訓也。起脹時。表裏無邪。雖無阻礙。氣虛血弱。痘雖起脹而少光壯。淡白而不蒼老。眼不甚封。鼻不甚塞。脚雖不塌。頂不能綻。體靜溫和者。稍稍解毒中。即當漸補氣血。溫中保脾。如保元湯。加芎歸木香姜蠶白芷山查。量用解毒一二味。以豫防漿後泄瀉倒陷之患。起脹時。有氣血虛劇。不惟溫而且冷。不但靜而且倦。不惟白而更嫩。不但不老而且皺薄。頂陷而兼脚癢。重語聲輕。眼不能封。鼻不能塞。淹淹不振。而不起脹者。即當大劑。保元湯加芎歸鹿茸。以峻補氣血。或丁香桂附以振作元陽。參芪太重。必須濟以山查。以此味能行參芪之滯。不減參芪之力。此用藥相濟之法。不可不知。桂附量視緩急。參芪鹿茸。遲則殆無及矣。此偏於不及者。大畧治法也。起脹時。至若毒火猛烈。更有伏火伏毒。鬱於皮毛。痛如膚剝。衣衾難動。期雖起脹。竟累日壅遏者。有毒參陽位。面目焮腫而痘不腫者。有毒滯於頂。根起而囊不鬆者。有一身之內通塞不均。衝突處則重頂。甚則湧泡。遏鬱處。或平或陷。甚至連顆囊。

亦板實者。亦有窠粒周圍貼抱一圍狀如珠殼者。有毒擁皮肉痘雖粗大。板而平者。此等梟毒在於氣分不拘痘色紅與白。紫與黯。必用蕩滌之劑。佐以青皮赤芍。荆芥牛旁木通蟬蛻。用山查兩許煎湯代水以治之。重以桑蟲透發。庶氣不爲毒。錮氣得以暢達而痘起脹矣。古人言氣不可虧。不可法也。起脹時。有諸痘未漿。并有未及放白。數點先已黃熟者。有半爲熱毒燔灼。半爲伏毒錮閉。一則鋪紅肆溢。一則痘若水珠者。有通身或紫黯。或紫艷或焮紅。或礬色。或間硃砂斑點。或紫背浮萍。或失血空竅者。此等熱毒在於血分。不拘痘之日期。亦必以蕩滌爲主。佐以桃仁赤芍紫草地丁丹皮荆芥木通豬尾膏地龍以散其凝結之毒。庶血不爲毒瘀。得以通達。而痘自起脹矣。古人言補血之功難。須當養子平素之說。不可泥也。假令毒火發見於外熱如火熾。煩渴不已。口熱如爐。不拘在氣在血。均以石膏芩連犀角。或四聖散金汁等類。以制其陽光烈火。庶氣血兩不受炙。痘其得以起脹而榮潤矣。古人言疹愛清涼。痘要溫。不得以此痘律也。起脹時。有

根起而囊少脹。起脹而或少充。充而色或少潤。潤而熱有未和。是毒火未得宣暢。概以疎透清解。固無事於蕩滌。亦不必過以寒涼。尤不宜妄用辛熱。亦不當便用溫補。但以連翹牛旁生地丹皮紅花山查甘草荊芥穗之類。稍以白芷姜蠶桑蟲占米以催漿拓頂。火雖不熾。清之則熱得以和平。色得以滋潤。行漿而漿得以洋溢。毒雖不盛。解之則囊得以鬆泛。毒得以化漿。至收結而不爲餘毒。纏擾清解之法。常規原以此期。痘至五六日大都起脹。起脹則毒在外。毒既在外。而清之解之。則毒無寒凝之慮。痘方起脹則漿未及行而裏未虛。乘未虛而清之解之。則痘無內虛倒陷之患。而孰知過與下及不可以常理論也歟。

### 攻毒總訣

問痘如何有用攻。伏毒伏火豈堪容。毒火鬆透稠無害。毒火深藏稀亦凶。細究神情暨見症。察形驗色皎如星。上焦衝突如泉噴。舌刺唇焦與炙同。下迫小腸溲是血。大腸逼迫苦難禁。拂鬱皮毛痛似剝。啼號不已虐中宮。胸堂壅遏燥如噴。日

夜無眠擾不寧。痰一因之迷上竅。氣雄煩悶叩無聲。靜不靜兮燥不燥。愁容可掬  
畏人親。骨節煩疼腰似杖。筋抽脉惕狀如驚。徧體炎。炎駭熱深。更呀四體有如  
水。通身汗湧令人畏。尤怪身焦首似蒸。毒湧肌肉周身板。嗽腫如吹痘却平。擁突  
如桃名瘡瘡。痘瘡未見毒先行。痘未脹時而預腫。額顙本起眼先封。赤眼胞不  
遠紅絲。倒豎睫毛人未知。徧軀晦滯如蒙垢。口舌無皮穢氣噴。兩頰嗽紅無點粒。  
發始牙爭舌不寧。報點歪斜黑陷硬。一齊湧出細如針。紫背浮萍痲似蚤。犯一稀  
稠總不論。貫珠攢簇又堪嗟。蟹爪遊蠶齏上沙。燕蟻二窩并鳥跡。疊錢鼠跡及  
螺疔。雁行珠殼蛇皮類。履底環珠總象形。其在部位亦多名。覆釜蒙頭兩截分。  
鎖項纏腰雙鎖口。托腮攢背與攢胸。披肩囊腹咽關屬。抱鬢蒙骹及鎖唇。鱗坐囊  
毳暨抱膝。隨地逢之莫覩輕。色有紫艷有深紅。紫滯乾紅又不同。紫類雞冠花  
是艷。深其無異絳桃紅。滯色猶如花木筆。乾如紙色有礬紅。若此青蓮滯更惡。椒  
皮乾色惡無倫。有頂平。平若烙炮。有頂如煤類火燒。有頂陷下根紅腫。有頂尖

圓色紫焦。痘色頗佳。多惡症。痘稀色白。見雄標。飛漿迭見。黃如蠟。發泡看來似掌桃。有白有紫有色黑。或粗或細。毒成梟。那般痘色。那般形。見症神情。總毒伏。毒伏於內。血受瘀。毒伏於內。氣受錮。氣輕本受氣血制。慘彼氣血。亦歸毒。是痘生成必。內潰。除却蕩滌無生路。縱使不能一一蘇。舍此于中無一復。前人列於不治條。後人糊糗傍矩矱。亦有識者謂實病。懊歎嬰兒是天命。天假千慮之一得。殺身惡毒容稍滅。惡毒驅兮氣血暢。氣血融通痘自放。氣領血載功自全。頂白根紅自光壯。即使貫珠堆聚類。亦得鬆擡無敢抗。氣煦血化漿自成。不藉參茸保元神。成痲落。歷無侵蝕。胃自開強脾自實。此痘不拘兒厚薄。不拘未痘先病弱。不拘眼下便已瀉。不因眼下便閉結。不拘成漿宜保脾。不拘痘後須調理。尋常之法。治尋常。不可將來抵惡酌。梟毒不驅是縱虎。驅之不盡防竊發。若使反以補爲良。可歎適以竇盜糧。有慮兒虛且傍穩。坐視葡萄將入井。從來有病則病受。始終細細宜詳究。犯此尤當及早圖。更須絕頂方駐足。但憑漿後胃日強。夜臥日高猶未足。落痲體

快與身涼。喉口歡容無稍楚。方是梟鳥盡無餘。纔得修文偃却武。

### 申明鼻衄

痘瘡鼻衄與雜症鼻衄不同。雜症不過迫於肺經浮遊之火。清之立解。縱有爲積熱所致。勢亦猖獗者有之。要無內潰之慘。痘乃先天毒火。不衄則已。衄則烈毒內亂。五臟沸騰。致血妄行空竅。點點皆毒血也。非等閒邪火可例。勢必蕩滌而佐以涼解。庶可治其虐燄。不則毒血內瘀。毒瘀於內。其有不潰者乎。內至於潰。其有得生者乎。若僅以犀角地黃之劑而希止之。是猶揚湯點沸。非鍋底抽薪之法也。是症甚多。以下附毒之驗。總難筆記各附其一。以證其概。

### 附一治驗

余一孫女。四歲戊子暮春。一晚大熱如泡。燥亂不寧。不逾時而衄如注。血紫成條。有意亂心慌之象。是夜即以涼血攻毒飲。減紅花紫草加石膏。佐參地丁。連投三劑。次日午刻見痘。不紅不紫。如晦色椒皮。窠矣不起。第二朝衄止。熱亦減半。叫喊

不已。燥亂如初。暫減石膏。用大桑蛀同猪尾膏蓋許。和於藥內。日服二大劑。服及七朝。漸起漸紅。大便日去七八次。九朝漿行。漸入佳境。藥餌遂懈。十朝晚身復大熱。叫喊仍不絕口。滿面搔破。猶幸鮮血淋漓。急用胭脂調入化毒丹貼之。前方重以大黃五錢。生地石膏俱兩餘。三劑後。十三朝始定。收結而痂肖燥。寢食僅得其半。以忍冬解毒湯。減紅花。加大黃生地十六朝收功。

### 申明舌刺咽乾

舌胎如刺咽乾如炙。傷寒雜症見之。亦陽盛陰虧之象。然扶陰抑陽。其厄可解。痘瘡若見總。以烈毒肆虐。非僅燔炙而已也。輕則乾焦。重則焦黑。亦必潰而後已。總係咽喉之毒。所以咽啞水噎。並爲逆症。舌刺如煤者不治。欲解其圍。非蕩滌不可。即使攻之。亦必早圖。乃克有濟。不當目之於泛常也。

### 附一治驗

徽州程季老。一公郎三歲。丙戌殘冬。一日大熱煩渴。口熱如爐。舌胎即芒刺而黑。

則其咽乾可知見點於肌肉之間。隱隱若麻。乾紅晦滯。彷彿乎逆。幸在初朝。以清涼攻毒飲。加蜜炙麻黃二分。以隆冬也。減犀角二劑。細碎者悉退。顆粒分明。又二劑。色亦稍轉。四朝淚流如膽汁。唇漸堆結如煤。謂之鐵嘴。大便晝夜約去十餘次。一方服至六朝起脹。八朝行漿。胃氣未開。神情未快。十二朝鐵嘴鬆褪。寢食漸安。首尾一方。收結成痂。以忍冬解毒湯。至十六朝收功。

### 申明溺血

痘瘡失血。列於不治。總以列毒內攻也。况出自小腸乎。故五淋惟血尤重。痘瘡犯此可知。涼血清毒。固是症之首務。而無斬關之劑。以驅逐之。縱極清極涼。僅足以緩其流。難以澄其源也。

### 附一治驗

七里溫廣心兄大公郎八歲。出痘於乙酉仲冬。值久瘧後。精神疲敝。飲食不思。痘卒溺血如膏。胸膈閉悶。唇黑如煤。舌胎如刺。兩頰不分界地。天庭明朗。身上稠密。

乾紅。腹更有紫背浮萍癩點如是毒火。身反不熱。內鬱故也。以涼血攻毒飲。大黃爲君加桃仁每劑和大桑蟲。日服二大劑。五朝未見轉機。前方倍大黃五錢。生地兩許。七朝兩頰鬆透。紅活成顆身體大熱。餘痘亦俱紅潤。腹癰漸淡。前方減葛根蟬蛻紫草紅花桑蛀加黃連石膏。每服調牛黃化毒丹一錢。日進二服。十朝癢足。腹癰悉退。胃氣頓開。十二朝唇設腮脫。舌竟紅活。頭面堆砂收結。身上氣足血收。寤寐俱安。前方減大黃。黃連石膏桃仁加金銀花貝母。攻伐之劑止。一劑不及。便不思食。神情仍復不快。痘即停止。予駭其故。豈攻之太過而真元不繼耶。抑功力未足。而毒火亦發也。猛省其故。失檢其溺。取視猶然。使內邪淨盡。小腸何猶乃爾也。悉如前法。連進二劑。諸象速轉捷於影響。服及十八朝。而溺始淡黃其色。以忍冬解毒湯始得收功。

申明大腸逼迫

大腸爲傳送之官。通利易。結實難。故大便之實與瀉中氣之虛實因之。所以古人

治痘用木香異功散。以豫防其滑瀉。而孰知梟毒深藏之痘。不爲氣領。不爲血載。表裏壅塞。發洩無門。因有傳送之隙可乘。毒其騰湧於此矣。腸既毒湧。下注逼迫。自欲解而仍不得解。誠能因勢而利導之。俾毒得以宣暢。則氣血融通而痘其發皇矣。

### 附一治驗

孺山鍾晉叔兄。七歲一公郎。甲戌出痘。未見點時。腰腹條爾疼痛。至欲解更甚。及解。逼迫異常。急不能待。面卒不能解。因艱塞而努力。因努力而愈艱塞。不惟不得解。努力之極。氣反上湧。而面顏俱變。俄頃而惡象復然。此毒深藏於脾腎也。以必勝湯去生地。連投二劑。身體壯熱。見點稠密不鬆。乾紅色滯。痘與皮肉。按之俱板。氣壅煩悶。身無安放。前方服及四朝。大便秘見毒垢。如漆如膠。紫黯其色。前方加黃連石膏生地服及七朝。頭面掀腫如毬。周身四體脹滿如吹。有如氣鼓。目之可駭。所幸痘亦得脹。十二朝漿行。十四朝漿斂。悉以一方主之。大黃用及卅餘。大便日

止一次。口內成疔。目睛起暈。身熱未和。以撥雲散。合忍冬解毒湯。調牛黃珍珠服。至十七朝。所進僅止。稀糊所存。惟有皮骨。與參湯數匙。口即乾膩。嗣後弗藥。惟以牛黃珠末。日服二分。佐以吹藥。疔與暈漸愈。飲食漸進。月餘後。肌肉生長。精神康復。次年患一悶痧。不及進藥而斃。惜哉。

### 申明拂鬱皮毛

痘未分布。而毒先湧發如癩者。名爲疙瘡塊。痘未及乎肌肉。而毒之鋒穎。先射乎皮毛。謂之穎毒。稍一撻之。痛如膚剝者是也。此不早圖。任其肆虐。七八朝必至燥痒。外剝而斃。毒之最惡者也。

### 附一治驗

復初黃憲副八公郎。癸酉孟春。一日身體燥熱。肉瞶筋惕。兩目昏沉。痘之象也。愁容萬狀。稍動其衣被。痛楚等於剝膚。是穎毒鬱于皮膚也。卽用必勝湯。減桃仁。加枳梗。用大黃四錢。連進二劑。痛不稍減。照前方大黃六錢。又二劑。透出一身紫滯。

乾紅。綿密無縫。痛始減半。大熱如火。前方加黃連石膏減葛根服二劑。顆粒分明。六朝充肥。九朝漿勢沛然。因痘象可觀。藥即懈弛。次日燥痒難禁。頭面搔破。血流滿面。猶幸急以藥胭脂貼之。悉於前方。外以牛黃二分。珠末四分。勻分三服。調于藥內。日進三頭汁。次日復灌。十二朝堆沙漸收。腐爛作臭。冒氣日開。神情日爽。十六朝收功。用大黃筋餘。牛黃二錢。

### 申明啼號不已

啼哭嬰兒之常態。至于不已。非煩熱所致。即痛之使然。而可慮矣。聲必急驟。面必愁容。與常態自是不同。即使煩熱痛楚。其因別症。如蛔結食積。瘡瘍癩毒等類。亦無事於蕩滌者。惟痘瘡犯此中藏伏毒。而內擾。擾則攻。攻則潰。所以叫喊不已者。不治。非不可救藥也。正不知有此治法耳。

### 附一治驗

余戊子一孫。壬辰初夏。一晚大熱如烙。叫喊不已。如蚓在灰。次早大小便去血。解

後稍緩。俄頃復然。急以必勝湯。如石膏連投二劑。日晡即見痘。窠粒不鬆。痘色紫黯。大解皆紫黑成片成條。散者成流。叫喊愈甚。照前方重以大黃生地石膏。晝夜三大劑。每劑和豬尾膏一大盞。并大桑蟲。服及七朝。色漸紅活。囊漸鬆透。終是叫喊不已。前方減乾葛蟬蛻。九朝放白。十一朝行漿。諸症減半。大便日去七八次。藥餌稍緩。仍復猖獗。更加燥痒。痘頂穿破若圈。喊不絕口。悉如前日。進三大劑。十四朝得有露色。十六朝叫喊復作。愁楚萬狀。便出紫黑。血片如蟄皮。散瘀血有一糞杓。即安睡。醒餘便思食。身熱始和。大便頓愈。溺猶血水。廿六朝夜半驟然躁亂。舌起一疔。以牛黃分半。珠末三分。密湯調服。以忍冬解毒湯。加大黃錢許。用地丁煎湯。服及廿八朝。舌疔即褪。月餘時得安痊。約用大黃二十兩。石膏生地俱二觔半。

申明胸堂壅遏日夜無眠

胸堂。乃上焦心肺之地。最輕清而邪不易犯者。然六淫惟火上炎而易及。干于心。則以火濟火。而神自不寧。干於肺則金被火燄。而躁自不覺。况此火更出于毒。病

不止于燔灼。輕則內擾眉宇不舒。重則內攻。如魚夫水。日夜無眠。所必至矣。輕則導赤可解。重則必需攻逐。不則養虎貽患。是症施于未見使痘。可以成顆。施于已見細碎。可以退去。凡猖獗之症。在三日後內已受攻無及矣。

### 附一治驗

一凌姓之兒。僅週歲。身體壯熱。躁亂不寧。如蚓在灰。痘未見而兩目昏眩。是痘象。知其毒壅上焦之故也。即以涼血攻毒。飲去生地紅花。加山查地丁。一劑而神即安。日晡見痘如麻。再二劑而細碎者潛消。朗朗分珠。其祖父稱謝不已。照方用生地紅花并大桑蟲。日進二服。以一方服至十二朝。順叙收功。此僅躁亂一項。更得治於未痘。故朝頭無甚風波。

### 申明痰迷上竅昏悶無聲

心之氣出于肺而爲聲。其竅若管箴焉。竅爲痰迷。痰因氣閉。氣因毒滯。毒氣瀰漫。痰迷心竅。蓋心爲神明之官。迷則神自不清。閉則聲自不出矣。詳其痘瘡皮肉壅

腫。紫滯焮紅。壯熱氣粗者方合是症。

附一治驗

孺山鍾去疑兄。年及二旬餘。一日府試歸見痘。昏沉不語。有疑其爲虛者。有云其爲勞者。五日矣。窠粒不鬆。盤暈焮赤。兩頰通紅。不分界地。且氣粗壯熱之極。此熱毒上湧。清氣阻塞。心竅爲痰所迷。虛勞何與焉。以涼血攻毒飲。減紅花蟬蛻。加貝母地丁。日投二劑。七朝界地漸分。痘漸鬆泛。神情猶然昏憤。前方減葛根。加石膏黃連。八朝始省人事。方知已之出痘。九朝而漿沛然。十二朝收結。遂弗藥而愈。俱以一方終始其功。

申明靜躁無定愁容可掬

凡靜則病退。躁則病進。至於似乎靜而卒不容安。似乎躁而若爲所禁。滿面愁容。凡所遇而憎惡焉。較之狂躁者更重。甚至有天柱傾倒。刻不能支者矣。痘瘡犯此。無論熱如泡烙。紫艷深紅。見其熱毒內擾。卽身體溫和痘色黯滯者。尤見其熱毒。

固閉。而故身無安放也。與氣虛困倦。自是霄壤。

### 附一治驗

一賀氏子四歲。出痘於仲春。滿目愁容。天柱不舉。神情躁而若倦。身不甚熱。痘點隱躍於皮膚。按之板實。板則非不振矣。且多遊蠶。不拘其數。其色乾滯而多白黯。黯則非眞白矣。且有椒色。間乎其中。溺血如膏。口穢若腐。則此天柱不舉。愁容厭倦。全是毒火內擾。而故情緒難支。以必勝湯。減桃仁紅花。稍加蜜炙麻黃一二分。和桑蟲一大枚。日投二劑。服及四朝。身漸熱。色漸紅。窠粒亦漸起。時當乾嘔。哈舌。前方加黃連。四劑。毒火湧發。驟熱如焚。盤若塗硃。天柱頓起。外加石膏。減乾葛麻黃。自七朝以至十朝。放白成漿。大便日去五六次。皆毒垢。愁容不轉。壯壯熱未和。飲食不進。十四朝。堆結發臭。飲食得進。諸症平康。惟溺血未止。十八朝。仍復壯熱。泛疤。口內成瘡。一方貫至念朝外。始得全愈。

### 申明骨節煩疼。腰如被杖。

痘瘡包孕。在於腎臟。腰者腎之候也。骨亦屬腎。此地若痛。是於發動之地。便即肆虐。烏能歷日期。待朝數而施功於次第也。縱有良法。苦不及施。猶之迅雷不及掩耳。所以腰如被杖者爲不治。惟於痘未見點萌芽甫動。得以卽挫其鋒。庶可挽回於萬一。若一見點本臟便壞。惟有待斃而已。若清溪章繼美之痘是一驗也。

又附一症

同袍李季老一幼弟。卒然腰痛。以及兩脇兩肩骨節皆疼。愁楚不堪。次日卽報點於左腰如豆大而色黯滯。又有數點。似痘非痘。隱躍於皮膚。而多晦色。按之板實。以必勝湯。四劑後窠粒稍起。而終不鬆晦色稍退。而未紅潤。續出者可以數紀。只是痛楚呻吟。晝夜不息。寢食俱廢。以一方服及八朝。畧鬆泛而得半漿。服過十二朝。痛楚方息。稍能寢食。將就收結而愈。是症幸痘稀疎。故得成功。而且易若一稠密。便如章繼美之歷盡艱難險阻矣。腎症之可畏也。如是夫。

申明筋抽脉傷

筋抽脉惕者。狀若驚也。筋屬肝毒在於肝。不得尋竅而出。筋脉受其衝激。以故抽惕如驚。而實非驚。有發於未痘之先。景象凶暴。見痘卽止。此痘發於心。世俗所謂驚痘者是也。然亦非驚。此則未發已發。不時抽惕。惟懷抱者知之。傍觀者不覺。此毒不驅。肝臟受攻。肝爲血海。血海後害。難於載毒。紅暈不著。難以成漿。囊不充盈。首尾類多咬牙。終心潰而後已。是痘輕者。疏達活血。稍與攻毒。重者重與攻毒。佐於活血。疏達。若以驚視。誤人多矣。

#### 附一治驗

嚴璞菴老先生一孫。歲未滿週。一日壯熱昏沈。筋脈抽惕。以清肌透毒湯。加木通青皮一劑。次日卽惡痘頭額如麻。身上隱躍。以必勝湯。減桃仁赤芍生地。加當歸三劑後。細碎者漸退。隱躍者漸透。雖見顆粒。却密而不鬆。滯而不紅。胸背多遊蠶珠殼。抽惕如故。減葛根。加丹皮。每劑和大桑蟲一枚。日服三劑。至七日。頂白根紅。惟遊蠶珠殼未鬆。服及十朝。通身滿脹。漿勢沛然。獨抽惕未已。壯熱未和。而多愁。

楚。大便自見點晝夜十飲次。皆毒垢。幸乳食如常。一方貫至十六朝。諸症平康。戲之方笑。以忍冬解毒湯。念朝外發出。紅痲如霞。調理收功。

### 中明徧體炎炎

痘瘡非熱不發。非熱不脹。非熱不成漿。非熱不結痂。是元陽制化其毒終始其功。故首尾不可無熱。然熱宜和。體宜潤。乃若如火炎炎。徧體乾灼。肆虐臟腑。蝕真氣。燥真陰。是痘瘡焦紫之煤。不論已出未出。按之若此者。便是窮兇極惡之症。不可以泛常之熱而忽之也。

### 附一治驗

臧比玉兄一大公郎。四歲一日徧體燔灼。面頰通紅。氣壅昏憤。以必勝湯。滅桃仁紅花。加石膏三劑後。見痘如麻。又二劑。細碎者悉退。顆粒分明。但鋪紅若錦。熱不稍減。神思復然。重以大黃五錢。生地石膏各一兩。日投二劑。至五朝。滅蟬蛻。加犀角。八朝漿足。大便日去四五次。神思始清。十二朝稍思飲食。有收結意。盤暈猶然。

嫩赤十四朝仍復泛疤。轉側愁楚。口内生疳。一方服至十八朝。諸症霍然。方以忍冬解毒湯收功。

### 申明四肢獨冷

四肢屬脾。惟宜和煖。固不宜熱。尤不宜冷。冷而皮薄。色淡。身涼。而手足更冷者。此脾臟虛寒。元陽幾脫之象。冷而乾紅色滯。通身火熱。而手足獨冷者。此烈毒壅遏於脾。邪陽莫透。火鬱則寒之象。冷之極。正熱之極也。較之炮熾者。而更重矣。在血症則發之而火自散。此係烈毒深藏。非攻不透。失治而脾必潰爛矣。

### 附一治驗

驥村嚴青宇。七歲一愛。壯熱如火。四肢冰冷。下部直過環跳。躁亂如失水之魚。無瞬息甯靜。兩頰一片通紅。不見點粒。胸背乾紅晦滯。皮壅肉板。主人以爲必斃。置之若棄矣。然痘在初見。毒無定位。以必勝湯。大黃五錢。連投二劑。四肢稍溫。卽加黃連石膏。每劑和大桑蟲一枚。又四劑。伏火通透。兩頰紅中泛點。四體頓熱。一方

貫至九朝。偏體充肥。粲然可觀。主人喟然嘆曰。前者兒女輩斃於痘者十數人。凶象皆未及此。是痘得痊。往者不堪回想矣。必竟首尾一以攻毒涼血鬆肌。十二朝漿黃如蠟。漸收漸結。十八朝諸症霍然。痂落收功。嗣後口復生疳。兩目腫赤多淚。以撥雲散。去木賊。加牛旁佐。參天花全愈。約用大黃二十餘兩。石膏生地各二觔。大桑蟲四十餘枚。

申明通身汗湧

陽虛則自汗。汗多則亡陽。而有虛脫之患。孰知痘瘡有陽極而汗湧洩者也。人身水火不容偏勝。水勝則火熄。火勝則水沸。烈火燔灼。五液沸騰。液有出於毛竅者爲汗。此五液之一也。火擾於內而汗自洩。是汗之爲火逼可知。有汗出如淋者。火之極也。其症通身焮赤燔熱。氣粗躁亂。是其驗也。火盛即毒盛。故氣虛而毒盛者有之。未有血熱而毒輕者也。火毒相併。血遇必瘀。血至于瘀而內有不潰者乎。其攻自不容緩。

附一治驗

乙未。吾郡張太尊一公子。歲未滿週。一日身熱如火。汗如雨下。左眉稜掀腫如桃。愁楚不甯而有痘象。乘痘未見。毒無定位時。即以必勝湯。減桃仁紅花葛根地龍。加石膏丹皮羌活。連投兩小劑。外以牛黃半分。珠末一分。調入化毒丹三匙。蜜湯調送。分爲兩服。次日見痘。頭額細碎如針頭。悉如前服。又次日。細碎者俱退去矣。而汗亦收。顆粒分明。第膚赤如霞。熱仍火熾。愁楚復然。惟喜乳食能進。一方服及六朝。頂白根紅。滅蟬蛻。八朝漿足飽滿。熱勢不減。眉宇未開。九朝迅速收痂。耳腮便起一毒如雞卵。照原方用桃仁紅花。十二朝出膿。背上腰胯隨起四毒。通如前劑。并化毒丹。至十六朝亦俱成膿平復。相繼又起。大大小小十數餘癩。更多惡色。青紫如傷。目之可畏。以金銀花赤芍地丁貝母。羌活牛旁當歸伍參。甘菊甘草仍合化毒丹。服至廿四朝而始收功。是痘熱法。名爲火裡苗毒先於痘。名疙落塊。令不早圖。痘其焦紫內潰矣。

申明頭汗如蒸

頭汗如蒸者。通身焦燥如炙。惟頭面汗若籠蒸也。緣烈毒湧於肌表。壅塞氣道而致表實。然五液却沸於內。滲洩無門。以故身燥如炙。火性炎上。兼之不容旁達。燄尤上竄。汗之所以湧若蒸也。頭爲諸陽之首。輕清最上之位。邪陽不易犯者。又一身之樞紐。痘瘡吉凶之準。邪陽更不宜犯者。而汗若此。五內可知。前人所以謂毒參陽位者死。是汗居其一也。尙有并頭而不得洩者。面反青黯。兩目徬徨。悶亂喘急。此又立刻待斃者矣。

附一治驗

白菴陳老先生。三歲一愛。一日驟熱如爐。燥炙如烟。惟頭額汗如雨下。至晚卽見點於太陽。兩頰如榴皮。紅而黯滯。連成一片。不見點粒。通身稠密乾紅。口渴煩躁。徹夜無眠。第幸在初朝。毒火雖熾。尙可撲滅。以大黃生地黃連紫草地丁佐以木通荊芥丹皮牛旁山查青皮赤芍。日服三頭汁。次日汗收而熱減半。前方減黃連。

加蟬蛻并大桑。蟲服及四朝。兩頰紅中泛痘。色漸光澤。神情未舒。胃氣閉塞。前方每劑調牛黃半分。日投二劑。七朝頂白根紅。神情半爽。身復壯熱。仍用黃連。減蟬蛻桑蟲。守此一方。成漿結靨。至十六朝。邪毒退聽。正氣康復。癍痕尙燥。幾及一月復發血瘋瘡。以忍冬解毒湯。加生地黃連赤芍。減紅花。又一月而全愈。

### 申明毒湧掀腫

痘有毒盛鬆透於外者。肉地卽腫。必因痘腫而腫。囊必綻突色。必紅潤。若郭鄰則平痘色則滯。肌肉掀腫如吹。按之板實。此一身領毒之氣。悉爲毒鋼。一任梟毒衝突於身。所謂難療肉腫痘不腫者是也。此毒不驅。七日必至內攻而斃。

### 附一治驗

復菴愼老先生。一長公。字其章者。九歲時痘烈熱如焚。紫乾紅。窠囊平板。無一隙地通身掀腫如吹。四體強直如鑄。仰臥而不能轉側。猶如捆綁。痛楚非常。叫喊不已。此梟毒烈火表裏俱狂。以大黃八錢石膏兩餘。生地兩半。黃連二錢。佐以清

喉鬆肌透。表活血。更以豬尾膏調入。蓋餘。自投二劑。六朝勢不稍緩。時值炎天。畏熱如爐。以藤蓆鋪地以安之。猶云背下如火。外取三七草搗自然汁。用鵝羽以拭之。仍以別方服過八朝。景色如故。計無所施。將濟雞矢醬色而有尖頭者。和六一散爲細丸。又用六一散和冰片二釐。研均爲衣。燈心湯送服。逾時身振體戰。臭汗如漿。霎時湧出大黑螺疔。於肩背四肢十五六處。烈熱頓和。痘即肥紅光澤。方得屈伸轉側。終是愁楚未開。水米不粘。尙屬可畏。其疔即以銀針挑破。用臘脂膏貼之。仍以原方首尾一轍。而得成漿收結。痲落收功。二十朝外口復生疔。尻骨又生癰毒。一僧治之而愈。

申明疙瘡塊

痘瘡輕淺者。萌芽發動。氣領血載。從容散布。不但顆粒分明。界地亦不連其色。若重而急者。朕兆一萌。毒鋒如射。或上竄或旁湧。任其毒之所至。擁突如桃。形如癰毒。是謂疙瘡塊。痘未及見。毒先湧發。驗其身熱如炮。神情躁亂。哈舌不已。叫喊不

止更合之兩目昏眊。肉潤筋惕是其症也。若以尋常癩毒視之則誤矣。

附一治驗

朱嘉直兄一公郎。一日熾熱煩躁。愁容萬狀。腦後先起兩毒如桃。不知其爲痘之瘡瘕魄也。嗣即見痘。稠密乾紅。僅不細碎。然窠粒不鬆。以必勝湯。加倭參。自二朝服至七朝大便日去四五次。色漸肥紅。囊漸鬆泛。神情頗安。大有行漿之勢。第壯熱未和。一老嫗譎曰。痘子惟恐脾胃不實。反用大黃宣他。今痘根俱泄出矣。相公當自有主意。果惑於其言。遂中止兩日。漿亦中止。神情復躁。熾熱更甚。頻頻乾嘔。頭面破傷幾半。口穢若腐。唇口焦裂。徬徨之極。復邀余視。余諭之曰。中氣果洩。無論別症。有不頭溫足冷者乎。何以其熱更熾耶。急以前方加黃連。滅蟬蛻。其破傷處。以藥胭脂貼之。至十一朝破傷復。灌通身漿亦復行。兩疔瘡併成一大疔。黑硬成坑。亦以胭脂膏貼之。越三日其疔腐爛膿漿旁溢。軟絹拭乾重貼。十六朝漸爾收結。胃氣漸開。諸症漸得平復。其疔至廿朝外收疤首尾以一方成之。口內生疳。

終以清熱解毒收功。

申明預封預腫

痘至五日期起脹光壯。而因痘脹而腫。眼因面腫而閉。此勢之必然者也。痘若平而不起。板而不鬆。惟皮肉掀腫。目胞擁合。此梟毒騰湧不受氣領。不爲血載。惟毒縱橫。是亦毒參陽位之一症也。前人所以謂面目預腫者不治。反早攻之。容或可救。

附一治驗

一友許君。幼時見痘。細如針砂。頭面掀腫。未及兩朝而眼即矇閉。熱如炮熾。愁楚之聲不絕。以必勝湯加黃連石膏。連投三劑。即大解七八次。而細碎者悉行退去。兩目仍開。熱亦減半。痘雖成癩。尙頂陷不鬆。乾紅未潤。前方減黃連石膏。服及七朝。囊鬆色潤。眼封鼻塞。八朝有放白行漿之勢。未得沛然。大便約去二十餘度。始如膠漆。繼若清水。乃尊疑其虛滑不禁。果爾痘變灰白矣。尙嫌伏毒鬆而未暢。故

下利清水。暢則矢必黃結矣。仍以前方服及十朝。漿足。胃氣漸開。十二朝神情開爽。大便頓實。收結而愈。後左小股發一餘毒。以忍冬解毒湯收功。

### 申明紅絲遶目倒豎睥毛

紅絲遶目者。有血絲遶於睥毛之下也。睥毛倒豎者。眼睥毛根根如針簇也。此伏毒衝擊於脾之使然。各臟凡有伏毒。即是惡症。至於脾最惡矣。僅在兩腎之上。却居心肺肝部之下。毒愈下而透。愈難脾受衝擊所屬之地。自失其常。所以睥毛倒豎。血絲遶目。畔也。較之腹痛唇腫等症。殆有甚焉者矣。是屬毒參陽位之一症也。

### 附一治驗

箬溪高翊老。一公郎。痘顆勻朗。明潤粗壯。道中一友。目之爲順。投以平和升發之劑。主人以夜不成寐。身體壯熱爲慮。不知更有血絲遶於目胞之下。睥毛倒豎如鎗。可慮更甚。若壯熱不寐。又其次矣。喜僅在三朝之內。猶可攻逐。用大黃三錢。佐以赤芍紅花地龍大桑蛀。餘不免鬆肌透發之類。服至五朝。血絲漸淡而眼合。壯

熱稍和。十朝漿足肥濃。攻發似乎可已。第兩太陽未脹。毒根猶未盡徹。神情未爽。恐虧一篑。大黃與桑螵服過十三朝。方得如意而回。

申明痘如蒙垢口穢噴人

痘如蒙垢。色近於灰。灰而囊薄。色白者。此氣血不足虛之極也。灰而黯滯。囊老板實。此氣血爲邪毒壅滯。不能煥發其華。色愈黯者。其毒愈深。若兼之於口中穢氣。令人難近。此毒固盛。而烈火尤內燄者也。不可據其似而失其真也。

附一治驗

一宋姓者。三歲一子。痘頗磊落綻突。而根無盤暈。其色則晦滯灰黯。宛若爲塵垢所蒙。體不甚熱。口中穢氣滿喉。躁亂不寧。此係熱毒遏鬱於內。故見症乃爾。身體則不熱也。是病在血。而不在氣。以大黃紅花紫草赤芍丹皮地丁荊芥山查牛旁。自三朝服至六朝。色漸紅活。亦漸安。八朝頓熱如火。穢氣減半。頂白根紅。減紫草紅花赤芍。加生地黃連。九朝漿成迅速。寢食漸復。以忍冬解毒湯。調治收功。

申明發始咬牙

鬪牙有血虛。有熱毒。大都漿後者。屬血虛。漿前者。屬熱毒。然漿後而猶因熱毒者。有之。未有發始而血虛者也。往往有痘方二三日而便鬪牙者。有見痘而即犯此者。更有痘未及見。一發熱而相戛作聲者。無論痘未及見。就在放標透點時。血初定位。縱血虛之人。血亦何自而虛。致齒失其養耶。明是毒火肆虐。不必參合形色內。症自是燎然。

附一治驗

一張氏之室。年十九歲。忽然壯熱如烙。喉間刺痛。不能嚥津。咬牙不已。神情躁亂。次日卽見痘。如針砂。色似胭脂。道中一望而去者不一矣。其症雖惡。以其尙在初朝。毒無定位。以大黃石膏各五錢。生地七錢。餘佐以荊芥地丁丹皮赤芍乾葛佐參牛旁木通甘桔。用蘆筍兩許煎湯代水。日投三劑。次日三朝。頭面卽顆粒分明。前方更用桑蟲一大枚。五朝色轉肥紅。七朝放白。九朝漿勢沛然。咬牙方止。熱猶

火熾。僅咽稀粥。碗許。猶苦難舌。十朝頭面堆結。愁楚未舒。十二朝血收氣足。回膿結。壓發臭難近。飲食大進。諸症悉愈。首尾以一方成之。

申明發始弄舌

舌者心之苗。心寧則舌寧。心擾則舌亂。心固象離屬火。雖若易動。然下交於腎。得坎水相濟而成其爲火者。故爲君火。當寂無所觸。其何弗甯者。惟是邪陽烈毒。衝突其經。以火濟火。二火相併。其苗自不能甯。痘瘡自內達表。非火不透。痘之順者。其熱溫和。客火不熾於心。何犯。即使險者。因逐毒而壯熱者有之。熱因逐毒而壯。猶爲發揚鬆透之火。於內亦不擾。擾則險而逆矣。烈毒內炎。燔及少陰。非躁亂無聲。卽叫喊不已。非躁熱如烟。卽汗出如油。痘隱隱於肌肉之間。非紫艷。或礬紅症。難悉舉。類多如此。弄舌其能免乎。是症燔熱者攻而涼解。隱伏者攻而散達。斯得之矣。

附一治驗

金友張兄一公郎。二週癸未季冬。忽一晚身熱躁亂。咬牙弄舌。痘象迭呈。以清肌透毒湯。加大黃牛旁青皮。時值初寒。佐以炒黑麻黃羌活二劑。後梟毒騰湧。躁亂更甚。兩目篋徨啼號乾嘔。筋抽脈惕。大便傾瀉如注。此熱毒內亂。下注大腸。不容傳送而故湧泄也。乘痘未見勢。雖猖獗。毒未內攻。因勢而利導之。是攝萬象於兩儀。關竅在此。前方減羌活麻黃。加丹皮地丁木通三劑。後瀉即止。諸症未降。以衝突之勢稍緩。不至奔騰下注耳。所謂大黃能止瀉。信不誣也。見標數點於左額。細如針頭。當喉十餘點。犯鼠跡咽關。照前方倍加大黃。暨位參。每劑和豬尾膏盡許。大桑蟲一枚。日服二劑。次日三朝。天庭清楚。但是不鬆。地角細密。即以胭脂膏貼之。右額不成點。身幸分珠。其間遊蠶珠殼者。不計其數。悉如前方。至五朝弄舌止。右額方見點。口內脫皮乳不能吮。食之以熟紅棗不變而出。大便復去五六次。以全體惡毒湧發。火性奔騰。不暇分消而故直出。是謂邪熱不殺穀。前方減葛根加白芷七朝痘漸肥紅八朝。右額及遊蠶珠殼俱起脹。大便去黑垢甚多。如膠如膝。

日進米糊二三碗。兩太陽未能起脹。以毒根未盡透也。日服大桑蟲四枚。豬尾膏蓋許。前方減蟬蛻。加山甲生地。十朝通身漿足。次日漸漸收結。大便復止。寢食俱安。聲音不亮。間或咬牙。前方減山甲大黃及半。加金銀花甘菊。外以牛黃半分。日服兩次。十四朝諸邪退聽。調理收功。是症始終以攻毒疏透爲主。補拓收斂毫不與焉。即寒涼之味亦不相及。以熱毒深藏隱伏也。痘本凶暴無倫。朝頭無甚風波。未路得無餘症。皆得早圖之力也歟。

申明兩頰通紅痘無一點

兩頰係一身痘瘡之主。氣血領載之會。先於此地透發。後及其餘。見氣得其暢。故領毒而先後不紊。得於此地分根。不連其色。見血得其色。故載毒而盤暈圓淨。若一片通紅。是血被火灼而旁溢。毒不受載矣。不見點粒。是氣被火蝕而遏鬱。毒無所領矣。氣血俱爲陷害。僅以涼血升透成何濟耶。

附一治驗

蔡文清兄五歲。一愛忽一晚躁亂如涸轍之魚。既即昏憤。面如土色。兩目失神。若立刻可斃者。以大黃羌活青皮。紅花蟬蛻薑蠶炒黑。麻黃荊芥穗木通山查連投。二劑。次日神情稍醒。兩頰通紅。身上見痘數點。照前方減麻黃薑蠶。加丹皮地丁。赤芍和豬尾膏半盞。三朝身體壯熱。人即醒豁。兩頰隱隱見點。如針砂領下稠密。近於托腮。卽用胭脂膏封之。身間珠殼甚多。喜磊落成顆。但嫌乾紅少潤。前方去羌活。加黃連生地。每劑和入一大桑蟲四朝。頰卽清楚。五朝色轉紅活。鼻塞眼封。七朝珠殼起頂。食薄粥一茶甌。大便日去三四次。九朝頭面堆結。身上漿滿。壯熱未和。腹痛異常。愁楚不能轉側。倍以大黃。臨服調入化毒丹二三匙。十二朝痛漸緩。漸得轉側。飲食大進。以忍冬解毒湯調治回好。

申明湧出如針

痘瘡形成於氣。毒受氣制者。出必漸次。雖密亦分珠圓綻。以毒輕鬆。而氣得以拘領也。毒若雄猛。則氣不能領。一任毒之奔騰。所以湧出而不得漸次。氣更不能拘。

一任毒之縱橫所以細碎而不成顆粒。痘之蛇皮蠶殼皆始於此。其痘斃在七朝。本無治法。惟於放點之初。見有攢簇不成顆粒者。速即攻之。令洶湧之勢。大挫其鋒。遏鬱之氣。得伸其令。庶乎密者可以轉稀疎。細者可以轉磊落。此真稀痘之秘訣也。但當治之宜早。是痘令一越宿。毒即有定位。三日內攻已成牢不可破矣。儘有一見點而攻不退者。必至蛇皮蠶殼亡之其命也歟。

### 附一治驗

錢粲老一公郎。忽身熱如烙。次日痘即一齊湧出。細若針頭。自頭至足。渾無隙地。色滯乾紅。時時乾嘔。徹夜無眠。以大黃爲君佐。以青皮山查荊芥地丁蟬蛻赤芍紅花紫草黃連木通。臨服和豬尾膏一盞。連投三劑。第二日兩頰即成顆粒。但界地未分。至三朝。通身亦分珠磊落。第壯熱未和。乾嘔稍稀。前方加生地。五朝肥紅光澤。熱勢減半。前方去蟬蛻黃連。加甘草八朝。放白成漿。稍思飲食。去紅花紫草豬尾膏。加連翹。九朝復壯。熱大渴。時或咬牙。仍加黃連。重以生地石膏。十二朝

諸症漸退。寢食漸安。方以忍冬解毒湯調治收功。約用猪尾血三碗餘。

### 申明黑陷歪斜

氣得其暢。包血成圓而鬆透。血得其和。附氣成暈。而紅活反。此自平陷歪斜。乾紅滯色。甚則其黑硬矣。以見梟毒縱橫氣血。瘀滯可知散見。且凶况報痘乎。希冀挽回。豈徒事升發之謂歟。

### 附一治驗

閔侄木兄。一公郎。報痘於脊。黑陷歪斜。按之板硬。餘痘隱躍於皮肉間。點粒甚細。色滯乾紅。躁亂不寐。體不甚熱。速將母痘挑破。以胭脂膏貼之。用必勝湯。減生地。服四劑後。報痘圈即鬆白。盤即紅潤。中心尙黑。餘痘透發成顆。未能光壯。照方用生地。減桃仁。乾葛。加姜蚤。每劑和大桑蟲一枚。五六朝起綻如珠。主痘成漿如爛。頭癩神情未快。飲食未進。九朝漿足飽滿。寢食得半。十二朝收結俱得霍然。方用解毒養榮。調理收功。

申明紫背浮萍

痘之色。血之色也。血和紅而能潤。血熱其紅若絳矣。熱劇則紫。紫黯則血瘀矣。至如紫背浮萍。較之紫黯不更甚乎。緣爲血被火炙。榮失其榮。致色乃爾。更受逼迫。血失其位。致見此癍。古人棄之不問。若在初見其血瘀而未死。及時破滌。癍毒得活。其癍漸淡。漸退。儘有可活者。僅以活血之劑。而希治之。必至就木而已。

附一治驗

閔明晁兄四歲一愛。痘頗稀疏。顆粒細結。俗呼爲石痘者是也。兩頰界地不清。周身乾紅晦滯。至胸腹間。徧滿此癍。眉愁腹痛。寢食不安。身不甚熱。以必勝湯撤生地。加紫草。每劇和豬尾膏半盞。日服二劑。至五朝癍色漸淡。兩頰漸清。前方減葛根。蟬蛻用生地當歸。九朝其癍悉退。漿甚充滿。腹痛頓止。照方減桃仁紅花并豬尾膏。次日收結甚連。身體反熱。十一朝根盤復泛。兩頰癍內疊疊重出二痘。但神情爽朗。不爲禱杙。仍用大黃蟬蛻赤芍金銀花荊芥當歸牛旁地丁山查。服至十

五朝半漿半醪。糊模收結。嗣以忍冬解毒湯全愈。

申明蚤癩

蚤癩者有點不成顆。有粒無盤暈。似乎蚤疤。名爲蚤癩。點子雖同。但蚤疤鬆而散。此則斂而結。其色紫。其點細。較若紫背浮萍。其勢畧緩。亦以血爲毒。外見此癩。內癩不破。必然內潰。是亦不治之症也。

附一治驗

庚辰臧比玉兒。三歲一公郎。一晚徹夜躁亂。兩眼矇眊。次日發出一身蚤癩。按其體膚。頭溫足冷。神情昏憤。是毒伏藏於內。血受其殃。凝結成癩。外呈此象。幸在發始。庶可破滌。此癩一活。不惟毒透。并火亦鬆。以必勝湯。生地換歸尾。用大黃五錢。桃仁三錢。服過六劑。癩不見退。痘不見起。更佐豬尾膏。盡許。並大桑蟲和入劑內。以助之。服過十一二劑。癩漸淡。漸退。而痘方見點。三朝即齊。痘可數紀。蚤癩悉退。無餘神情。終不開爽。乳食點滴不進。前方減葛根。蟬蛻。服至八朝。痘將收結。景况

依然大便日去十數次如藥水。終是藥力未克。守前方服及十二朝痘痂悉落。胃口只是不開。若謂胃氣受傷。何以痘能透發。以至落痂。若謂痂落無恙。豈有絕穀得生者乎。熟思其故。是病本惡。餘邪自未能淨力主前方。直至十六朝胃氣頓開。神情始快。大便即止。以三歲小孩。大黃約用舛許而得攻功。以見有病。病受如此。救偏瑣言卷之六

申明貫珠攢簇怪痘

痘不在乎稀。得勻朗散布。雖多何害。若連串貫珠有形相似。而雜乎其間者。若堆聚攢簇。有象可名。而間乎其內者。有一於此。空地雖多。亦何取焉。須知梟毒深藏。氣血錮閉。毒無領載。痘不得透。故多隙地。內却受其殃。其貫珠攢簇者。梟毒衝突。氣血不能駕馭。一任毒之縱橫。凝結成條者。身見連串貫珠團結成塊者。外見堆聚攢簇。誠中形外。信不誣也。是毒頑而不鬆。伏而不透。猶賊之巨魁也。此毒不治。諸痘皆爲抗拒。治不以攻。治之何益。巨魁授首。前途不戰。有倒戈之勢。然世於貫

珠者。習矣不察而多忽。於攢簇者。歸咎於命而棄絕焉。輿言及此。亦慘甚矣。庶狀其圖象或得觸目經心。詳其治法。或得挽回萬一。未必無小補云。

### 遊蚤

是痘貫珠成條。其形如蚤。故名遊蚤。有稀蜜。有長短。身上者輕。頭面者重。身上短而稀。所見無多者輕。長而密。更繁多者重。重則必攻。令鬆透如一赤豆莢。其毒方起。

### 燕窩

是痘攢簇纍纍。象似燕窩。而名者也。單見尙重。見而不一者不治。急攻之。務令鬆擡如餅。其毒方化。以油胭脂調入化毒丹。用綿紙攤貼。更佐以豬尾膏大桑蟲。

### 疊錢

是痘圓圓攢簇。絕不成點。錢許之大。故名之也。僅見二三者輕。多見者重。重則必攻。亦以藥胭脂膏封貼。更和豬尾

### 雁行

雁行者。狀似遊蚤。但曲而甚長。以其排行而若鴈字也。單見者亦重。不一者更重矣。攻之鬆若遊蚤而毒化矣。

文 卷六 申明怪症

膏大桑蟲。於劑內透之。令毒

如蒸餅。其毒方透。

### 鼠跡

是痘或四五粒。或六七點相簇如鼠跡。故以是名。無多者。輕。見於周身者重。重則必攻。令相併成泡。其毒方鬆。劑內調入化毒丹。并猪尾膏。



### 珠殼

珠殼者。其痘有頂而平。四圍貼附一細圈。宛如珠殼。無多者輕。及於周身者重。重者必攻。務令圓滿綻突。其毒乃透。



### 瓢沙

瓢沙者。其痘扁闊歪斜。無頂無盤。有細點如沙。攢簇於囊。宛似瓢沙而名之也。可以數紀者輕。徧及者重。重則必攻。務令高擡如灰實殼。其毒纔化而成漿。



### 鳥跡

鳥跡者。連串三條。頭簇脚開。其痘若鳥之跡也。單見者輕。五六處者重。重者必攻。亦如遊蚤鬆透爲準。



# 蟹爪

蟹爪者。貫珠連串。粒細一粒。尖稍有隱隱黑絲如髮。竟與蟹瓜無異。無幾者輕。繁多者重。重者必攻。其形繞脹成條。而毒盡洩矣。

# 蛇皮

叢簇成片散漫無拘。形似蛇皮而名之也。見此不治。或見點之初。燈下照之。隱隱簇簇細密無倫。將形未形之際。即便攻之。佐以豬尾膏破之。不使其成。庶可有爲。

# 履底

履底者。形似蛇皮。不若蛇皮散漫耳。隨處皆凶。其形得小更得早圖。庶可有爲。速以豬尾膏和入攻毒劑內。并大桑蟲透之。急以藥胭脂膏封貼。令得膿水淋漓。方能慶生。

# 蟻窩

蟻窩者。較疊錢而更大也。另別其名者。其形大。其毒亦更重也。即屈指無多。毒已不淺。攻之自不容已。佐以大桑蟲豬尾膏。外亦以藥胭脂貼之。得鬆泛平穩。方可成膿。

### 螺疔

其毒頭大。根尖。頂黑。形若螺肉。深入於肉裏。有大小。有深淺。按其四圍板硬。治法見於餘毒。若放點時而即見者。最惡。先以挑鬆。即將應服之藥大人含於口中。吮其數次。隨用貼法。是痘連串環遶。故以是名。有臂因鐺阻。痘即如鐺而遶者。有項以圈繫。痘即如圈而繫者。於臂稍輕。於項則重。因阻猶重。無因更重。不特項臂為然。頭身亦有之。凡見宜攻。

### 紫背

癍之形似萍。其色似萍之背。紫而帶黯。有大有小。目之有點。手按無形。無幾便重。繁多者莫救。急宜攻毒破癩。務令漸淡淡而退去。方可回生。必須早圖。

### 環珠

遊蚤治驗

吾宗漣漪。四歲一愛。身熱如火。神情昏憤。兩頰通紅。鼻衄成流。身上隱隱數點。色滯乾紅。以必勝湯減紅花地龍。加位參。二劑後。紅中泛黑。細碎如麻。周身稠密如鋪。而多遊蚤。珠殼亦間乎其間。前方服至三朝。兩頰界地未清。却成顆粒。滯色略轉。每劑和大桑蟲一枚。六朝滯變爲紅。色猶如絳。唇口腫裂。前方減蟬蛻葛根。加黃連石膏。七朝放白。珠殼泛頂。九朝遊蚤統脹成條。時或咬牙腹痛。熱猶火熾。十一二朝。頭收斂而痲燥。身漿滿而盤暈。猶赤神情尙困而未舒。以一方貫及十六朝。發臭異常。二十朝諸症頓愈。寢食得安而收全功。後左眼赤痛多淚。以撥雲散治之得痊。

蟻窩治驗

張又卓兄。一小公郎。方一歲。一日壯熱如烙。徧體如霞。痘不甚密。色滯而平。有蟻窩見於手背。神情愁楚。不時叫哭。是腹痛使然。以消癍快毒湯。加大黃。臨服和桑

蟲一枚。日服一劑。手背以脂胭封貼。六朝霞色清。愁眉散。手背鬆浮泛白。七朝氣尊血附。俱放白成漿。熱勢減半。去大黃蟬蛻黃連。加連翹。日服一劑。十二朝回好。

### 疊錢治驗

一錢氏子。四歲痘在五朝。唇裂掀腫。體熱如火。頭面稠無隙地。身上疎朗。板實。紅四肢胸脇。疊錢者不一而足。躁亂不寧。以涼血攻毒飲。加山查地丁。減犀角。和大桑蟲一枚。日服二大劑。更以金汁日服。蓋餘外用脂胭膏封貼。至八朝。鬆泛如蒸餅。十朝通身漿足。十二朝發臭收結。十四朝身熱始和。寢食俱安。方易忍。冬解毒湯收功。

### 珠殼治驗

韓尺龍兄。一公郎六歲。乙未仲夏。一日忽體熱如爐。頭面通紅。神情昏憤。見痘稠無餘地。僅不細碎。盤若塗硃。內有珠殼幾半。以涼血攻毒飲。倍生地大黃。去紅花

紫草。加倭參地丁。四朝加黃連。每劑和大桑蟲一枚。五朝神情清爽。七朝珠設皆透。滅蟬蛻葛根桑蟲。九朝漿足。十朝紅暈漸淡。飲食漸進。頭面收結。十二朝壯熱方和。遂去大黃。滅生地及半。十六朝回足。如此血熱不致帶火成痲。爬肌抓肉。大黃生地荆芥之力不淺也。後以忍冬解毒湯調治。落痲未久。腠理未固。餘毒亦未能盡淨。見風太早。忽爾昏暈。急以疏風消毒飲而愈。

### 鼠跡瓢沙治驗

吾宗儻如一子。一日身熱如火。汗出如油。神情困苦難支。似痘非痘數點。隱隱於頭面。色滯乾紅。痘未是而若非。且熱如火。汗如油。非惡痘不爾。以清熱透肌湯未用生地。如大黃。二劑後。次日頭面細碎如麻。身上見點處若集。隱伏處若無。此氣爲毒滯而通塞不均也。又二劑。頭面顆粒分明。色亦覺潤。汗即頓收。徧體湧出。內聞鼠跡瓢沙。難以數紀。囊窠不鬆。色近於白。此血爲毒鬱而未著。非血虛白也。不則有一體兩局者乎。前劑每服和大桑蟲一枚。五朝窠脚漸鬆。囊頂未起。色轉深。

紅。神情得定。熱不稍減。前方重以生地。加黃連石膏。至九朝頂綻。食稀粥碗許。十一朝。鼠跡與瓢沙俱得。統脹如泡。而漿俱濃。十四朝。盤暈始淡。頭面收結。十六朝。身得溫和。胃氣日強。方易忍冬解毒湯。調治至二十朝。收功。弗藥。

### 鴈行治驗

有一段氏子。三歲。見痘三朝。兩頰細如蚤種。背多鴈行。更有瓢沙間乎其間。椒紅其色。叫喊不已。熾熱如焚。以清涼攻毒飲。和桑蟲一枚。日服二劑。四朝。顴卽成顆。六朝。色卽紅活。八朝。怪象俱統。脹放白十朝。漿足。猶然愁楚。不能進食。一方服及十四朝。眉宇方舒。得進飲食。身體溫和。一朝霍然。收靨落痂而愈。

### 蛇皮治驗

一女年及十四歲。倏爾身熱如火。神卽昏憤。兩眼如畏刀鋸。徧體如霞。痘未及見。死期若將至矣。卽以大黃石膏一兩。生地七錢。佐以荆芥赤芍青皮葛根木通牛旁。日投三頭汁。次日午後見痘。細似坭沙。色似礬硃。通身無二隙地。前方又服四

劑即成點粒。却稠密如鋪。方叫腹痛。略知人事。大渴不已。揭衣棄被。前方加黃連犀角。生地兩半并。大桑蟲服至九朝。始得紅潤。周身起脹。十一朝。貫漿連成一片。如松皮。不能轉側。大便日去四五次。水米不沾。十四朝發臭滿室。頭將收結。唇黑如煤。身若寒戰。熱仍如火。一方貫至十六朝。頓思飲食。夜臥得半。熱渴稍減。二十朝外痂成一片。如蛻一殼。得脫此難。方易忍冬解毒湯。月餘全愈。約用大黃觔半。生地石膏二觔餘。是痘得治於未見之前。更得首尾一轍。庶得挽回。若令見點其勢便成。牢不可破矣。

### 蟹爪治驗

中介閔老先生。三公郎。方半週痘出稠密如鋪。色滯乾紅。窠粒平板。內多蟹爪。身體壯熱。脈惕筋抽。時在二朝。以鬆肌透毒散。加大黃七分。和入桑蟲錢計一枝。日服二頭汁。次日粒數即磊落。四朝紅潤。八朝鬆泛。九朝行漿。遂減大黃。十朝安睡。乳食如故。大便如常。收回而愈。

燕窩治驗

徐明涵一孫。身熱如火。燥灸如烟。兩頰通紅。頭面胸腹。肩背四體。痘密無容針之地。頂陷囊實。乾紅紫滯。叢簇象燕窩者。在於大股。大便日去三四次。始事者。以斷無生理。而勇退矣。余取其囊厚色老。雖密成顆。可冀者此耳。以大劑必勝湯。用大黃五錢。生地兩許。如石膏兩半。每服和一大桑蟲。日進二劑。服及六朝。頭面起脹。眼封鼻塞。八朝。胸背鬆透。色轉紅活。頭面成漿。十朝。燕窩統脹如蒸餅。身漿亦足。第熱猶火熾。愁楚未舒。自膝至脛。猶紫滯不鬆。至十四朝。腐爛作臭漿。及足脛。邪毒盡發於外。寢食頓復。方易忍冬解毒湯。成痂落靨。至十八朝。收功弗藥。用大黃一觔。生地石膏二十餘兩。痘後大便但嫌燥結。

鳥跡治驗

吳大雍兄二公郎。八歲患痘。顆粒頗朗。有鳥跡其形於肩背。兼多珠殼。囊窠通身平實。乾紅色滯。烈熱如炮。愁容可掬。云胸膈煩悶難堪。以涼血攻毒飲。重以大黃

加石膏地丁山查。四劑後胸膈漸寬滯色漸活。第紅艷若絳。前方加黃連。并大桑蟲。每服和入一枚。又六劑頭面通身起脹。鼻塞眼封。惟鳥跡與珠殼未鬆。毒根猶未透也。更倍以大黃地丁加山甲至八朝。珠殼者圓綻如珠。鳥跡者統脹成條。九朝膿漿克滿。飲食大進。大便不過三四次。終是燔熱不減。紅暈歟赤。前方減山甲蟬蛻紅花。倍以石膏生地。服及十朝。熱漸減。赤暈漸淡。頭漿斂而身漿徧。減石膏大黃。十二朝收癩過半。險變順矣。是晚徹夜不寐。氣粗頓悶。腹脹如鼓。變出意外。若以爲伏毒未盡。而囊無不綻。漿無不滿。若以爲餘毒歸內。而血收已盡。痂厚而肥。決之於脉氣口洪滑有力。知其飲食停滯。究之果然。以寬中透毒湯。減陳皮。加萊蕪子大腹皮。外用山查二兩。麥芽一兩。煎湯代水服。二頭汁。腹卽轉動。隨解而寬。嗣以忍冬解毒調治收功。

頭面遊蚤治驗

同袍鍾徵老。九歲一公郎。見痘一朝。體不甚熱。囊窠不鬆不實。痘色不潤不乾。痘

頗踈朗。似乎險中之順。及神情則愁楚異常云。胸膈鬱悶。目睛昏定。身無安放。此伏火伏毒之兇象也。以必勝湯去桃仁生地。連投二劑。次日額上發起寸許血絲兩條。一橫一直。如反手丁字。此非尋常血絲路也。貫珠而未能透耳。更以豬尾膏每服和八蓋許。又二劑。至晚漸粗如線。繼而更粗如芥。仍以前方和大桑蟲。每服一個五朝方透點於血條。密排二十餘顆。遊蚤最惡者也。身體大熱。紅暈如硃。胸膈稍舒。原用生地。減紅花葛根蟬蛻。加黃連石膏。大便日去五六次。飲食未思。至九朝諸痘峻頂。放白成漿。其遊蚤亦統脹成膿。纔撤豬尾膏。寢食得半。熱勢未減。前方服及十二朝。胃氣大開。夜臥甚熱。體漸溫和。漸次收結。而且嬉笑自若矣。前方減大黃石膏黃連。加金銀花貝母。次日忽然昏暈。神色俱變。按脈無影。變出意外。然以如是收局。自非隱毒攻心。尤非真元虛脫。須知遊蚤既見於頭面。而第見血絲。越三日而後見點。此毒伏而又深。故前局乃爾。結局亦自宜有。此變餘毒驟湧。一時難以發洩。是冒悶之使然。猶傷寒冒汗之象也。仍以發始前方連投二大

劑。發出如芥如麻血疹。一身即時開爽而安。又以消癍快毒湯二劑。嗣以秦凱和解飲。調理全愈。喜主人明理。始末信從。不則未必不致虧於一篑也。

### 履底治驗

有馮其姓者。江右一遊客也。年踰不惑。一日壯熱煩渴。目紅腹痛。沖沖欲嘔。疑以感寒。烹菜湯一碗下咽。俄頃煩渴倍甚。吐血水碗許。內有血絲。邀余診視。其太陽有二三點是痘顆粒不鬆。乾紅色滯。余曰。兄痘矣。此翁愕然曰。痘果未曾。今在客館奈何。余以無恙慰之。連投消癍化毒湯。用大黃三錢。二劑後。湧出一身細者半。粗者半。紅艷如硃稠密如鋪。熱更如炮。倍以大黃。又加石膏并生地俱兩許。臨服和豬尾膏半茶甌。日投二劑。次日三朝。痘即疎朗細碎者。不知從何去矣。色亦可觀。煩渴減半。而熱仍熾。有履底者三寸長。寸餘闊。見於兩小股。按之板實而痛。以胭脂封貼。前方配大桑蟲每一服一枚。六朝眼封鼻塞。八朝行漿履底鬆擡。前方減蟬蛻桑蟲。加牛膝。十二朝忽思粉食。以糯米水圓食之。甘。神情爽朗。自上而

下。次第收結。履底成膿。減大黃石膏。加金銀花貝母。十四朝。兩小股腐爛作臭。其餘朝全愈。

### 環珠治驗

一兒三歲。忽身熱如炮。膚紅若錦。煩躁啼號。次日痘即湧出。稠無隙地。兩頰如泥砂。乾紅滯色。臂上錫痕。痘如纍珠纏子。密密環遶。又有錢許大者。一在于肩。一在于脛。巢綻板實。界地連環紫滯。以必勝湯。減蟬蛻地龍。加黃連止服二劑。次日頭面。周身即疎朗成顆色。俱明潤。痘若改換。惟四處環珠。形色如故。症亦未減。以一方。服及十二朝。痘得次第應手。症亦逐日平復。以忍冬解毒湯。調治收功。其下圖像。

指貫珠攢聚或見於頭。而或見於周身部位者也。

覆釜



兩截



蒙頭



是痘盤聚于巔頂。如釜之覆。名曰覆釜。是毒叅陽位之一症也。其餘疎朗明潤者。以鬆肌通聖散。和豬尾膏。化毒丹治之。外用胭脂膏搽貼。更稠密火熱者。必加大黃。令膿水腐爛。其毒方化。是痘上與下。綿密如鋪。中段絕無一點。梟毒擁于上下。氣血阻于中宮。以致上下。隔截痘之。最惡者也。首尾一以攻毒為主。佐以豬尾膏地龍。令氣血疏達。要截處。得散散透點。方可挽回。是痘透頭貫頂。有似兜帽。故名蒙頭。毒叅陽位之首惡也。餘更稠密火熱者不治。治則必攻。與覆釜同法。必早圖可挽。有獨聚于天庭者。亦是蒙頭。餘若疎朗明潤。體不熾熱者。不必用大黃。

腰纏



腮托



口鎖



腰者。腎之候也。連串環繞於此。緣毒伏於腎而  
有此象。貫珠之最惡者也。餘即疎朗。不得視以  
爲美。治必以攻。得此鬆擡。統成一團。如豇豆。莢  
方不爲害。不則痘縱可觀。九朝忽然悶亂變焦  
紫而斃矣

頰下亦腎經所屬。痘瘡攢成一片。是爲托腮。清  
氣爲其所阻。頭面必不能起。身更可知。痰湧氣  
端。可立而待。從來不治。若見點之初。毒勢未成。  
以治蒙頭之法治之。亦可救援一二。速宜封貼  
雙鎖口者。兩口角。左右一粒較旁痘獨大。板實  
而無盤者是也。此毒擁于脾而有此象。口乃脾  
之竅。飲食接送之門。可令毒藏此地乎。治法輕  
重。與覆釜一轍。有連串遠于上下唇畔。亦是。

項鎖



項係水穀之路。呼吸出入之門。痘瘡連串環繞于此。是毒鎖咽喉。與托腮無異。咽啞水噎。皆由此致。俱屬不救。但得放點之初。即以清金攻毒飲。并豬尾膏。杜患于將萌。容有可起。

背攢



毒發於背。便關生死。况痘攢簇隨地皆凶。而可令此地犯及乎。攢而得鬆者。以鬆肌透毒散。合化毒丹。豬尾膏治之。外以胭脂膏貼。攢而更板。壯熱如火者。必攻。須得腐爛。方可慶生。

腹囊



腹近五內。猶之同室。與他處不同。一有變症。毒即入裏。捷于反掌。但此地空隙。而未得為吉者矣。未有此聚如囊。而得無恙者也。治法攢背同。

胸攢



胸與腹。俱逼近臟腑。遍胸猶之囊腹。調劑之法。亦與攢背同。

咽關



咽關當喉攢簇。而犯疊錢者也。若蟻窩則尤重矣。咽與項皆水穀之路。呼吸出入之門。其害與鎖項無異。鎖項之害病在環遠。咽關之害。病在攢簇。治法與鎖項同。更以胭脂膏貼。

抱膝



兩膝攢簇如餅。毒聚于此。瘵不能達足脛。而致虧于一簣。餘地無疵。更無內症。止以鬆肌透毒散。加牛膝。合化毒丹治之。并用胭脂膏貼。更多惡象內症者。必攻。

### 唇鎖



唇者。脾之華。脾臟安和痘不相及。更得溫潤。不則攢聚于此。有黃熟如蠟。有嘴突如雷。有黑硬燥裂而血迸。皆毒攻于脾。象見于唇。如無他症。瀉黃散合豬尾膏治之。更壯熱如炮者必攻。

### 蒙翫



痘攢簇于耳後高骨。是謂蒙翫。亦腎經伏毒之徵也。頭面餘處皆稀。止此犯忌。以鬆肌透毒散。加倭參合化毒丹。豬尾膏治之。外用貼法。更稠蜜而炮熱者必攻。

### 肩披



披肩者。如其肩而兜聚也。較之於背稍輕。然臟腑真氣所聚之處。即鼠跡瓢沙。尚屬可畏。而况攢布成片乎。此毒不鬆。真氣錮閉。上下阻塞。治與攢背同法。


抱鬢



鱗坐



囊毬



鬢接太陽。臭毒起伏。於此取驗。痘症若重鬢極稀疎。必此地掀腫如蓮瓣。以及正面腫脹如毬。毒根方透。不則此他不脹。即通身光壯。毒根猶伏。厥後終敗。可令犯忌于此乎。治法與蒙飭同。鱗坐者。其臀攢集如鱗也。穴屬環跳部位。又至陰之地。故發漿不過環跳者不治。平而乾滯者。鬆肌通聖散加牛膝。板而紫滯且熾熱者。涼膈攻毒散。減豆根亦加牛膝。俱合化毒丹。并貼法。痘得陰陽和暢。雖蜜無咎。陽毬乃下焦陰陽交會之所。故陰上先收者吉。取其下焦和暢也。於此若囊毒壅交會可知。上下相因。下壅則上閉。治以散結湯。化毒丹。熾熱者。加大黃石膏。

覆釜治驗

歐餘方。老先生。三歲。一公郎。痘頗疎朗。却色滯乾紅。有平有陷。顆粒不鬆。至嶺頂盤集。覆釜其形。是毒參陽位之一症也。以鬆肌透毒散。和大桑蟲。雖見起發。不能光壯。早欲用豬尾膏化毒丹鬆之。因與一不韻者同事。阻及七日期。滯而更燥。陷而漸板。愁容可掬。不容復緩。前方減羌防。加荆芥。當歸。臨服和豬尾膏。并化毒丹。連投二服。外用胭脂膏搽貼。身即壯熱。頭面掀腫。通身光壯。却徹夜無眠。以毒火潛伏日久。藥與鏖戰。以故不寧。藥得其勝。氣血暢達。故得煥發。不韻者。不韻是理。第見擾亂。歸咎于生豬血而致變。料不能起勇退而去。舉家悲泣。孰知豬尾膏。最能透伏毒之深藏。毒血內瘀。非此不活。更有化毒丹。潛消默奪。而共濟之。毒根自不容藏。次日即安睡。九朝漿行。壯熱如燔。前方減白芷。蟬蛻。蜂房。加黃連。生地。十二朝。漸漸收痂。豬尾膏遂撤。巔頂燥痒之極。仍不能寐。以荆芥穗。金銀花。茵陳。大黃。地丁。甘草。煎湯。上浴其頂。拭乾。復以胭脂膏貼。而痒即止。仍復貫漿。堆結甚。

厚。餘熱未和。痘痂亦燥。前方倍加生地。臨服調牛黃半分。珠末一分。日進二服。至十五朝。日漸回和。口內生疔。以忍冬解毒湯。外用消疔散。又數日全愈。

### 蒙頭治驗

孝廉王乃老。一公郎。未及三歲。體薄而兼病後。及見痘蒙頭鎖項攢胸攢背兩額細碎。滿腹癍點。皆紫背浮萍痘色晦滯。宛似蒙垢痘犯不治不一而足。所希冀萬一者。惟在初見毒。未有定位耳。以必勝湯。臨服和豬尾膏蓋許。外復以牛黃半分。珠末一分。總勻在內日服二劑。次日色即有紅意。兩額便成顆粒。四朝胸背覺磊落鬆綻。惟頭與項布而不清。却亦鬆泛。腹癍漸淡漸退。六朝浮萍悉退。前方減葛根桃仁。八朝漸漸放白。但寢食俱艱。眉宇愁蹙。九朝漿行未能充溢。時或乾嘔。身熱驟熾。聲音半啞。以毒火湧洩也。以涼膈攻毒飲十朝。頭面夾紙鬆擡。有膿漿滲漏。身漿幾足。十二朝收痂少潤。寢食僅半。眉宇未舒。十六朝燥痂復泛。口內生疔。以消疔鮮毒散。日吹三四次。二十朝外。方得全愈。是痘始以必勝。繼以涼膈。佐以

猪尾膏。化毒丹。總以攻毒導瘀。而保元拓裏。腐談從不講及痘。得保全而卒無虧于本體。見有病病受如此。

兩截治驗

予一孫。歲未滿週。仲冬一日忽發搐。口眼歪斜。周身肉跳筋惕。兩眼徬徨。以清肝透毒散。加羌活。臨服調入牛黃丸七分灌下。逾時神醒身即壯熱。次日便見痘頭面細密如麻。上自眉至乳。下自臍至足。稠無隙地。但得成顆中。段絕無一點。此兩截痘也。日夜叫喊不已。急以必勝湯。減桃仁。加當歸。佐以猪尾膏。日進二頭服。四劑後。大便去毒垢甚多。頭面便成顆粒。身上漸得粗壯。大便日頻。晝夜約去三十餘次。繼之清水若溺。夜即安睡。遂減大黃。至晚仍復叫喊。痘即奄駐。不得已而復用。晚又安睡。次日漿勢沛然。乳食大進。食之以糯米細圓甚喜。十朝。頭面推結甚厚。但欠肥潤。神情大快。第身熱未和。不免以大熱一退。虛寒繼至爲虞。大黃不敢復用。停及一日。燥痒難禁。滿面搔破。熱血成流。又喊不絕口。與食則拒。要其所以

然者。以痘犯兩截。壅塞固閉之毒。餘氣未殄。害仍竊發。不得以輕鬆者。概論也。方主前方芡。減葛根。紅花。蟬蛻。加石膏。位參黃連。是方服過十六朝。始得全愈。胃口甚強。痘後精神頗旺。

### 攢背治驗

雉城臧以用兄。顧渚老先生之孫也。幼時出痘。犯攢背。頭面稠密如鋪。肩背以上紅深如絳。以下紫若胭脂。身體燔熱。神情昏憤。以必勝湯。用生地兩許。減紅花。加石膏黃連。自三朝服及七朝。大便日去四五次。通身色轉紅潤。背得鬆浮。減葛根。至十朝。頭面漿足。背得腐爛作臭。餘亦成漿。唇黑如煤。熱猶火熾。一方服至十四朝全愈。時有同事。日以脾胃爲慮。余曲諭之。得不拒有成。

### 鱗坐治驗

一邢姓者。六歲一兒。痘及五朝。全不起發。日夜躁亂。如蚓在灰。舉家涕泣。以爲必斃。痘頗疎朗。按之不鬆。根巢紫滯。頂陷而黑。至環跳處。攢聚如掌。犯鱗坐形。伏毒

深藏。抗拒諸痘。始事者。但知疏肌透發。而不諳其故。毋惑乎暢達無由。日奄滯而至。猖獗也。急以窮源透毒散。和豬尾膏。連投二劑。更以大桑蟲。酒漿調服二枚。外以胭脂膏貼。次日便覺鬆泛。又二劑。七朝。痘即峻頂成漿。神即安爽。但環跳處。鬆而未腫。服及十朝。漿湧。連紙鬆擡如蒸餅。嗣以忍冬解毒湯。十二朝收結成功。

### 纏腰治驗

一徐氏女四歲。痘期兩日。甚勻朗稀疎。却陷而不鬆。紫而乾滯。身熱如烙。兩腰貫珠環遶。而犯此症。是毒伏於腎。貫珠之最惡者也。日期尙淺。餘痘尙疎。猶可挽回。恐此翁不明是理。辭之弗任。不期此翁止此一女。豫爲痘計。屬意已專。以予弗任。大慟哀懇。情甚悲切。以必勝湯。加牛膝黃連石膏。稍用炒黑麻黃以行之。并和豬尾膏。連服二頭汁。腰痛難忍。繼之於汗而欲解。解後而痛即止。便云爽快。次日三朝。凡服藥後。景况亦復如此。此八朝而痛不作矣。然其所以然者。伏毒之症。犯幾朝敗者。日期未至。毒雖暴烈。猶未作難。以其尙伏也。故爾得安。時師不諳而多忽。

殆至發難時。毒已潰而無及矣。見於機先者。攻之而不容其伏。毒又盛未肯遽降。藥毒鏖戰。自不能寧。至於藥力戰勝。而貼然矣。何痛之有。嗣後放白成漿。腰間纏毒。統脹如連殼豇豆。漿亦滿圍。但熾熱未和。飲食未半。前方減蟬蛻。桃仁。葛根。紅花麻黃。服及十二朝。日漸回和。收結全愈。

托腮治驗

吾宗叔澹。五歲一愛烈熱。如爐不及。一日而痘卽見於地角。領下細如針頭。而色近白。托腮之象未成。托腮之穎已露。正面周身所見。俱不成粒。色多礬紅。徹夜躁亂。將來攢簇惡象。皆可有的。痘鄰於逆所翼者。惟在初見。以必勝湯。減桃仁。加石膏。伍參。日服三大劑頭汁。卽用胭脂膏封貼。次日正面與身卽成顆粒。却無隙地。是方和。大桑蟲。每服一個。五朝神情得安。七朝圓綻肥紅。地角領下隔絕鬆綻。亦得纍纍。前方減蟬蛻。乾葛。十朝漿甚充滿。惟壯熱未和。盤量礬紅。飲食不進。大便日解五六次。皆毒垢。十一朝正面堆沙。漸次收結。以及周身。十三朝。胃氣頓開。痘

痲尙燥。紅暈未得全收。服至十六朝。諸象春。始終以一方成之。纔以忍冬解毒湯。加生地二十朝全愈。弗藥。約用大黃二餘兩。石膏二觔。

### 囊毬治驗

一李氏子三歲。見痘兩朝。色似胭脂。頂陷不鬆。火熱如烙。煩渴不已。至陽毬攢簇宛。若荔殼。瑕內求瑜。惟磊落耳。以消癰快毒湯。加大黃石膏桃仁地丁山查服及五朝得鬆。六朝紅活。猶絳色。然前方減桃仁蟬蛻。九朝漿足。紅暈未淡。熾熱復然。時生地已幾十餘兩。黃連三兩餘矣。至十二朝熱得稍緩。紅暈畧淡。寢食亦以之而稍安。前方減石膏。十四朝先收者。疤赤而多浮皮。後結者。焦痲而紅暈猶附。體膚燥熱如初。夫固餘毒之先機也。不越二日。神即昏迷。從頭至足若空地及疤痕。重出一身似痘非痘。不成顆粒。脚地糊糝。色如塵垢。無一隙地上。則抱鼻而更層疊。以及人中。下復囊毬。以及小便。紫腫痛楚非常。仍不能寐。稀粥與之則嘔。不與則不思。而痘復始矣。較前局更惡。此名謂机橋痘。机橋乃惡獸。其性反覆。痘與相

類。故以是名。此痘古來有之。第罕見耳。以窮源透毒散。減山甲歸尾加桔梗牛旁  
生地黃連金銀花青橘葉。臨服調牛黃化毒丹錢許。四劑後。色漸紅而猶滯。囊漸  
壯而猶平。服及五朝。仍眼封鼻塞。七日行漿。通身漸漸堆沙收結。痂成一片。十餘  
日而褪及過半。頭面黑硬堅牢。反不能落。其鼻聳抱如螺。拂及則痛。人中亦燥裂  
迸血。其小便龜頭。於中段腫處頂出。陽毬老靨。抓肉爬肌。眉宇不舒。餘熱不解。前  
方重加生地兩餘。黃連二錢。以金銀花湯煎藥。服及月餘而熱始和。痂始鬆。以熟  
豬油調入官粉。決其頭面而得褪。改形換相。非初褪時面目矣。嗣後寢食俱安。調  
理收功。人中與陽毬。俱陰陽交會之地。惡毒上下開鎖。痘故如此。若不開關於前。  
亦烏覩其後。局若此也。

抱鬢治驗

嚴君殺兄。一小愛。歲未滿週。痘鄰於逆。先見於兩鬢。攢簇如麻。繼而頭面通身。徧  
及無餘。色近於白。而窠粒卒不鬆。體不甚熱。而神情卒躁亂。似虛似實之間。然虛

者爲。而實者真也。兼於脉惕筋抽。不時乾嘔。兩目預腫而預合。種種皆伏毒之象。而况抱鬢具形。伏毒已先昭於前乎。不一韻者。認爲氣虛。痘反有隱意。勢甚猖獗。急以涼血攻毒飲。以當歸易生地。減赤芍。加山查。地丁。甘桔。和桑乘蟲一枚。日服二劑。四朝頭面有鬆意。根窠稍有紅暈。眼腫減半。閉而復開。生機在此。七朝身體壯熱。頭面起脹。頂白根紅。眼封鼻塞。有行漿之勢。大便日去六七次。身尙復然。餘症未減。前方減蟬蛻葛根。原用生地。加黃連。服至十二朝。身得鬆透。寢食得半。下部痘瘡板實。皮肉擁腫如炊。前藥加牛膝羌活。更以牛黃化毒丹。日以三分佐之。加大桑蟲至十八朝。身漿始沛。并及足至二十餘朝上。提下簇。前症日愈。惟眉宇未舒。眼開有障。口內生疳。頭角與小股起一大毒。如拳。以忍冬解毒湯。加羚羊角羌活赤芍地丁胡桃。口內吹以消疳散。至月餘全愈。約大黃四十餘劑。桑蟲大小約有六十。

申明惡色并治法

痘之色。血之見乎外也。血和則紅淡而潤。紅深如絳。則血熱之。燄昭然。熱若鬱而不透。則火燄不發而紅自乾。乾而至干色類椒皮。榮失其榮。而血幾於死矣。是紅之最惡者此也。熱劇則血瘀而色紫。紫而艷。雖瘀而猶可活。紫至于滯。則血被毒因而內攻。幾成矣。是紫之不堪者此也。黯滯青蓮。可無擬治法矣。是紅是紫。皆熱毒肆虐。在所必攻。然攻有不同。當分隱見。其隱與見之分。總以身之熱與不熱辨之。身熾熱者。熱毒燔灼。其血沸騰。攻宜與涼血清火並行。大忌辛燥。即當歸在所宜禁。以血中之辛藥也。體不熱者。熱毒回閉。血如膠漆。攻宜與導瘀活血共濟。大忌寒涼。即生地亦所宜禁。以血中之涼劑也。然辛燥尤不可櫻。總令血得其和。歸于紅澗。斯爲良法。

附紫滯治驗

張武老一繼愛三歲。一日熱如炮熾。次早即見痘。一齊湧出。稠無隙地。通身紫滯。神情躁亂。大渴不止。凡毒火燔灼於放標時者。是痘爲火裏苗。若不清其源。而但

以疏肌透表爲發。勢必至焦黑而內潰矣。急以消癍快毒湯。加大黃石膏桃仁。服及六朝。色轉紅活。顆粒亦鬆熾熱未減。至八朝晨刻放白。午刻而漿卽肥膿。以見血熱之痘。患火不清。一清而轉移之象勃然矣。寢食猶未能復。外以牛黃一分。珠末二分。以佐前方。至十二朝發臭。熾熱頓和。寢食俱安。漸收漸結。痂似松皮。嗣後又發血瘋瘡。終不外涼血解毒之劑。調治而愈。

### 附絳紅治驗

顧佞仲兄。韻翁老先生之公郎也。六歲時出痘。頗勻朗粗綻。却紅艷如絳。燥炙如火。腹內時痛。神情煩躁。徹夜不寐。此火炮于外而內又毒伏也。以清涼攻毒飲。減紅花加赤芍。服至五朝。痛止肌潤得睡。前方加甘草至七朝。絳色漸淡。頂白而肥。八朝漿卽肥濃。大便日解五六次。熱亦減半。飲食漸想。前方去大黃石膏犀角。加連翹倭參。十朝頭面先收。痂燥而白。根底猶附線紅。至晚身復壯熱睡不甚安。是後來餘毒之漸也。復用石膏。倍加生地。外以牛黃一分。珠末倍之。和於劑內。日進

二服。至十六朝。俱得平復。後用忍冬解毒湯。調治收功。

附礬紅治驗

雒城臧玉老。八歲一孫。身熱如炙。口渴煩躁。痘甚稠密。而色礬紅。三日期矣。始事者第以升發爲透。乾而幾黯。躁亂愈甚。身無安放。以必勝湯。用大黃三錢。加石膏黃連。日服。二大劑。五朝頭面紅潤。身尙未轉。七朝面部放白。行漿。通身乾而得潤。神精半爽。八朝成漿。而迅速黃熟矣。漿近板黃。凡血熱之痘。烈火一透。漿無漸次。惟嫌太驟。漿無不滿。惟慮板黃。板黃者。火竭倒壓之象也。倍大黃五錢。石膏生地兩餘。三劑後漿色潤澤。大便日去五六次。飲食稍思。熾熱未減。其外祖王氏至。見此藥劑。大以爲怪。停及一日。是晚躁亂如初。次日炮熱更熾。身戰如寒。漿殆變而躁實矣。悉如前方。連投二劑。振戰即定。再劑而漿色復潤。紅暈亦漸收漸淡。服及十四朝。瘡燄將熄。寢食漸安。遂服藥。聽其自回。厥後通身泛疤。環跳處起兩癰如拳。痛楚非常。以忍冬解毒湯。加羌活赤芍。服及十餘劑而愈。

附椒皮治驗

小莆黃元澄兄。一公郎。今之長公也。稟賦甚薄。時方二歲。出痘於癸酉春。體不見熱。徹夜擾亂。叫不絕聲。口膩如脂。痘無容針之地。晦色者。如蒙垢。乾紅者。似椒皮。顆粒不鬆。此毒伏于內。體故不熱。叫喊擾亂。以氣血受錮神。故不著晦色。椒紅。表裏雙關。痘鄰於逆者也。法當攻其伏。不使毒橫於內。制其毒。使氣血發煌於外。庶得挽回於萬一。若以稟薄爲慮。縱毒肆虐。是不知務者矣。以鬆肌通聖散。加大黃。減羌沿白芷。以其燥也。臨服和豬尾膏半盞。服及三朝。如水交石大便。日去六七次。眼即矇閉。唇口腫硬。亦毒參陽位之一症也。前方佐以大桑蟲。每劑一枚。服及六朝。身體頓熱。唇黑如煤。痘色變紅。而却燥。仍以前方加生地黃連。滅蜂房。赤芍。至八朝。滯色悉退。放白而不能肥。煩叫依然。面腫若有退意。是伏毒未能淨盡。而氣血一時不能充達故也。權宜之際。減大黃青皮。用參七分。芪一錢。而暫充之和。入大桑蟲一枚。二劑後。痘即肥泛。面即光榮。眼縫推脂。熱却如火。凡熱毒之症。乍

虛乍乏。與虛寒之症不同。一喚即醒。腥當即止。今熱如火。確烈仍在。以消癰化毒湯。減蜂房赤芍。日投二劑。外以牛黃一分。珠末二分。以佐之。服及十朝。漿滿。十二朝。累喘鬆。神情始安。乳食大進。痘痂終燥。身熱未和。服及十六朝。發臭。臂與膝生兩毒。滅生地加當歸金銀花貝母廿。朝。外俱得平復收功。

### 附紫艷治驗

有一朱姓之子。三歲。痘在五朝。熱如火熾。痘色紫艷。若花內雞冠。唇裂迸血。亦紫。躁亂如矧在灰。厥父母涕泣。以爲必無幸矣。然由可冀者。面目掀腫。雖紫能肥。速以必勝湯。重以大黃五錢。生地兩許。加石膏亦如其數。滅紅花蟬蛻。服及七朝。紫變爲紅。繼即敖白成漿。次日便老。更喜烈熱漸解。前方去葛根桃仁紅花。加佐參。重劑減半。又四劑回好。

### 申明四毒項

痘貴綻而紅活。平平若烙炮者。其頂若熨而平。其色若熟而腐白也。痘貴氣尊而

血附。下陷根腫者。頂若萎黃而脚不鬆也。一平一陷。均氣爲毒滯。一毒上壅而不得榮於囊殼。一毒下鬱而不得透於頂尖。治法皆所當攻。其熾熱者。重攻而寒之。熱不甚者。輕瀉而鬆透之。如煤類火燒者。其色焦黑。似乎火淬者。然囊頂尖圓者。本是妙境。而色焦紫。形亦何足取也。斯二者。均血被火灼。血劇則變也。大都不治得無他症。而顆粒磊落者。容或可治。熾熱者攻而寒之。更導其瘀。熱不甚者攻而導之。兼達其閉。

### 附頂平腐色治驗

同袍陳宗老。止宜老先生長公也。出痘於幼時。顆粒亦朗。其頂平平。若爲火熨者然。其色白如宿腐。盤暈掀赤心煩壯熱。以滌邪救苦湯。去澤瀉。加地丁生地丹皮。日服二劑。大便日解二三次。次日三朝。佐以大桑蟲。每日二枚。前方服及六朝。頂漸起而根漸活。宗老岳翁。舉其族中一同道至。以頂平而白。認爲氣虛拘古法。而傍日期。直用保元湯。陳老先生明理。信任弗貳。前方服及十朝。減滑石紅花桑蟲。

服至十二朝。亦得次第奏效。十四朝。收痂燥硬。身熱未和。根底尙附線紅。此熱毒未盡。將來餘毒之象也。倍用生地兩餘。外加石膏亦如其數。并金銀花。玄參。貝母。十六朝。餘毒聚於頸項。腫痛非常。強直不能俛仰。周身泛疤。寢食俱廢。又加地龍五條。一方服及廿四朝。始得脫然全愈。

附頂如煤治驗

王偉之兄。紹賓老先生之孫也。一公郎三歲。痘密如鋪。郭設磬紅。其頂黑如煤。儼若火焠者。大都居半。身無安放體不甚熱。以毒伏於內也。以必勝湯每服和猪尾膏半盞。服及三朝。更和大桑蟲以佐之。七朝頂與郭設俱轉紅活。減桃仁。乾葛。蟬蛻。加當歸。八朝身體壯熱。有放白成漿之勢。飲食大進。神情開爽。見景象進長。特爲無恐。而藥即懈弛。次日仍復躁亂。躁痒難禁。兩額搔破。痘色變而紫滯。悔之無及。速以胭脂膏貼其破傷之處。前方加黃連重。以大桑蟲一枚。和於劑內。連投二服。諸症減半。兩頰膿水溢滲。痘色復轉。繼而成漿結痂。神情寢食俱安。以一方貫

至十六朝。而得收功。

附頂陷根腫治驗

有一陳氏子五歲。見痘於隆冬。頂陷且深。時雖嚴寒。却煩渴躁亂。唇裂迸血。頂雖深陷。囊實根腫。而色乾赤。此氣血爲熱毒壅遏。不得申其領載之權。以故陷而不起。非寒凝不透。尤非氣虛不峻也。一始事者。不諳其理。徒以升發爲事。累日不起。至六朝驟然作痒。手舞足蹈。竭定痒之法。而莫禁。痘色更晦。頻頻乾嘔。此翁計無所施。謝絕去矣。據膿未成而痒沸。症固危篤。猶幸兩顛擦而未破。更憐其未得對病之劑。而竟棄之。覺爲不忍。先以胭脂膏貼其兩顛。以必勝湯滅桃仁地龍。加黃連錢許。蜜炒麻黃二分。臨服和大桑蟲二枚。日服三頭汁。大便去三四次。俱如膠漆。伏毒一鬆。頭面即脹。而痒遂定。上身亦起。又二劑色轉紅活。而渴愈甚。體熱更熾。是毒火發見之象也。下身猶然板滯。滅麻黃加石膏。酷好橘。非此不藥。每服必五六粒。至十朝頭面漿足。下部亦鬆。滅葛根。十二朝。頭漿斂而身漿徧。飲食得進。

神情未開。前方減蟬蛻桑蟲。十六朝諸症脫然。痲落過半。始易忍冬解毒湯。調治未及兩日。身復炮熱。眉宇復愁。肩發一毒。周身泛疤。復加黃連赤芍。外又以牛黃化毒丹。日服錢許。至廿四朝全愈。

附頂與色不侔治驗

朱石公兄。五歲一孫痘初見點。火熱如爐。悶亂喘急。昏暈如迷。遺尿目閉。正面一片礬紅。隱隱細如針刺者。日之有點。按之無粒。身上數點。而色焦紫。勞甚危篤。所冀惟在初見。以清涼攻毒飲。重以大黃減犀角。加地丁桃仁蟬蛻。二劑後額即透發成粒。通身俱透點成顆。而且圓綻。惟色紫滯。神情半開。又二劑額即光澤。身猶未轉。外佐以大桑蟲四朝。紫漸變紅而未潤。服及七朝。頭面成漿。周身放白。胃氣未開。前方減桃仁紅花蟬蛻。九朝思食。而壯熱未減。盤暈嫩紅。重以生地兩許。防其成火禍也。服及十二朝。諸症貼然。漸收漸褪。後易忍冬解毒湯而愈。

申明痘佳症惡

痘之吉凶世多還以痘準。如窠粒圓統盤膏肥紅。更兼踈朗。人人目之爲順。何處其有覆敗之患哉。不知痘象雖佳。症或凶暴。若以痘美而致忽焉。繼必痘隨症變。秀而不實矣。然症與痘俱由內而發。何以痘旣若此。症又若彼耶。蓋痘出於險者。毒恒有隱見不同。發見處。則氣血暢達。領載其毒。痘故得以光壯隱伏處。則氣血錮閉。毒無駕馭。橫症所以旁出。即以痘觀之。稀踈處。可以數紀。稠密處。無以容針。衝突處。至於重頂。陷伏處。過期不透。即以症言之。體熱如烙者。肢冷如冰。傾瀉如注者。倏爾閉塞。毋惑乎。痘無可虞。而有可畏之症矣。症不必多。美難勝惡。犯一痘忌。大局隨之。順不嘉多。逆嫌一點。此之謂也。

附一治驗

陳錫甫兄。七歲。一公郎。痘見三朝。勻朗粗綻。色甚肥紅。而少淡。痘象頗佳。身却熾熱。愁容可掬。徹夜不寐。云胸膈悶而不快。假令傷食。而然。痘其不能煥發矣。今紅而且深。緣毒火湧盛。氣血領載有及與不及。所不及者。毒在於內。而故有此症。以

滌邪救苦湯。減紅花澤瀉。加地丁四劑後。大便去三四次。胸膈便爽。睡臥亦安。熱亦減半。因痘可觀。攻不敢過。前方。減大黃三劑。至七朝前。態復然。痘覺停滯。求其故而未得。忽喉間沖沖欲吐。俄頃咯出濃痰。於乃尊之手。痰熱如沸。以見攻之未可已也。前方倍以大黃二劑。通身放白成漿。諸邪復退。惟熱方和。一方服及十二朝全愈。是痘因形色而忽其症。至變紫變黑而斃者。不可勝紀矣。

### 申明痘白雄標

痘若稀疎。其毒似輕。淡白則痘似不足。至於標痘。或紫或黑。或盤量嫩赤。中心黑陷。按之板實。是謂雄標。係一身痘瘡之主。主痘若此。則其稀者。諸痘爲梟毒抗拒也。致伏於內。故若稀。非毒輕也。白者血爲毒鬱。不得外著。故白非不足也。急宜刺之。吮出其毒。用胭脂膏封貼。視其神情內症。輕者以活血透毒。重則必攻。令毒根一鬆。通身透發。而白變爲紅矣。

### 附一治驗

凌長康兄一孫。二歲身不見熱。驀然左顛一報痘。脚地扁闊。色赤而乾。中心黑陷。按之板實。身有三四點。似痘非痘。俱淡白色。已三日矣。寢食如常。神情如故。所以然者。以痘之所中有淺深。淺者其毒鬆。其出易形圓而色潤。深則反是矣。機雖萌動。全體尙伏於包孕之地而未發。故若未痘者然。及所報之點。却如此形色。若不杜患於將來。任其自至。有越六七日。或八九日。有十數日外。湧出如麻。非紫黯。即椒紅。而不可救藥矣。有所謂等伴痘者。即此是也。令將銀針挑破。胭脂膏貼之。以必勝湯。滅桃仁生地。服及五劑。日以大桑蟲一枚。而身始熱。大便連去三次。通身透發。痘得踈朗。奪其勢於未成也。築囊尙不鬆泛。又四劑。圓綻光澤。標痘根擡頂腐。神情愁楚。以全軀毒湧未得成熟也。前方滅葛根蟬蛻。服及十二朝收功。

申明飛漿

痘期十四日。自放點以至落痂。猶十二卦之陰陽消長也。當初出一點紅。血初定位。純陰坤卦之象。陰極陽生。漸而復復而臨。臨而泰。三陽透於頂尖之上。陽交於

陰氣會乎血。痘故紅而變白。五朝大壯。六朝大七朝乾。六陽呈象。血受氣化。而至純陽。痘故白變爲黃。所謂七漿八足。足則爲膿。成膿而色自黃。是痘之應至而至。陰陽自然之理也。若未及三朝。諸痘未能放白。數點驟然黃熟。緣爲烈毒所衝。故爾漿成迅速。是謂飛漿。止一二點熟不甚熾者。以針挑之。用胭脂膏封貼。但與涼血清解。自放白成漿矣。如其迭見不已。熟如炮烙者。必攻。僅與清火涼血。終必焦紫。不能救援者也。

附一治驗

洪崖王老先生一孫。三歲。漢章兄之公郎也。痘紅如絳。熱熾如火。徹夜不寐。急以涼膈攻毒飲。用生地三錢。大黃錢許。日投二劑。三劑大解。僅二次。劑輕不能駕馭。頭面起二點飛漿。老黃如蠟。紅艷漸滯。前方用大黃三錢。生地七錢。石膏兩許。連投二劑。挑破飛漿點。以胭脂膏。是晚得臥。熱亦稍和。重劑減十分之三五朝。又起飛漿十數點。景色復然。仍以重劑。服至七朝。放白八朝成漿。寢食俱安。惟熱未減。

十朝漿老。頭面有欵意。紅暈未淡。十二朝足小股。起一癰如桃。夜復不寐。以胭脂膏敷其四圍。剩出其項。一方至十六朝出膿。諸痘平復。口生痘疳。佐以消疳解毒吹之。方易忍。冬解毒湯。調治全愈。

### 申明泡湧

痘瘡氣盛則泡。氣盛者。毒氣盛也。毒氣雄猛。反成遏鬱。遏鬱之極。內有衝突。以物極。則反也。遏鬱處項平頂陷。窠粒不鬆。連肉亦有板實。衝突處者。毒鋒如射。膺其鋒者。囊隨毒起。泡之有自來矣。所起乃郭設浮皮。不爲氣領。面囊故飄薄。不受血載。而根故無暈。氣血關鎖之極者。色白而囊空。氣得浮動者。內涵清水。血得浮動者。水若醃魚。血內瘀者。其色紫。血幾於死者。其色黑。宛若一棗桃之形。有粗有細。酷肖其色。有白有紫有黑。而有若醃魚水色也。總爲毒氣衝突之使。然症屬不治。但於放點之時。窠粒不鬆。根無盤助者。知其泡所必至。即以驅毒鬆肌。杜於未萌。斯爲良法。有膿成之後。過期不斂。膿化爲水。數粒相併。而若泡者。以針挑破自乾。

不爲泡論。

附一治驗

一施氏女十三歲。痘患血熱。氣滯。窠粒不鬆。紅盤肆溢。徧體如霞。以貧窘不事醫藥。八朝湧泡。幾三分之一。餘俱板平。九朝泡俱破傷。其浮皮有如麥殼。破傷之色。乾赤有如膚剝。火熱如泡。痛楚非常。衣衾難動。症在垂斃。厥父母哀號悲切。余憐其坐視以貧。而就死地。未免希援於望外。以生地兩半。石膏一兩。大黃三錢。與衆藥同煎。三錢臨起投下。餘佐以荆芥穗地丁赤芍山查青皮木通。投下二劑。連解六七次。破傷處俱有膿水濕潤。平板者畧覺鬆浮。又二劑。通身毒化成漿。頓思飲食。再劑而熱減半。漸漸收結發。癢發癢以忍。冬解毒湯全愈。

救偏瑣言卷之七

涼血撮要訣

問痘如何血用涼。陰血爲榮畏亢陽。陽亢血熱陰難養。榮失其榮燥怎當。始終滋

潤方爲貴。色一乾。憔悴必殞。燔灼放標焉得起。煎熬起脹。怎榮光。貫漿時被炎威炙。安得膿漿貫頂囊。儘有血旺得催成。迅速催成亦板黃。紅暈尙歎囊已黑。燥硬乾痲總不祥。涼血生地必爲君。次擇芩連犀與羚。陰中伏火丹皮徹。血分燔炎散必荆。重須石膏兼蕩滌。由來沸極必抽薪。輕惟生地與丹皮。荆芥連翹紫草宜。重可用輕輕勿重。輕重惟於痘上憑。或紅或紫艷如霞。體熱如炮重莫加。僅若清涼非重劑。終歸焦黑斷無差。詳明輕重熟爲先。熱盛應知血劇焉。熱重涼輕何克挽。熱輕涼重恐生寒。紫有黯滯紅椒色。身反溫涼熱又潛。毒火潛藏血又瘀。血瘀寒苦又非宜。破瘀攻毒斯良法。火透身燔方可除。兒體強弱可無拘。弱體當炎更易枯。有病病受原無損。聽彼熬煎痘可知。本體尙爾難固執。首尾何須又執迷。更有亢極戰如寒。面赤瘡紅身極燔。火迫大腸頻下利。神煩思冷體炎炎。火湧頭面赤駢駢。熱血醃皮痒自侵。胃難受穀惟思食。舌刺唇焦體若蒸。血皆熱極貌皆虛。參合端詳顯易知。當事幸毋云法古。膠持規則誤人兒。

清火窮源論

問痘緣何用清火。只因虐燄獨熒熒。不第肺金愁彼燦。坎宮五液畏其煎。五液所關滋五臟。離宮亦藉有丹田。萬物化生皆賴水。人身資水更何言。一生一尅本天成。水火攸關又獨深。木受水生寧第木。金爲火尅豈惟金。試闡坎離生與尅。痘宜清火殆非輕。

腎主五液一爲涎。涎養脾陰已土安。胃本陽明爲戊土。亦需汁養胃無愆。誰道中央無藉水。但愁甲乙不愁南。下文詳明

腎之液。入脾爲涎。土雖得火而生。然象中坤無專氣。無定位。寄旺於四季。爲己土屬陰。其性中和而喜溫。得腎之液。生發其涎。以滋培其性。而始得運化。消磨五穀。安穀得昌。血賴之而統。唇賴之而華。身賴之而潤。肌肉以之而滋長。己土乃安。胃雖戊土。性固純陽。然脾胃相通。達其液於胃。而胃得有汁。以見陽中有陰。得以受納五穀。胃庶無愆。不則俱爲燥土矣。燥則失其爲土矣。以證土之不能無水可知。

痘若火旺。燔灼其液。必口膩如脂。唇烈肌燥。目胞紅腫。渴而喜冷。口穢噴人。凡屬熱症。類多如此。木受水生。而土亦賴水滋培者也。火能生土。火極亦能侮土者也。此論邪火不可容。真水不可涸則然耳。若真火不及。容水泛溢。水大而土又崩脾。所以有惡寒惡濕之理。此五行反復顛倒。其可不知之乎。總以痘之形色神情見痘。及似是而非。一一而參詳之。無不得矣。

腎液輸肝。淚滿滴。長生得水。旺仍然。膽同津液。成爲腑。滋養曲直。得成酸。所畏莫道。惟從革。火到燎原。木盡焉。下文詳明

腎之液。八肝爲淚。肝生于腎。還以腎。旺肝得液。養則能以藏心之血。而滿血之量。謂之血海。目能視。筋能榮。爪能華。手能握。足能步。魂以之而能定。聲以之而能呼。皆津液外旺之象也。膽爲之腑。一氣相通。同爲津液之府。得以發陳而主春升。以遂其直達之性。而總成其爲肝。獨歸乎淚者。淚尤肝之精華也。淚足則血無不足。人故有過泣。至于淚不能繼。則血矣。以見血卽淚。淚卽血。木之藉水。可知不則肝

爲槁木矣。痘若火旺。煎及其液。肝液沸騰。目必多淚。其淚必熱。甚則有如膽汁。更有流血。舉一而言。凡肝熱可概。其長生于水固然。而帝旺仍需于水也。固畏金尅。不知受虐于火。更甚于金也。崔真人云。火不出則薪存。火發于外。薪之盡矣。

潤下從來尅土炎。誰知作苦反根鹹。令無腎液生心血。君宰神煩洩亦艱。須解象離非燥火。燥炎不輯自終燔。下文詳明

腎之液入心爲血。心爲神舍。係一身之主宰。得其液以養。而神始寧。慮事不煩。處喧無惡。外應舌榮。內行血海。以見火亦不能無水可知。有言汗爲心液者。此言心之汗也。有心血而有心汗。所以奪血者不奪汗。心固屬火象離。離下必需坎應。方爲水火既濟。而成其爲火。是謂坎離交媾。非燥火也。故分火論云。久而不輯。將自焚矣。痘若火旺。燔其心液。輕則煩躁。重則顛狂。緩則舌燥。急則黑刺如煤。或舒或弄。小腸乃心之腑。本同一氣。輕則短縮如油。重則溺血如膏。舉一而言。其他可知。第知火生于木。何知水足以濟火也。知水能尅火。孰知火還以自尅也。

佻武本是兌金生那曉西方得坎成涕滋氣主根何在。傳送和調得任因。若遇炎  
炎尤所畏。由來火熾不容金。下文詳明

腎之液入肺爲涕。肺爲氣之主。諸臟之華蓋。得其液以滋養。通調水道。運行百脉。  
潤乎一身。分布四體。以輸降下之令。鼻得之而瑩。能悉香臭。咽得之而清。聲音嘹  
唳。皮毛得之而潤。不至燥澀。大腸爲之腑。因之而傳送。得以和調。大便無愆。以見  
肺之賴腎可知。不則肺爲燥金矣。燥則不成其爲金矣。痘若火旺銷燦其液。鼻燥  
咽乾。皮毛燥炙。便閉。衄血。咽痛聲啞。甚至便血。瀉則暴注如射。凡屬燥金可概。金  
本生水。抑知金反資乎水耶。虛火尅金。抑知助水有以制火也耶。

南方本畏北方尅。縱有炎炎當易滅。誰知杯水與車薪。那論相生與相尅。腎主五  
液且猶然。餘臟當之何足說。詳明下文

腎爲五液之主。諸水發源之地。其爲水也。無成名無定液。形其無形。乃爲形君。兩  
目瞳神。其真水也。褚氏云。天地定位。水位乎中。雲興雨降。百物生化。賴爲水焉。人

肖天地。亦猶是也。以故腎之爲腎。木得之而能生。火得之而克濟。土得之而能培。金得之而能潤。充之本位。而精髓洋溢耳聰目明。骨力堅強。炎暑而不畏熱。藏精納氣。以待發陳。諸臟均以賴焉。五行之關乎水也。如此。若火之爲暴也。金遇固爍。木遇則焚。土遇雖生。過而又燥。本位過極而自焚。諸臟之畏其虐也。固如此。其所畏者惟水。此造物相制之權。五行生尅之理。乃若火旺。水衰。燔灼其腎。猶之杯水車薪。日受其燔。其臟必至腦髓空虛。遺精盜汗。骨蒸夜熱。軟弱無力。五色眩而五聲聾。人其失志。而色如妝。失其閉藏之令。反爲火所竭矣。水且猶然。而何有於他臟也。痘若火旺。煎熬及此。則無臟不銷。無臟不爍。不但重而險。必至逆而莫挽矣。千形萬狀。惡症難悉。大都於色。則灑黑塗硃。於形。則迸裂泡湧。於症。則空竅失血。腰如被杖於神情。則瞳朦失志。躁亂不寧。其大畧也。人知水能尅火。抑知水反爲火竭耶。知五行生尅之情。抑知水火尅關之奧也耶。此論邪火則然。如元陽真火。賴以生發。賴以鼓盪。賴以暢茂。賴以成熟。五行得之。亦豈小哉。

腎無瀉法是真詮。養病息火誠秘訣。火之爲病其症暴。火之殺人其死卒。火有君相局不同。君火猶客綏調燮。相火厲局始其然。客感邪陽尙難滅。痘毒火種先天。更慎暴令交相賊。勸君莫把等閒看。蹉跎因循令猖獗。猖獗之待枉用功。生死安危爭頃刻。

清火症治集

欲明清火之理。不可不窮其源。欲善清火之法。不可不察其症。如痘已發未發。以至成痂落靨。身熱和平更不見有煩燥乾紅燥烈之症者。此痘瘡應有之火。而無事情之者也。犯此煩燥數項。身卒不熱。反有溫涼。或有肢冷者。是隱伏之火。先透發以達其鬱。而未可遽清者也。若熱則火發見矣。發見而無甚惡候者。以荊芥連翹丹皮木通牛旁輕以清之。壯熱而煩躁者。前藥加生地滑石甘草。壯熱而乾嘔口膩者。前藥加黃連滑石。壯熱而痘色乾紅色滯者。前藥加黃連赤芍青皮紅花紫草。壯熱而燥烈者。前藥加黃連生地。壯熱如炮而燥炙者。前藥加黃連石膏大

黃生地。壯熱而皮毛若刺者。前藥加黃連。桔梗。葛根。蟬蛻。紫草。大黃。壯熱而叫喊不已者。前藥加大黃。青皮。赤芍。黃連。壯熱而鼻衄如桌者。前藥加大黃。生地。位參。犀角。黃連。壯熱而溺血者。前藥加黃連。山梔。大黃。生地。滑石。甘草。壯熱而腰如被杖者。前藥加大黃。牛膝。黃連。地丁。位參。壯熱而大渴不已者。前藥加黃連。石膏。生地。花粉。壯熱而瀉水如注者。前藥加黃連。滑石。甘草。澤瀉。壯熱而大便欲解不解。所解如漆如膠而愁楚者。前藥加大黃。滑石。青皮。黃連。赤芍。壯熱而大便去紫黑血者。前藥加黃連。大黃。桃仁。赤芍。壯熱而筋抽。脉惕者。前藥加大黃。青皮。黃連。稍佐小柴胡。羌活。壯熱而睛毛倒豎者。前藥加大黃。赤芍。青皮。壯熱而目紅如火。兩頰如硃者。前藥加大黃。生地。赤芍。羚羊。甘菊。壯熱而狂言弄舌者。前藥加黃連。生地。甘草。犀角。壯熱而痘色紫艷。或焮紅。或唇舌無皮者。前藥加黃連。生地。石膏。位參。壯熱而痘間硃砂癍。或紫背浮萍。或紫黯色。或發疔者。前藥加大黃。桃仁。赤芍。地丁。黃連。地龍。豬尾膏。壯熱而痘有貫珠堆聚。或面目預腫。或窠粒不鬆。或皮肉

腫硬者。前藥加黃連大黃地丁紅花青皮豬尾膏。壯熱而唇黑如煤。舌起焦刺者。前藥加黃連石膏生地。壯熱而目生翳障或週期不開者。前藥加黃連生地甘菊羚羊穀精草金銀花。壯熱而發痘癰者。前藥加歸尾羌活貝母金銀花。赤芍甘草。癰硬而熱更熾者。再加黃連大黃地丁。壯熱於放點之時。細碎如針砂者。前藥加大黃青皮地丁豬尾膏。熱更如火。色或礬紅或紫艷者。更加石膏桃仁生地赤芍。二三劑顆粒分明。色轉紅活可治壯熱而頭汗如淋者。前藥加大黃石膏黃連。汗收者可救。壯熱於結痂之後。神情尙楚。猶不思食者。必有餘毒伏而不透。前藥加大黃地丁黃連蟬蛻生地。壯熱而起牙疳。前藥加黃連花粉貝母。枳參甘桔。調入牛黃珠末。此症治之大畧也。若夫細微曲折。筆所難罄。推而及之。無遺蘊矣。痘症始終不可無熱。尤畏其壯熱。熱一過當。凡屬水位或被煎熬或被沸騰。或被燥烈或被焦枯。爲害可勝道哉。但有緩急輕重之不同耳。因其緩急輕重而因應之。治火無不當也。歟。

涼血清火不拘首尾論

痘瘡涼血清火。於起脹時。人人之能事。至於放點成膿結痂之際。知之者或寡矣。以爲痘之出。非熱不發。時方見點。以鬆肌透毒爲主。遽用寒涼毒冰不發。發亦不透。如春溫得以生發也。不知正取其溫。不欲其熱。若春行夏令。時便酷熱。萌芽有不稿乎。是拘於熱則行。冷則凝之說。誤之也。化育之妙。在不偏枯。獨陰不生。獨陽不長。毒火旺極。始即炮熾。五液沸騰。痘賴氣血領載而出。氣爲壯火所蝕。血爲烈火所燔。痘其何自而出。徒以透肌升發。俟其起齊。而後涼解。毒已內攻。痘其焦紫矣。是謂火裏苗。未有能秀者也。試比一物。其理豁然。譬之欲得乳鴨。煖其卵則生。寒其卵則隱。如欲其煖。而置之於烈火之中。以炙之。所欲其可得乎。痘之漿非熟不貫。以氣响血化而成。如夏熱得以成熟也。寒涼恐氣失其响。血失其化。而膿漿何自不知。夏熱象離。離下必需水濟。如亢旱之年。惟有烈日。萬物亦自焦枯。血熱其猶是也。亦有疑而相詰曰。失治于前者。其象如此。放點及今。清解已多日矣。從

前功力何在。熱毒其猶熾耶。曾聞痘毒出一步。則內空虛一步。邪熱縱有未盡。當亦毒隨漿化。即血熱者。不至敗於虛寒。當無事溫補足矣。緣何尙有虞焉。吁。總不知偏枯缺陷之理者也。輕淺者易清。重極者難徹。血熱之極者。偏僻於火。期至八九日。如日至中天。歲當三伏。於少陽初起。尙即熾熾。至此純陽旺盛之際。烏能便解。若從前失治者。至此亦無可清解矣。火得一分清徹。漿得一分融化。間有平時血旺之人。足以禦火不至焦枯。迅速催成漿。極黃老。然絕無榮活。滋潤之意。頂平囊實。是謂板黃。不諳其故。而謂膿成毒解。遂致誤焉。終亦必亡而已矣。論痘之痲。非熱不結。俗語謂蒸痘。回見火不宜熾。始終不可無。漿得肥濃。所異惟在收斂。有生。長。應有收藏。亦天地自然之理。痘至於斯。用燥濕斂陰。實脾利水之劑。以助其收。醫結痲。自是宜然。仍復涼血。以助其濕。清火以寒其胃。寒凝太過。中氣必虧。漿即肥濃。不幾始實而終虛乎。痘將何以終局也。如曰毒火未清。漿何能足。化毒成漿之謂何。而猶云未盡也。嗟夫。是但聞毒化成膿之說。而未知血盡毒解之理。化

毒成膿。蓋言氣化囊窠之毒也。血盡毒解。蓋言根盤血分之毒也。血有一絲之未收。毒有一絲之未解。氣之振作易血之成熟難。以氣輕清而無形。血重濁而有體。氣尊於中。氣清頂所以陷而能起。起而能白。白而能黃漿。雖血之體而鼓盪之權操於氣。氣毒不清。血其物而不化矣。血附於外。血清盤所以紅而能淡。淡而能收。收而能盡。血雖氣之輔。而乘載之體。在乎血。血毒不清。氣亦歸於淪喪矣。况云化者。頑而至化。毒將解而猶未盡也。解者化而至解。毒其盡而無餘也。故難極融化。根底血附線紅。其毒未爲盡解。乃若紅暈焮然。身熱未退。但見漿足。即與滲濕收斂。毒即隨火而乾。未盡之毒。仍歸于內。其醫乾焦燥硬。欲入皮肉。輕則發癩發癩。重則發疔。更有閩亂喘急。而莫可挽矣。可勝道哉。古人云。氣足血收。痘始成功。斯言不我欺也。

附一治驗以見大意

雉城周彝仲老先生。一令郎。即今之長公也。五歲出痘於初夏。大熱如火。煩渴不

止。兩額通紅。隱隱如針砂。身上稠蜜如鋪。乾紅滯色。二三道以危疑而推委。羸老憂慮而致廢寢食。余慰之曰。毒火誠烈可畏。幸得發揚治之得宜。當無患者。主翁稱謝不已。以涼血攻毒飲。加黃連三錢。生地六錢。連投三頭汁。次日顛上纍纍成珠。第燔熱更熾。前方加石膏七錢。黃連四錢。每服和大桑蟲一枚。時有徐培老至。與余甚合。是方服及八朝。色得紅潤。前方減乾葛。蟬蛻紅花。九朝放白成漿。十朝正面便有斂意。及盤暈未淡。熾熱未和。恐防火褐。重以生地石膏各兩半。黃連五錢。以制陽光。不令驟斂。毒復歸于內耳。血熱之症不慮難。收惟慮熱毒未清。乾收爲患。不得以九回十褐同論也。服及十三朝。面痂已老。身醫將半。胃氣漸開。熱亦稍和。有一友用白芍錢許。助其收斂。是晚煩擾不寐。未必因此作祟。見血熱之不可爲收斂計也。次日頭面赤腫。身熱復熾。煩擾如初。是餘毒湧發之象。悉如前方加蟬蛻。日服三頭汁。次日十五朝。發出血疹紅癢。自頭至足。無不徧及。夜即安睡。神復開爽。而熱未和。是方服至十七朝。方得霍然。以忍冬解毒湯加羚羊殼精。

草。以目白紅也。甘朝外全愈。

分別毒火論

毒與火自有相因。亦自有不同。有火者。必其爲毒。有毒者。未必其皆火也。毒盛而  
箋火者有之。未必火盛而毒不盛者也。如血熱毒盛者。血屬陰爲寒。陰且熱矣。有  
陽而反寒者乎。其爲毒也自火。故無有血熱而兼氣虛者也。是火卽是毒矣。如氣  
虛毒盛者。氣屬陽爲火。陽且虛矣。有陰而反熱者乎。其爲毒也。又寒。故不見有氣  
虛而兼血熱者也。是毒與火無干矣。然虛者。固未有不寒。即毒之實者。未必盡出  
于火也。是以苦寒之劑。自無投于氣虛之理。即毒之確猛者。亦還宜精察而明辨  
者矣。有如梟毒而濟烈火。並行交迫。治火治毒在所並進。不容偏廢。有如毒重而  
火輕者。治必因其輕重而輕重之。不得混而無別。有如毒火大重。而致遏鬱者。必  
先攻其毒。而後清其火。宜知先後。有如無症不實而火無可據者。不得以實爲火。  
妄投寒劑致毒凝而冰伏。甚哉火毒之不可以不辨也。○凡痘囊窠蒼老者。其毒

爲實也。老而踈朗者。毒輕者也。分珠而密者。毒盛者也。既密而間貫珠堆簇。成形成象者。盛而尤重者也。密而不成顆粒。與稀而形象繁多。更見要害之地者。類多不起者也。毒雖猛而能起能脹者。毒其見于外也。痘雖稀。陷而板實者。毒其伏于內也。○凡痘紅而色老者。實火也。老而能潤者。火實而輕者也。老而色乾。或紅而絳。色紫若胭脂者。均火之凶暴者也。紅而更黯。紫而更滯。俱淪于莫挽者也。以見毒辨于形。火呈于色。然毒之輕重見伏皆在于形。火之輕重見伏。全不在乎色也。又當於體膚之熱與不熱。以證其見伏。○如徧體壯熱者。火甚見于外也。色即紅紫而體膚若涼者。火其伏于內也。身壯熱而肢獨冷者。因氣滯而火偏伏也。有身燥熱頭汗如蒸者。火上湧而毒參陽位也。有靜則燥炙。動則汗洩者。火閃霎而無定也。是火與毒之呈于形色。昭于體膚者。如斯乃若神情見症。亦未始不昭其辨也。如愁眉蹙額者。痛也。諸痛皆毒。叫喊不已。皮毛若刺。轉側呻吟。屈伸甚楚。脉惕筋抽。衣衾難動。便時艱塞而容愁。卒然啼號而聲厲。此皆痛之象而毒之徵也。○

如躁亂不寧者煩也。諸煩皆火。不耐衣衾。夜不成寐。惡聞人聲。惡見人形。若欲求食。食之而又不欲。似欲思安。安之而又不樂。此皆煩之象也。如皮壅肉腫者滯也。諸滯皆毒。鬱悶不舒。身如捆綁。胸填腹滿。面目預腫。通塞不均。此皆滯之象也。如唇焦舌黑者燥也。諸燥皆火。大渴不已。口內如爐。溺血便紅。憶水思冰。狂言譫語。此皆燥之象也。是痛是煩。若滯若燥。總歸於以熱爲見。以不熱爲伏也。○治毒之法。審其輕重爲先。輕而發見者。治之以解散。輕而隱伏者。治之以透發。重而發見者。輕與之攻。而重與之散。既重而又隱伏者。重與之攻。兼透而兼散。治火之法。察其隱見爲先。發見而輕者。治之以涼解發。見而重者。治之以苦寒。隱伏而輕者。輕與之攻。而重與之散。隱伏而又重者。重與之攻。而兼與之散。攻毒不嫌于早。治火其於適時。攻毒當厄。可以該治火之效。治火失宜。更有以妨治毒之功。假令失于清火。其必紅。變乾焦。紫變焦黑。可勝道哉。外有當然之火。自然之毒。又非一概論也。有如痘脹而頭面發腫。眼封鼻塞。漿滿而身重難移。肢浮體胖。項大聲粗。回漿

發臭。此非自然之毒也乎。氣領血載。非熱何能達表。氣煦血化。非熱何能黃熟。漿老成痂。非熱何能收結。此非當然之火也乎。只合行其無事而已。亦何分別之有。救偏瑣言卷之八

論行漿

痘之體。始終一血而已。痘之用。始終一氣而已。血之體成漿。氣之用化血。漿之成血之化也。血之化氣之噓也。氣噓血化而漿始成。漿老則爲膿矣。血不得氣。則頑而不化。氣不得血。則鼓吹無地。氣血虛餒。則寒凝不振。毒火燔灼。則氣血沸騰。氣爲毒錮。則氣不動盪。囊窠不鬆。平陷乾懣。血爲毒錮。則血不融通。盤暈不活。乾紅紫滯。血足而氣不足。歸附厚而囊薄。漿不克溢。氣足而血不足。窠粒壯而暈淡。漿不濃厚。以見虛則乏其本。而漿無所化。實則受其虐。而化不得行。是則行漿之理。有當制以洩其過。有當助以補其不足。不可專以保元爲則矣。然補與瀉之形色。症狀不可殫詰。即逐一指之。未必無似是之誤。約之於虛實之的。則靡非齊也。虛

則斷無熾熱之理。熱劇似寒則有之。未有虛而熾熱者也。實則斷無皺濕之象。虛而乾樵則有之。未有實而皺濕者也。是謂江河一點血。辨別虛實之妙訣。不必拘其便與食。戰與渴。作痒責以氣咬。牙責以血紛。紕雜揉之象。悉於此而總括矣。痘無可議。漿忽停駐。此必因調護失宜。飲食失節。起居不時。香穢阻塞。是亦不可不察也。

### 論補氣

問痘如何用補氣。形色神情症悉虛。氣虛之痘。身不熱。縱熱溫和。非熾烈。胃寒伏火。儘多涼。形色現症是迥別。氣虛之痘。色不紅。縱紅嬌艷不蒼實。血虛血鬱。白恒多。非若氣虛。終嫩色。內虛不振。少克肥。或平或陷。根盤癩。皮薄肉軟。嫩溶溶。到得成漿。漿不濃。漿未稠。濃頂未滿。進退浮沉。漿忽停。輕不肥。濃不蒼。蠟重若錫。皮如灰白。儘有漿色。亦堪回。到得收回不能結。儘有漿薄。望堆沙。面不堆沙。腫欲斃。亦有當頂如針刺。漏出清漿。頂陷白。亦有痲薄。痘瘡凹。疤色淡白。無血澤。神情懶倦。

語話慵。重語聲輕音澁澁。氣虛之症亦繁多。總無烈火灼皮膚。惟有濕潤無燥烈。脉微緩弱無數實。此痘若還有別症。種種將來作虛論。不惟寒戰助元陽。痒疤方思固氣分。縱有似熱正由寒。寒極生熱古論定。毒即留連總屬虛。治毒亦須還養正。呻吟不寢莫猜煩。累日不解毋虞結。眼封日久非毒壅。求飲頻頻豈火渴。推之疑似且無差。明明虛症尤易識。知其虛寒看輕重。重不早圖必虛脫。

### 論補血

問痘如何當補血。色不榮兮嫌淡白。囊殼僅僅非空飄。囊竟空兮補何益。盤暈歸附亦不厚。竟若無盤難轉易。補血之功較氣難。氣主神兮彼屬體。點點有形難促致。長養工夫。由平素放點一見色欠紅。便慮成漿漿不濃。漿若不濃毒不盡。毒一不盡多別症。即使收回靨必薄。痘痂飄薄疤亦白。凡見血虛須預補。根得紅兮漿自足。漿足收回痂自厚。疤得榮兮皆血力。始終得血體無虧。體若虧兮必令實。有孩稟賦素血虛。有兒本質多內熱。恆有痘與娠相逢。亦有痘與經相植。又有善軀

慣腸紅。儘有疹後痢方歇。此等皆令致血虧。放點雖紅終虛白。血熱宜攻母問體。血虛偏宜固本質。欲審其虛人必清。唇口溫潤無燥烈。痘無癢點雜其間。按其體膚無熾熱。不則縱使色不紅。是爲痘中血鬱白。的是真虛芎與歸。倍用酒蒸淮熟地。血鬱用芎反提火。歸味辛香反助熱。白芍酸斂尤不堪。熟地庶幾終臑隔。若使血虛兼滑瀉。歸地潤腸亦不合。惟有嫩鹿茸爲良。佐以川芎功莫及。參芪同用亦相宜。由來氣有生血力。

### 論實表

何爲表。腠裏是也。何爲實表。固氣是也。氣爲一身之衛。內主充塞。外護腠裏。氣虛於內。則餒而不充。衛護無力。而致表虛。表虛則腠裏不密。而氣難存養。氣又因虛而致。虛而虛愈甚。故表虛之痘。客感易侵。已發未發之時。若有表症。便當疏邪實表。以豫防其起發不振。起發之後。痘之虛象立見。便宜扶元固氣。以豫防其痒癢之患。漿得過半。稍可以回。卽宜與斂。令氣還元。以豫慮其虛脫之地。不拘痘之首

尾。見之厚薄。但看神情懶倦。身體溫涼。而顏眊白。二便清利。唇口不乾不燥。凡此景象。按之體膚有汗者。是表虛也。若有表邪。不可專以疏散。及見囊薄脚軟。色或淡白。或嬌紅。漿清痲薄。絕無燥熱。雄猛煩燥乾紅。板實壅腫之象。即稠密毒盛。不宜清涼。亦不可專以解毒。悉以固氣實表爲先。稍兼佐理可也。

### 論健胃

人以飲食爲命。經云。地食人以五味。味有所藏。以養五氣。氣和而生。津液乃成。津液者。誠資生之源。成身之本也。是以安穀則昌。必得胃氣強健。乃能受納。故人以胃氣爲本。痘瘡初放。便能食者。是爲裏實。夫固爲順。卽不能食。毒尙未透。邪害空竅。故末之思。未足爲虞。痘若已齊。毒其盡行。於肌表而內空矣。空則宜思。儘有不食者。其胃弱也。何疑。至於成漿。則一身之精神發洩於外。一身之氣血耗散於痘。其內尤虛矣。尤賴飲食。相繼濟其空乏。庶克有終。至此猶未作想。卽勸勉之。而終不知味。亦不能多。安望其成痲而結局也。宜以保元湯。加山藥。蘆豆。姜棗。陳倉米。

以開助其胃。如身涼體倦。重語聲輕。漿清色白者。保元湯加白朮木香。當歸陳皮。姜桂大棗陳冬米以醒豁之。更有淡白皺濃如嫩腐皮。頭溫足冷。痲後目無精彩者。前方更加熟附以振之。痘若虛之劇者。不必待其起。齊成漿時。方思開胃之地。發始之初。便當早爲之計者也。必須以痘爲準。不見惡形惡色。不見一切燥烈之象。以症爲憑。不因毒侵火擾。不因一切閉塞之故。方可健胃。不則不可以常理論也。

#### 附一治驗

丁巳先君治一痘。十二歲皮薄色淡。頂平脚癢。始以透發。繼而大劑保元湯加芎歸淮地膏。得以成漿。至十朝不思飲食。主翁疑以過補。先君曰果爾。漿必蕪老。痲必燥硬。體或煩熱。種種反是。焉得云過。以納穀散。里以參朮各五錢。胸膈豁然。胃氣大開。無物不想。收痲落靨而愈。

#### 論安神

心藏神得血而寧。神寧則睡自安。安睡而神又足。兩相需而兩相輔者。諸病剝而之復。皆以睡中來也。血虛之體。痘兼稠密。氣虛者。有儘血化漿。而血無餘地。血熱者。有腐爛作臭。而侵淫日久。皆有以致血空虛。而神無所養。恍恍惚惚。不能收攝。而睡何能安。雖曰靜則神藏。寐固主靜。靜中之神不守。殆不令其藏矣。驗其症。於漿必清。於痂必薄。色必淡白。體必溫涼。一切燥熱之症。自不相涉。即血熱者。未必如是。然人必倦乏。目必少神。重語聲輕。色必乾樵一切。雄烈之象。自是鎖鑰。症難悉指。類多如此。一似傾國之兵。一似強奴之末。總歸虛論。法當以安神散治之。兼別症者。隨其症而損益焉。要不外以安神爲主。

### 附一治驗

戊午一錢氏女。年十五。適值經後。痘出甚密。鬆而囊薄。紅淡而乾。身體溫和。人若失志。睡中時獨語二三句。氣血兩虛。心神不足之症。始以養血透毒湯。四劑後。痘雖起發。形與色俱不振。四朝即以保元托裏人參每劑二錢。至六錢。黃芪四錢。至

一兩。芎歸熟地亦俱重劑服及十朝。漿僅七分十二朝寢食得半。痂不甚厚。疔欠光澤。十四晚徹夜不寐。語言不清而無頭緒。父母疑以過補使然。果爾身必熾熱。氣必雄猛。痂必燦硬。渴而思冷。脉按洪數有力。如是不寐。方是火毒內擾。種種反是。緣以痘本不足。而又值經後。明屬心舍空虛。以寧神解毒湯。如栝子仁。用參四錢二劑即愈。

### 論血虛咬牙

齒者。骨之餘。賴血榮養而得安。榮養而欲及其餘。其及亦不易故其生也。獨後未衰而即落。况血難盈而易虧者也。是以補血之功難。當養於平素。痘瘡初出一點紅。即血之體也。得血而載得血而漿。血虛之痘八九日後其血悉爲漿耗。何能有餘地以榮養其餘。所以齒牙妄劇而相鬪也。此蓋血虛使然。以保元湯。大劑芎歸淮熟地。更用嫩鹿茸煎膏。以補其缺陷。斯爲良法。此必漿後而見。尤無毒火可踪。纔合是症。

附一治驗

庚申一兒。四歲。痘在八朝。漿色淡薄而滯。根盤紅淡而乾。神倦而不容安。似躁而不能逞。身涼指冷。咬牙不已。兼有戰意。斃可立待。厥父母呼天號地。始事者曾以保元。輕而無效。余用參三錢。葦四錢。嫩茸膏。淮熟地膏各半盞。熟附五分。佐以芎歸。外山查三錢。以行其滯。連進二頭汁。更以大桑蟲一枚。服後若時雨之化。薄者厚。淡者濃。滯者潤。冷者溫。咬牙頓止。神情遂開。嗣後去茸附。前劑分量減半。十二朝左臂發一癢。以忍冬解毒湯調治收功。甲子以來。是症不概見矣。

論氣虛寒戰

痘瘡何自。而寒戰也。寒則陽虛可知。陽虛則氣自不足。虛劇則戰自作。氣爲體之充。充達於外。則密護腠裏。所以爲衛。充實於內。則元陽中守。衝寒不冷。所以爲陽。痘故得以領達而出。毒故得以鼓盪而化。漿故得以成熟而黃。亦何寒戰之有。若氣虛而痘密。以有限之氣。而周給一身之毒。發始尙苦於不振。至毒出一步。內虛

一步。痘得起齊而中空矣。漿未稠濃。而發皇已盡。頂未滿足。而力量已虧。其不寒戰得乎。故氣虛之痘。於放點時。細察其無一切躁熱之症。皮薄色淡。頂陷脚癢者。即宜預防是症。須知三禁不宜寒涼。不宜疏散。不宜過發。於放白時。便當保元。稍兼解毒。務令養正以化毒症。若已犯以大劑參芪。佐以鹿茸河車。稍加肉桂寒極而戰甚者。更加熟附以回陽。然必驗。其囊窠飄薄。淡白無神。體倦人靜。甚則錫皮灰白。鼓領搖唇。皴濕如濕腐皮者。方合是症。

#### 附一治驗

余荆己酉仲秋。忽壯熱如火。次日即見痘。細如芥子。色似胭脂。余是時未諳此道。先君以升麻葛根湯。加蟬蛻山查牛旁而升發之。二劑後狂煩謔語。先君以犀角地黃湯。加荆芥木通蟬蛻以大桑蟲一枚。三劑後熱即和。神即靜。周身起脹。而頂即白。以見囊時毒火之易退。聽如此時。懷娠七月。惟恐裏虛。即以保元湯。加芎歸淮熟地白芷姜蚤。日投二劑。每劑用參二錢。其如痘密無縫。氣血不繼。至八朝。頭

面灰白如錫皮。通身渾如嫩腐皮無二。搖頭鼓頰。寒戰非常。危在瞬息。先君以參芪各一兩。芎歸各五錢。熟附二錢。肉桂一錢。熟地膏二盞。傍晚投下。戰即稍定。沉沉睡去。至夜半大有轉機。醒來思食與粥兩碗。不鑿所欲。次日又一劑。午後通身漿足。身體和暖。不復戰矣。前方去桂附。參芪減半。十朝腐爛作臭膿。水淋漓。以敗草散收之。約用一斗。飲食大進。神氣日爽。以參歸化毒湯全愈。論胎前熱劑在所大忌。况桂附而重用乎。然痘犯大虛大寒。而不權其當務之急。勢必不起。何有身外之胎乎。母安則子安。理蓋如此。又當究其所以宜爾者。以其灰也。白也。濕也。皴也。身涼而神蕭索也。若是亢極作戰而混治焉。其害可勝道哉。

論氣虛作痒

痘症惟痒最惡。禁止能定者。猶可以修爲。若身不自主。必搔破而後已者。是爲外剝。毒即入裏。不治何以辦其爲氣虛。耶。見點之後三日之間。頂陷而兼囊薄。身涼而復色嫩者。是也。然氣虛何以致痒耶。蓋氣能蓄血。而使歸附圓淨。尤能鼓盪而

以血化成膿。膿成則毒解。尙何痒之有哉。惟是氣既已虛而血當其旺。是血有附氣之能。而氣無制血之力。致血肆溢而不得歸附焉。能化血而令成膿。血味且鹹。醃蝨皮肉而痒自不能已矣。治痒之法。一見其象。即以保元湯加姜蚤白芷。隨症宜加而佐之。庶杜患於未萌之策。如痒已作。倍用黃芩而助氣。稍加白芍以制血。其痒即止。鋪紅如錦者。又當重加生地荆芥以清徹之。悉用大桑蟲以鬆透其毒。面上破傷者。急以胭脂膏封貼肢體。雞禁者。以荆芥穗研末。捲於紙條內。點火燭之。或以炒黃豆盞許一。包乘熱撲之。或以茵陳爲末。與烟紅棗同搗成餅。燒烟薰之。亦治標之法也。

#### 附一治驗

嚴貞生兄。一公郎三歲。出痘於壬戌八朝。清漿未半而痒沸。禁止不定。面幾破碎。而眼將露縫。大便艱寒。糞少垢多。日去三四次。囊窠嫩薄。體不燥變。紅暈則肆溢如霞。身無安放。所謂氣虛血旺者。非乎。至頻解多垢。總氣虛不能化毒。毒不成膿。

而故垢從便出也。急以胭脂膏貼其兩額。用淮生地五錢安置其血。人參三錢。黃芪四錢振作其氣。姜蠶白芷大桑蟲爲催漿托頂之佐。白芍五分束其遊行。山查四錢木香三分以行其滯。傍晚投服。即睡着。夜半又一劑。次早盤卽歸附漿。即肥濃眼縫推脂正面推沙。便亦減半。嗣後收痧落靨。不脫保元清解。易若破竹收功。

論脾虛作瀉

痘犯氣虛。初朝以至七日候。一身之氣血盡發於外。內已空虛。嗣後之成漿收斂。所望於將來。若是在人事調劑之以繼之。須知氣虛者以陽虛之痘。而陽發於外。內乏溫養可知。脾喜溫而惡寒者也。既失其養。宜預防其泄瀉之患。魏氏之保元。陳氏之異攻。宜量度而取之者矣。若已泄瀉則真元傾洩。毒必乘虛入裏。反攻於內。變症蜂起。危孰甚焉。亦必察其輕重緩急而因應之。如第不實者。可以參芪茯苓陳皮木香甘草姜棗以質之。如滑瀉者。前方加肉果訶子以止之。如不惟囊薄而且皺。不惟色白而且灰。手指稍冷者。氣血中宮虛劇也。前方重以參芪。加鹿茸

少許鴉片以振之。其或四肢厥冷。搖唇鼓頰而寒戰者。此元陽幾脫之象也。前方加桂附。回陽反本以奪之。是症與治。必詳察真確。而後施無不當。若臧次仲之症。是一驗也。其或體熱燥烈。煩渴乾紅。焦紫痛楚。艱塞等症。即次數無度。純利清水。此是熱毒下利。不可言馬駝背也。自甲子以來。脾虛泄瀉之痘。間或有之。不概見矣。惜乎知之者寡也。

又一治驗

馮素若一公郎。三歲其時。丁巳痘出。甚密。人靜身溫。囊殼不老。頂白而不肥。盤紅而乾淡。六朝眼合不緊。鼻塞而鬆。起而少脹。夫固已見氣血兩虛矣。七朝滑瀉。日去三四次。淡黃其色。口渴不已。停飲於中宮。水聲漉漉。又見土虛不能制水矣。始事者因燥渴乾紅。且囊殼無漿。不敢實脾。恐益其燥。不知燥而實者。火燦金也。宜制陽光而金自平。燥而虛者。土不生金也。宜固中央而燥自解。况痘賴氣煦血化而成漿。氣血之源在於脾胃。今瀉而身溫。渴而停飲。紅而乾淡。囊薄而靜。種種不

足見乎其間。烏可齊其末而不揣其本也。以實脾固本湯。用參二錢。加黃芪三錢。暨姜棗連投二劑。轉機及半。又二劑。十轉其七。漿不甚濃。却亦堪回。嗣以五味異功散。加防風白芍。收結而愈。是症今不概見矣。

救偏瑣言卷之九

論痘變症有不常不古

痘於察形驗色之外。其虛實寒熱。則據症矣。然形色不一。症更繁多。一形而數症。因之者有之一色。而諸症出焉者。有之。症之所以謂變也。症固繁多。而變又有變中之常變中之變。常者與形色相符。依日期而至。其症著見。明顯變者。首尾偏峯。與形色兩截。其症深藏隱伏。如痘屬血熱。而實症迭乘。痘屬氣虛。而寒症竊發。此變症之常也。假令痘本實而症若虛。痘本虛而症若實。此變症之變也。漿前而客症多端。漿後而本症雜出。此漿前爲實。漿後爲虛之常變也。放標而即餒乏。不振結痂。而猶熱毒留連。此偏枯陷溺之異變也。蹈常不容作聰明。履變不可傍矩矱。

氣虛劇者。無症不虛。血熱劇者。無症不實。常症卽愚者易知。變者卽知者當之。苟不細細參合。一一端詳。亦有未易明焉者矣。虛實寒熱之症。自古有之。但虛寒多而實熱者少。實熱之症。漿前猶多。而漿後尤少。至虛實寒熱之變。似實熱而虛寒者。容或有之。似虛寒而實熱者。未之有也。自甲子以來。大運在於相火。放標以至落痲。虛寒之症。十不一二。梟毒烈火。十居八九。似火似實之症。百中無一。似虛似寒之症。無不皆然。症至於實熱。而似虛似寒。非至極不爾。以至極之症。工力有一未盡。尙棄井於九仞。令是非之界。不之明辨。工力先無所施矣。貿焉從事。以規則。是傍。不幾以非爲是。而妄投湯劑也。乎矧誤用溫補。人所易從。不至覆敗不已。如此殘害生靈。何其慘毒。總由於是非莫辨。余故列似是之症。詳辨於後。庶不至詣燕而南向也。

### 痘症變幻總論

症莫暴乎血熱。血熱之症。發見者易知。隱伏變幻者難測。色似胭脂。便鞭謔語。狂

煩燥亂。唇烈掀腫。頰紅面赤。發渴不已。皮臃肉腫。痛楚難堪。形圓頂綻。一連眸而莫掩者。至於血熱反常。似寒似寒。人不知之矣。有身涼色白者。有皮薄頂陷者。有昏沉如倦者。有四肢厥冷者。有寒戰咬牙者。有漿後頻解不食者。有痲後而夜不成寐者。有痘後而汗洩不已者。此等皆似虛寒。而孰知非血熱之劇。不至如此。蓋緣熱伏於內毒。藏於中。以故難以測識。所謂陽極似陰。火極似水者也。據其色。猶必合其形。驗其外。猶必參其內。內外詳辨。容其未悉。更復察其神情脈理。則其所疑似而隱伏者。自莫能逃矣。氣虛難辨者。亦有之。終不若血熱之變幻多端。令人不得其故。且痘至疑難。人多疑其虛不疑其實。况痘易趨於補者。失補而致誤者。猶少。惟此慘害生靈。迷而不覺。倍於虛者。十居八九。敢以似虛之症。辨之以鳴同患。此成敗之關。生死之界。未必無小補於痘也。

### 論火毒咬牙

咬牙屬血虛。症固有之。不知毒火潛伏於肝腎者。與血虛者更甚。毒火雖盛。暴厲

而發揚者。當無是症。即伏而在別臟者。亦不患是惟在肝。肝則藏血而養筋骨。在腎。則主骨而生肝。還以血養。是猶唇齒之邦。兩相輔而兩相需者。况肝應春陽。腎應冬藏。升沉之臟。兩受其虐。而失其和齒其妄劇而自鬪矣。猶是鬪也。虛者聲鬆。彼則聲緊。虛者在於漿後。彼則於放點時而即相憂。痘當初放即血虛者。血於何耗而便及此。則其受虐於毒火也。可知。不必辨其形色。症狀神情。而已昭然矣。但察其痘色。焮紅而熾熱者。以清涼攻毒飲。滅紅花以涼解之。痘色乾紅。或紫滯而身不熱者。以涼血攻毒飲。以透達之。不拘焮艷乾滯。熱與不熱。凡有諸般痛楚。及內症凶暴者。以必勝湯。焮艷者。滅桃仁紅花地龍。乾滯者。加紫草以攻逐之。有出而未暢者。通加大桑蟲蘆筍以透之。成漿後者。通以化毒丹。調入牛黃珠末以解之。至痘之日期。體之厚薄。不可執而論也。如王舍叔之愛一證矣。不贅治驗。

總 毒火深潛腎與肝 升沉二臟擾何安

訣 齒牙相憂聲何慘 透解潛藏自貼然

論血熱作痒

諸痛爲實。諸痒爲虛。又云氣愈虛而愈痒所以然者。以氣本虛。毒原不熾。氣虛則正不勝邪。無以制化其毒而固然也。以故治痒之法。必從補氣。有血熱毒盛而痒者。大相懸矣。蓋熱毒壅於皮肉。氣爲遏鬱。血被煎熬。氣非不足也。錮之則陷於無用。血非自熱也。灼之則迫其遊行。血味且鹹。遊行皮肉痒之所以作也。以清涼攻毒飲。滅紅花。量用大黃。重以石膏生地以清涼解之。以殺熱毒之勢。庶氣血不受邪虐。氣得以化血。血得以成膿。何患乎痒之有哉。是謂實者虛之。正妙於實者也。今人不審虛實。執古方而泥成說。凡遇痒症。概以參芪投之。不應責以補之力薄。遂思重劑以勝之。氣不受補。而火愈熾。愈熾而痒愈甚矣。嗟夫何異抱薪而救火也。然果何以辨其爲毒火耶。曷不觀形與色。內與外之呈見乎。同一爭也。虛則白而實則紅。卽同一紅也。虛則嬌而實則滯。色之不侔已較然矣。再觀其形。虛者皮薄而濕。實者皮厚而燥。按其體膚有溫涼熾熱之殊。察其神情有倦乏躁亂之異。

一一殊途。種種各別。更或兼之於痛楚或熱如炮烙者。前方重以大黃。或色若胭脂。諸般失血者。前方加桃仁。正面稍有擦意。不拘破與不破。即以化毒丹調入油胭脂內。用綿紙貼之。須令嚴防。勿使抓破。破而血得成流者。猶幸無恙。破而乾赤。皮如剝去者。無可生之理矣。凡放點時。熱一如炮。不分界地。或焮紅或紫艷。即當預爲之地。重以涼血。急以清火。內症猖狂者。尤宜速與蕩滌。不可臨渴而浚井也。外有調護過煖。助火而致痒者。急令撤其重圍。或減其衣被處之清爽。而痘自安。若黃憲副一公。郎足證。不贅治驗。

總 實痒紫艷或焮紅 燥烈皮蒼毒火擁

訣 血被煎熬氣被遏 輕宜涼解重加攻

### 論熱劇寒戰

痘瘡寒戰。似無區別。孰知有先後之分。關虛實之異。先寒後戰者。寒極而戰。虛劇之象也。先戰後寒者。戰極而寒。熱劇之象也。故戰不可概以寒視。寒不可概以虛

論也。氣虛寒戰前已陳其概矣。更以熱極作戰。戰極而寒者言之。火之爲火。其性甚烈。其發甚暴。喜散而不受遏鬱。火雖熾而發見者。徧體皆熱矣。雖熱而身靜。以火得順其性也。熾而劇則遏鬱矣。鬱則拂其性矣。以暴烈之性。欲達而不得達。則氣血與毒火五內搏激。其能免身之不振戰乎。猶之水拂於火也。身雖戰振。其面必赤。其體自熱。戰之不皆出於寒也。明矣。火鬱固戰。過鬱則寒。是熱劇反見水化。如強酒於不能勝者。反爲酒所寒矣。酒性豈寒者哉。夫亦因其過而致反也。身雖惡寒。肢雖逆冷。其氣必雄。其神自躁。痘必紫滯。脉必沉數有力。寒之不皆出于虛也。又明矣。凡血熱之痘。熱極作戰。不問別症。不拘首尾。熱如炮烙者。以瀉黃散主之。量症加減。如身體反涼。更喜溫煖者。熱毒深藏固閉也。以散火鬆毒飲。隆冬加炒黑黃二分。先達其伏。毒火鬆透。身必熾熱。方以瀉黃散清之。或兼諸般痛楚。或空竅失血。或熱如火熾。皮肉腫硬者。不拘熱與不熱。必用大黃以宣暢之。庶不至毒火內擾而至攻潰也。

總 寒戰陽虛自古云 熱極水化少知音  
訣 若還悞認陽幾脫 火上重油禍匪輕

附一治驗

一兒三歲。痘在八朝。膿漿滿足。盤暈焮赤。忽生振戰。衽席皆動。按其身熱如炮。此充陽作戰也。以清涼攷毒。飲用石膏五錢。生地八錢。黃連一錢。大黃五分。減紅花地龍犀角。加姜一小片。以行重寒之劑。連投二頭汁。其戰即止。又二劑。紅暈漸淡。至十二朝。熱得和平。收功弗藥。

論熱毒下利

痘出於肌肉。而脾爲之主。脾氣實。則精神內固。而外旺。痘必易出。易漿易靨。若泄瀉。則脾弱而內虛矣。痘必有應。至不至之虞。變症由此而出。而脾顧不重哉。以故泄瀉之痘。一切寒涼清解之劑。在所必禁。然非所以概熱毒下利之症也。熱毒大盛。其毒不能盡行肌表。勢必留滯而內擾。喜內實不受邪侵。注於大腸。大腸爲傳

送之官。不受毒害。而芻逼迫於中。頻頻下利。雖若與泄瀉之相似。而實與泄瀉不相侔。瀉者滑而不禁。彼則艱而閉塞。瀉者澁而不實。彼則凝結如膠。亦有純利清水者。或穢氣之不堪。或便色之雜出。或眉愁而腹痛。或躁亂而不寧。辦痘之色。輕則乾紅。而重則紫滯。驗痘之形。輕則鬆綻。而重則板實。卽在收靨。痂結之日。何莫非餘毒之使然。視其痂皮。則燥硬。按其體膚。則燔灼。口內或膩而成疳。目睛或紅而有暈。如是而投於香燥止塞之劑。不猶之欲北路而南轅者耶。燭其故。而清其源。輕者解毒鬆滯。重者清火攷毒。使毒火不至內擾。而腸胃清寧。便不止而自止。脾不實而自實矣。若以瀉治毒火。愈熾愈壅。七日前立見乾枯焦紫。而膿漿無望矣。七日後。餘毒無歸。胃氣閉塞。喘急煩躁。而終斃矣。質質焉見其煩解而不究其所由。亂施死方。我之所不解也。

總 熟毒衝腸便自頻 喜腸傳送毒難侵

訣 頻頻欲解仍艱塞 誤認脾虛終內攻

附一治驗

朱元鄉一長公。幼時痘。犯血熱之痘。自放點以至成膿。極其涼血解毒清火。漿甚濃厚。至收痂時。大便忽頻。日去二十餘度。至次日難以數紀。乳母與婢輩。苦以穢惡不堪。嫌以寒涼太過。而然。烏知熟毒下利之理。果因寒涼。身體不宜熾熱。唇口不宜焦烈。神情不宜煩躁。痂皮不宜燥硬。今種種其然。脾豈虛寒者乎。以瀉黃納穀散。加地丁金銀花貝母。服至十四朝。左顛頓起一大癰如桃。大便即止。諸症減半。更以牛黃一分。珠末二分。調入化毒丹內。用貝母湯送下。十六朝膿自口出。前方減生地加連翹甘草。十八朝全愈。是症難以筆記。聯附其一以證其概耳。

論胃熱不食

痘不思食。固有胃弱而不納者。尤有邪熱犯胃而不思者。要其虛與熱之別。總以痘爲憑。以症爲準。痘屬氣虛爲虛。痘屬血熱是熱。更參之於當下之症。與見前脉息一一而詳合之。自無不得矣。不可以日期爲則。以漿前爲實。漿後爲虛。尤不可

泥於胃強則納之語。而概以虛論也。概以虛論。固不可與語道拘於日期。亦非爲調元之手也。何也。氣虛之痘。漿雖未行。其中氣已虧於不足。血熱之痘。漿雖充滿。而清氣尙受夫邪迷。又有自放點以至成膿。飲食不減。至漿後而胃氣忽閉者。漿豈未化而毒輕。已化而反重耶。蓋痘之始終。合天地四時之氣。前七日。其毒升發起脹。自內達表。猶春夏生長之令。毒不太盛者。其毒得盡行肌表。胃氣自清。其故飲食如常。七日後。其毒成膿漸斂。自外收內。猶秋冬收藏之令。毒得盡淨而收。胃氣終清。若毒有未盡。痘隨火斂。是謂火褐。非正收也。火毒內斂。胃得終於思食乎。其痘膿雖老。而紅暈未收。痂雖結。而焦燥難脫。身多壯熱。脉自洪數。與胃虛不食。遠隔參商。凡痘身熱未和。紅暈未收。漿雖極老。不可與斂。若與斂之。不啻胃受火閉。一項般般餘毒不可勝紀矣。務宜重以生地。佐以黃連丹皮荊芥牛旁木通甘草。熱如炮烙。盤量。歛紅者。更加石膏。俟其火毒清解。聽其自收。自無不開之胃。如以始爲熱而終爲寒。始爲實而終爲虛。一參朮姜棗之類以補之。如火益熱矣。今

之不食之症。往往如是。若章繼翁之症。臧比老之郎可鑒矣。外有飲食過多。或痰結氣滯與寒邪邪阻塞。暑熱於犯者。皆令不食。此痘外之雜症。非氣虛血熱之所致也。然以神情症狀。并日逐調護而審其故。昭然於心目矣。治驗不贅。

總 百凡飲食最爲先 不食應知各有緣

訣 胃虛不食身涼靜 胃熱人煩體自炎

### 論火擾不寢

痘有夜不成寐。在七日前者。人皆知其爲邪熱內擾。至成漿後者。皆則以心虛矣。豈不曰血化成膿而血爲之虛耗。膿成毒解。而邪熱俱已稍融。不知血虛而火毒不甚熾者。理固然也。深藏猛烈者。漿非不足。而漿不能盡其毒。火非不洩而洩未能罄其藏。外雖成膿結痂。而內之餘炎未盡。臟腑未得清寧。况心爲君火。以火遇火。較之餘臟。更不能容。且當收斂之時。非若漿前發揚之候。此蓋心被火灼而然。身必壯熱。人必強揚。唇或燥裂。痂或燥黑。症亦不能枚舉。種種皆類是也。較之心

虛之不寐者。自是迥別。明者察其毒盛則解之。火盛則清之。或透肌。或涼血。俾邪熱得以洩越。有發癩疹而安者。有發癰毒而寧者。有於疤內復泛而得熟睡者。是皆毒有所歸。而神自清寧矣。尙何有夜不成乎。若以安神藥必收斂。是猶執熱而反令探湯矣。若錦宗兄小愛之症。一證矣。不附治驗。

總 火擾不寐始曾聞 漿後猶云論似新

訣 烈火燎原非亦滅 莫輕斂志與安神

### 論渴有虛實

咽喉乾燥則渴。然乾與燥。有虛實之分。乾爲虛。而燥爲實。均屬肺病。咽喉屬肺。肺屬金。金生水而畏火。金虛則不能輸降下之令。猶之白露不降。水乏其本。華池乾涸而渴從之。其渴稍飲即止。俄頃又乾。喜熱而惡冷。聲音低小。脉必微煖。法當以補液湯生其津液。而渴自止。實則金被火燥。虐燄如爐。五液可竭。而肺更何言。其渴百杯未足。俄頃又燥喜冷。而惡熱聲非啞而即厲。脉必洪數。法當以清金解渴。

湯。制其烈火而渴自解。虛與實之別。辦有未確。更合之於神情症象。與夫痘之形色。一一而參考之。自無不得其真矣。

總 渴有咽乾肺屬虛 金虛補液自相宜

訣 烈火刑金咽更燥 火清方得救華池

附一虛渴治驗

吾郡吳二公祖。一公郎四歲痘稠密而氣血兩虛。五朝以保元湯。加芎歸淮地而得成漿。終不肥濃。八朝發渴。頻頻思飲。與之盞許。即拒。俄頃又乾。身熱不壯。神情懶倦。便亦不實。以補液湯。加芩木姜棗。服及十朝。渴得漸解。脾氣亦實。減訶子黃。莖加茯苓白芍。十四朝眼白起紅。瞳多淚。以奏凱和解。飲減當歸牛旁。加甘菊穀精草。調治收功。

附熱毒發渴

同袍沈岸老一痘症。放點以至起脹。乾紅晦滯平者半。陷者半。身涼而神却燥。頻

頰腹痛欲解不解。此毒火遏鬱使然。以鬆肌活血攻毒服及五朝大便連去四五次。火毒一鬆。身即壯熱而神靜。色轉深紅。發渴不已。重以攻毒清火。八朝放白成漿。險變爲順。與一不韻者同事。惟恐虛寒繼至。減大黃石膏二劑。前症復然。唇多不寐。而渴更甚。仍如前方。十四朝漸安。渴解十六朝調理收功。

### 附首尾燔熱發渴

顧韞翁老先生一公郎。今倅老也。痘出四歲。屬血熱毒盛。放點色似臙脂漿。老盤猶焮赤。結痂燥硬乾焦。始終壯熱煩渴。初朝即以涼血清火攻毒。進藥甚艱。服不及半。致熱毒難清。喜得進牛黃化毒散。不拒日服錢許。自七朝服及十六朝。熱毒漸減。幾一月始得全愈。熱渴難解如此。若魏氏論渴云。火非虛不發。一以保元湯加麥冬五味。欲壯水之源。以制陽光。理固有之。其可以概施也耶。

### 論汗有補瀉

汗者。液之派也。腎之液。自毛竅出者爲汗。汗之是亦水也。可知其本於肺之通調。

四布而得潤乎一身。滋養四體。猶之白露下降。草木敷榮。是水藏則存而爲液。疏則洩而爲汗。潤則皮毛枯溫。鬱則肢體浮腫。寒則凝熱則沸。液汗之故也。亦多矣。但以痘瘡之汗而言。症順則存而色潤。氣虛則疏而汗洩。火沸則汗湧如淋。不可專以氣虛論也。痘如淡白無神。身溫體倦。種種合乎氣虛者。當以實表爲主。否則氣既已虛。而復汗洩。於放標時發。必不振。繼必平陷。痒癩寒戰灰白。悉如蜂起。當以保元入珍湯。減枸杞。加白芍五味以收之。如其紫色乾紅。煩渴壯熱者。以其火擾於內而故水沸於外也。不拘首尾。當以清涼攻毒飲。以清徹之。外有血熱之症。調劑得宜。不爲毒害。至痲落時而有此汗者。是餘毒無所容。以汗而解也。驗其因汗而適快者是也。固不宜斂。亦不宜清。惟以忍冬解毒湯。減紅花。加當歸足矣。不可以過求也。凡火擾而水沸者。七日前而誤斂之。梟毒閉塞。必成內潰。七日後而誤斂之餘毒不解。輕則纏延疲敝。重則一簣之虧矣。

總 痘汗如何云表虛 身溫淡白不允肥

訣 紫艷身燔爲火沸 一虛一實少人知

附一治驗

一七女歲。痘未見點。壯熱如焚。靜則燥炙如烟。一轉側而汗卽沾衣。俄頃卽燥動。卽復然。次日見痘細密如麻。紫艷與礬紅各半。煩渴躁亂。以涼血攻毒飲。減山豆根。加紫草。服及四劑。顆粒分明。而汗卽止。五朝頭面肥潤。七朝通身放白行漿。自上而下。景象頗佳。但烈熱如故。絕不思食。神情尙楚。前方服至十朝。胃氣畧開。夜臥將半。頭面收結。痲色乾燥。身上將臙。而紅暈未收。熱終未減。前方減紫草。服及十三朝。通身復汗如蒸。逾時而燥熱等症。與夫寢食神情。蒙蔽之象頓開矣。方易前方。以忍冬解毒湯調治。收功。然變幻之症。難以悉載。能以數項。推類以盡其餘。庶不爲似是者誤矣。

救偏瑣言卷之九 終

救偏瑣言卷之十

論結痂

痘瘡行漿。三日後。期至九十朝。其得膿漿飽滿。氣足血收。此陽極化陰爲姤。時當收結矣。始於人中。以及兩頤鼻準。漸至地角。以至周身。未及巔頂足脛。次第收結。痂如鎔蠟初凝。厚而滋潤。是謂珠結。毒盡解矣。其餘可知。不須調劑。有等氣虛之痘。待補成漿。漿終淡薄。至此雖云收結。痂皮飄薄。神色枯淡者。謹防精神不繼。鮮克有終。以保元八珍湯。減川芎。加山藥。以濟其匱乏。更有土虛不能制水。濕潤不斂。漿水腐白。頭溫足冷者。前方熟地。加河車膏。茯苓白朮。以助其收結。如便不實。而胃弱者。前方減當歸熟地。加茯苓。陳皮白朮。渴者前方減枸杞。加麥冬五味。睡不熟者。減黃芪。加棗仁。暨紅花分許。餘可類推。所謂痘後無實症。總歸虛治者。此也。有等血熱之痘。稠無隙地。得力於清解成漿。連成一片。腐爛作臭。煩熱猶在。癩赤猶存。終係邪陽太旺。不得陰氣收斂。而不能成痂者。以消癩快毒湯。減蟬脫主之。外以金蓋散。收其熱毒。亦有同於血熱浸淫日久。至後氣血虛耗。不能收結。驗

其煩熱退聽。神情懶倦。腐爛處。肉地與漿水淡白者是也。以保元回漿散主之。外以細茶末以清其肌表。至有梟毒烈火。血熱之極。非不極其清解。其如烈熱未減。紅暈未收。膿囊便有斂意。謹防火禍。以成倒靨。以清涼攻毒飲。重以生地石膏主之。庶不至焦痲黑靨。令毒復歸於內。更有從前失治。漿未成熟。血暈如霞。竟有烈火燔灼。已成倒靨。焦黑加煤。平者如螺靨。陷者成煤坑。間有老痲亦黑硬如鐵。如此等象。若變症雜出。皆毒氣內攻所致。不得目之以膿成毒解。而作虛論也。希接於望外。以必勝湯。倍用生地。復以大桑蟲以攻發之。熱熾者。加石膏黃連。根下腫硬者。貼之胭脂膏。得盤暈漸淡。漸收。平陷者。鬆。黑硬者。潤。或泛疤或補空。或發癩疹癩疔。毒仍達表。可慶重生。凡血熱之痘。均朗稀疎者。必能成漿。漿必肥濃。第瘡燄未清。收靨可畏耳。是痘因其漿濃。且以日久誤認。以回頭。不食者。以之開胃。不寢者。以之安神。發潤者。以之補液。下利者。以之實脾。如此等類。促其斃者。不可勝紀矣。僅記其一。以爲觀鑑云爾。

韓人穀兄。去年有一公郎。三歲痘十二朝。絕不思食。筋抽脉惕。徹夜不寢。始事者以胃弱心虛。以宿夜曾受驚恐。藥以安神開胃而愈甚。邀余往視。痘甚磊落。第熱尙如烙。盤量脈赤。膿囊大半爲烈火燔灼而焦。宛若螺厖。神情散亂。而毒已歸於內矣。其未變者。猶然圓綻肥黃。余曰。是痘熱毒未清。未宜收斂。以故痂如螺厖。黑而又薄。是倒靨而非正收也。奈何。此友穀然曰。君不見其膿之滿足耳。膿老自是當回。愉然信爲無恙。余遂別。是夜即斃。

#### 附一治驗

潘梅老五歲一愛。痘犯血熱。十朝。壯熱未和。膿成未熟。紅暈未淡。而即乾收。宛如火焮。兩頤平斂。痂燥而薄。面猶赤腫。始事者亦知其爲熱毒。已清解於前矣。第清而未暢。次日又便利作痒。似乎補瀉難施。謝事去矣。勢在曇卵。但血熱尙熾。症必因之。自無兩局。以滌邪救苦湯。減大黃紅花。加地丁生地。外以牛黃一分。珠末二分。劑以藥調送。兩頤以胭脂膏封貼。服二劑而痒定。四劑平陷俱鬆。燥黑者轉而

滋潤矣。減青皮加金銀花。至十四朝熱和神爽。大便頓止。寢食俱安。遂以忍冬解毒調治收功。

### 論落靨

易癩易落。收局之佳境。然易癩有凶。有吉。易落有吉無凶。以邪毒盡淨。而無餘毒。傳灸癩故。得一收便落。其疤大都榮潤。肌膚大都滑澤。亦有疤白不榮陷而曰。凹下者。此因氣血虛之。而非因易落。而有此象也。以保元八珍湯主之。外此有爬肌抓肉。累日不脫者。有擦去疤有血迹者。有褪去兩邊中獨留一線者。有半掀起。半咬緊者。有日久方脫。而疤凸起者。有四沿浮皮掀簇者。有身褪而頭面不褪者。或有血疤。或紫黯。或黑黯。或似茄花色者。痘疤不一。皆爲毒火。傳灸所致。身熱溫和。無甚惡症者。涼血解毒而清。散之。身體壯熱而多惡症者。攻毒清火。重以涼血而散解之。輕則泛疤發疹而愈重。則發癩發疔而解。癩落之際。症亦多端。總以痘爲準。餘毒作崇。治毒爲主。毒盡元虛。保元爲要。縱有實中虛。虛中實。亦權其緩急。

輕重而因應之。不可遺其重且急。而反迂務其輕且緩也。若執以痘後無實症。總歸虛治。誤之甚矣。

### 論餘毒

餘毒者。痘瘡未盡之毒也。痘瘡毒化而成漿。漿老而成膿。膿成血。盡而毒解。氣血虛者。血不患不盡。患漿不成膿。膿成而毒盡矣。熱毒盛者。漿不患不老。而患血未收。血收而毒解矣。氣虛之症。行漿時或失於內拓。拓而尙有未足。或人力極盡。而氣血其如虛劇。幸不至灰白平陷。漿蓋不能老而成膿。餘毒有所不免矣。血熱之症。行漿時或失於涼解。或依傍日期。而解之不早。或慮寒涼太過。而工力有未暢。或循規則而反投溫補。或極其周酌。而毒火其如雄烈。幸不至紫陷乾焦。而膿或板黃。即鬆而或燥。卽潤而紅暈尙有未收。或收而未盡。帶火收結。餘毒尤有所不免。更有甚焉者矣。痘有氣虛血熱之分。順逆險三途之異。而餘毒亦然。驗其毒不紅腫。身涼體靜。或神情懶倦。其得飲食進而睡臥安。毒且小而小且軟。痛楚不甚。

者屬虛而順者也。以參歸化毒湯而調治之。毒若大而白。平而板。不能起發。恐容可掬。靜而忽躁。神情終倦。涼而忽熱。未幾復涼。能食而不能強。能睡而不能熟。兩目有神。神思能定。此屬虛而險者也。以加味內托十宣散治之。庶得以潰而成膿。而毒其化解矣。毒不拘大小。按之板實。白而帶青。神思昏倦。痛楚難支。兩目無神。口出涎沫。體欲靜而不得。聲欲出而難揚。此虛而逆者也不治。血熱之辨何如。有發癍。有發疹。散于周身。布于四體。一發而即身涼體靜。神情爽朗。此血熱之順者也。其未發之前。熱必不免。睡必不寧。痲必老色必燥。而血必不全收。神必旺而氣必粗。此發癍發疹之機也。不諳者。以膿成可以收斂。以收結可用調補。致毒不得發洩。往往有輕而變重。重則有不可知之患矣。不拘已發未發。均以消癍快毒湯。而一清徹之。可無不廖矣。若癍則毒聚矣。毒併於一處而發。勢必潰而得解。其毒紅腫。發於四肢。兩肩兩脇。熱不甚熾。寢食如常。亦險而順者也。以活血解毒湯主之。發於兩顳腦後胸背環跳等處。身體壯熱。痛楚殊甚。毒大而且板。

則險矣。然得板而不硬。大而紅腫。熱雖壯而體不燥。痛雖甚而不至難支。飲食與夜臥俱半。亦無大害。以前方加地丁白項地龍并蜜湯調服。養金化毒丹。以治之。發於百會太陽少腹上下。及穀道湧泉等處。板而更硬。紅而帶紫。更有凝結成疔。形似螺肉。毒黑而堅。根深八肉。不拘是癰是疔。燥熱如炙。飲食不思。徹夜不寐。此險而逆者也。癰則內服養金化毒散。外即以此散調入油胭脂內。以綿紙攤貼。中留一項。疔則用銀針挑鬆四圍。亦如癰之貼法。不必留頭。次日有膿水即用軟絹抵乾。將此散糝八四圍。仍以胭脂膏貼好。又次日復如此法。俟其疔褪出。竟以此填滿復貼之。以疔潭長滿而止。二毒通以必勝湯治之。庶可保全生命。藉令發于咽喉當心腰膝。不論小與大。疔與癰。癰則按之硬而青黯。或紫黑。疔則大如錢。聲啞氣促。神情躁亂。兩目傍惶。如畏刀鋸。如見狼虎。惡聞人聲。惡見人形。或身涼而乾噁。或身熾而肢寒。症難枚舉。凡此等症。痘卽屈指可數。痲落無遺。亦禍不旋踵矣。外此毒聚于肝。則目起翳障。或兩目掀腫。內背膿血淋漓。或有如豬膽

汁有過期不開。均以撥雲散治之。不可點洗。外治之法。眼科規則之劑。以療之。毒必不消。火必不散。而眼廢矣。留於脾。於上則唇裂掀腫。堆結如煤。動即血流。血即燥結。於下則注八大腸。下利惡垢。猶之滯下之疾。如漆如膠。有純下鮮血。痛楚不堪。若以瀉治則枉死矣。以滌邪救苦湯治之。便血者加生地。血紫滯而堅凝者。加桃仁。艱塞之極者。倍大黃滑石。痛極者亦如之。更加赤芍。留于胃。則口內生疳。或牙齦腐爛。甚則穿腮落齒。漸入咽喉。名爲走馬疳。一日爛一分。十日爛一寸。以忍冬解毒湯。加黃連山豆根。佐參桔梗以治之。外吹消疳解毒散。有熱毒上壅巔頂。諸陽會集之所。時值炎天。臭惡薰蒸。潰爛生蛆者。以清涼攻毒飲治之。剪其髮。去其蛆。以金銀花煎湯淨之。或金蓋散或黃金散。研入冰片青黛而外治焉。有餘火留于肺。津液不能上行。咽喉乾燥。音啞而發噎者。以清金飲治之。毒鎖咽喉者不治。時值隆冬。表邪未盡。風邪與熱毒鬱于皮毛。至收臘時。發出如炎天沸子。名爲水珠毒。以清肌散毒治之。餘痘般般。總不越一虛實中來也。虛者眞

元不繼。實者。邪毒留連。痘至收痂。一身之精神發皇于外。兒體之實者且虛。况虛者乎。此時火清毒解。而擬調治。詎不晏然。即毒有未盡。僅屬強弩之末。補中帶解。亦無難事。至若仍然清解。復用寒涼。猶然蕩滌。似屬理之所無。而實勢所必至。斯亦難矣。故治痘難。治偏峰之痘尤難。偏于虛者。難于始。偏于毒者。難于終。漿前恐櫻其毒。而孰知不豫則廢。漿後防其虛脫。而孰知當加除惡者矣。人言百日是痘。蓋謂惡痘有潛藏之毒也。虛實之辨。必究其真。不令有似是之誤。斯爲盡善。如毒色白而身涼者。似虛合之於唇裂。迸血非虛也。頻解不食似虛。合之於腹痛。乾嘔非虛也。羸瘦日久似虛。合之於氣雄壯。熱非虛也。寒戰咬牙似血合之於面赤。燥熱黑硬。乾痂非虛也。毒色紅而時燥。時熱者似實。合之於兩眼倦開。重語聲輕。非實也。便閉思飲似實。合之於唇白而潤。不見裏急。非實也。多言妄語似實。合之於四肢不舉。重語聲輕。非實也。餘毒不一。合之於平而塌。涼而軟。非實也。似是之症。非語言所能罄者。惟在於會心者得之。得其真實。真虛而更權其緩急輕重。治餘

毒無餘蘊矣。

附一氣血兩虛餘毒治驗

已未。有一陳氏子四歲。痘甚稠密。而且一齊湧出。但得分珠。頂平脚塌。囊薄色淡。人靜身涼。種種犯氣血兩虛之症。四朝乘氣血尙未離散。即以保元湯。人參一錢。芪錢半。加芎歸淮熟地。山查六朝。頂起而囊不蒼。盤紅而色終淡。眼欲合而未緊。鼻將塞而猶通。進不勇者。防退速。前方倍以參。芪加河車鹿茸二膠。方得行漿。終不能肥。九朝寒戰。漿色腐白。前方重以參四錢。芪六錢。更以熟附六分。肉桂四分。漿轉肥濃。十朝漸收。漸結。寢食漸安。見景象得轉。以艱於進藥。姑恤停止。十二朝。忽眉宇不開。是晚臥不能安。次日曲池二穴。俱發一癰。其色淡白。按之不熱。拂之痛甚。以加味內托十宣散。四劑後。方紅活。三日後。不潰。亦不退。以參。芪僅錢許。而故淹滯如前。重以三錢。一劑即潰。左肩與右肋。又起一毒。紅腫且熱。以毒未盡。故復發。此得氣血振作。故熱而紅腫。是期十八日矣。前方減參。芪俱半。以胭脂膏塗。

貼。留出其頂漸消平復。聊記其一以見大意。血熱之餘。已散見于前不贅。

### 娠婦痘

娠婦出痘平順輕鬆者。以安胎爲主。兼治其痘。是百病以末治之之謂也。安法不外于保脾。養血。寬氣道。清子宮等項。然放標時。則以寬氣爲重。而帶升發。氣鬆則痘亦易透。升發亦無病於胎。兩全無害之道。寬氣。加陳皮。川芎。酒製香附。大腹皮。蘇梗。或蘇葉。升發。如蟬蛻。桑蟲。荊芥。牛旁山。查。桔梗。甘草。乾葛。或升麻之類。起齊候。則以清子宮。爲重。而滯涼解。清則與痘適宜。涼解與胎適合。有並行不悖之妙。如黃芩。山梔。生地。位參。甘草。清之屬也。如連翹。牛旁木。通黃。連。荊芥。山查。涼解之類也。行漿時。則以保脾爲重。而帶排膿。痘之成膿。本于血。血之根本出于脾。保脾正。催漿之地。如茯苓。白朮。砂仁。陳皮。甘草。保脾之要劑也。如人參。黃芪。木香。糯米。大棗。姜。蚤白。芷。催漿之首藥也。回漿時。則以養血爲重。而帶斂陰。胎之所養。全賴乎血。血之所有。皆耗于漿。補血且得陰收之義。如當歸。白芍。丹參。以補其不足。如

茯苓米仁防風甘草以助其收結。擇取金銀花牛旁連翹倭參貝母等味。以稍解毒。此蓋語其常非所。以論其變也。籍令痘犯氣虛囊薄脚散者。豈得拘於胎前母氣滯。而必以蘇梗蘇葉乎。荆芥乾葛無論矣。錫皮皺濕者。豈得拘于子宮宜清。而必以黃芩梔子乎。連翹黃連無論矣。更有頭溫足冷灰白寒戰者。豈得拘于胎熱則動。置桂附而非講乎。僅以參芪苓朮。何能砥柱也。即令痘犯梟毒烈火。血受其殃者。如紫艷礬紅等色。失血內瘀等症。氣受其虛者。如貫珠攢聚等形。躁亂燔熱等症。勢必制其亢。攻其毒。令氣血歸于和暢。乃得化而成膿。若泥于百病且安胎。惟知胎以血養。血以脾統。而不治其毒。必得胎前之毒。不治而自解。則可不則任其燔灼聽其內攻。可有身外之胎乎。痘症本輕。按投重劑。胎必受之。胎損而母亦隨之矣。痘症惡極。劑雖極重。毒其受之。毒解而胎自安矣。凡病權其輕重緩急。重在務本。不得專事其末。急在除邪。不得迂。務其本得其要領。總歸一道。

附一失治之戒

有一許氏之室。懷娠四月。身忽大熱如火。不一日而見痘。稠無隙地。細碎如麻。躁亂不寧。胸膈迷悶。痘隣于逆。所可取者色得肥紅耳。猶在初見。余欲攻毒導痧。兼清肌疏透。庶幾內毒一鬆。得分顆粒。未必非挽回之一機也。厥夫惑於不韻者之言。執意不欲。予辭弗藥。九朝而斃。而胎卒墮。其所以墮者。豈脾虛血弱之故。烈毒內攻。熱血煎熬。臟腑且潰。而胎有不墮乎。况小產者亦多矣。何常墮而必斃。則知其墮也。以毒而斃。亦以毒也歟。

附一懷娠出痘治驗

一友朱良老其閭懷娠六月。出疹于隆冬。躁亂不寧。燔熱如火。道中一友以寬氣養血安胎爲主。佐以甘桔牛旁蟬蛻荆芥疏肌透發。三朝疹非不透。熱終如火。煩渴不已。嗽而增喘。徹夜無眠。至五日不惟不寐。并不能就。枕不惟喘急。并不能出聲。面如土色。目睛直視。手指厥冷。渴想西瓜六脉絕無影響。其娠追下。小腹痛楚難禁。身無安放。立刻可斃。舉家但願得母無恙足矣。余殆弗藥。惜其未得一對病。

之劑。覺有不忍爲熱腸所迫。以大黃五錢。石膏一兩。滑石生地各七錢。炒黑麻黃三分。佐以赤芍丹皮牛蒡荆芥地丁木通甘桔。以蘆筍煎湯代水。二劑後諸症稍緩。徧覓一大西瓜陸續以濟其渴。又二劑其疹又透。諸症減半。而娠不追下矣。前方減麻黃仍以二劑面顏頓轉。喘定而得伏枕熱湯亦殺大半。娠即安然。但咳嗽不止。前方去大黃赤芍丹皮。減石膏滑石及半。加枳參花粉黃芩金銀花二劑。熱渴俱平。胃氣大開。據垂斃重症。幸而復生。尙須調理。見安。和而遂弗藥。越數日後。娠復不安。但不追下。飲食減半。復有餘熱口内生疔以消癰快毒湯。減蟬蛻丹皮赤芍。加金銀花天花粉。佐以消疔散吹之全愈。是症所用湯劑。據常格胎前所大忌者。而得既保其母。并安其娠。見有病病受。不第無損于胎。正見所以安之之妙。疹與痘雖異其所異者。惟氣虛痘耳。若烈毒之症。原同一軌。令是症但留其母。猶畏大黃等味。利害並存。尙費躊躇。竟爾子母俱全。凡志醫者。可不深思而潛玩也耶。有懷娠而宜峻補回陽者。若余荆之症可徵矣。不贅治驗。

痘後調護宜謹

痘後表裏俱虛。調護悉宜加謹。一有疎漏。以實投虛。病即終身不拔。非細故也。最要有五。一節飲食。飲食不節。脾氣受傷。脾係一身根本之地。精神生發之源。有因過飽終身不能多食者。有爲一物所傷。終身不能一見者。有因偶爾失調。致脾氣不實。遂成痼疾者。皆能致肌肉不長。面不華色。然此尙屬日後久遠之慮。魯有東林陳九嶷兄。當年一公郎。痘已收功。喜食圓眼。因過愛而不之禁。縱及勗許。遂致腹脹如毬。噦不絕口。一懷抱而更加喘悶。以手扶其肋下。坐於膝上而已。極其撫摩而不稍息。以和脾宣化飲。投及三劑不效。舉家徬徨。追悔無地。余思藥雖對症。賴脾運化。叫喊幾及一晝兩夜。神其敝矣。仍以前方加參三分。助脾運化。外以山查二兩煎湯。代水服及愈時。兩眼朦朧。有睡意。因得漸漸懷抱。竟爾睡着。自午及申。醒餘大解極多。所食未化者幾半。遂得開爽調理而愈。幾乎有意外之變。飲食不謹如此。一防客感痘痂初褪。膝裏開洩。直抵筋骨臟腑。六淫易襲。起居一有

不謹。輕則傷而重則中。非泛常感冒可例。恒有寢食如常。神情如故。絕無介帶而卒然昏暈者。其由此也。若韓尺老之長郎。可鑒不贅治驗。一或煩擾痘後精神。盡發於外。縱得歡容笑口。僅脫離苦境之象。精神氣血。尙未之復。必得靜養可致。儘有愛而不當者。戲弄而引之。致其喜以爲喜。不知傷其神矣。即房闈舉動。亦當以靜爲貴。去年胡漢老三歲一長郎。痘方初起。時值炎天。以房不寬暢。移於廳後左右紙窗。日光耀日。痘眼初開。何堪當此照耀也。余令以青紗蔽之。嫌氣悶而非聽。且頻頻煩擾。非弄其笑。即以換衣撲粉。殆無寧刻。欲其適體。不知傷神何地矣。苦口論之。全不入耳。次日兩目上竄。牽唇鼓頰而斃。一體寒暄。天時冷熱不常。痘後之體。又難調攝。衣服之間。稍冷卽傷榮。過煖卽傷氣。或驟寒而不之加。驟熱而不知減。寒與煖。太人不覺。痘體受之。較常人十倍矣。有因寒而卽寒熱似瘧者。有因熱而卽神情昏憤者。難以悉指。由不體寒暄之故也。富貴之家。過煖更什居八九。不知過猶不及也。一戒好潔房中。幃帳衽席。自是宜潔。至痘兒之體。自頭

而及身以至手足任其穢則穢任其臭則臭。究其所以日久而穢臭猶存者。以收斂之局未盡也。收斂未盡。精神猶在於肌表而未還元。欲滌其穢而反以滌其神。如之何其可也。更有可畏者。體膚柔塌猶蛻及蛻骨之餘。輕則皮毛若刺。重則湯氣入裏。喘急腫脹。可立而待。有一兒痘將一月。其母愛潔竟濯之以湯。而且暢其浴。次日。徧體浮腫喘急而莫救。可不慎歟。

### 痘前諸瘡宜急治

諸般瘡瘍。在痘前者。務宜急治。必愈爲貴。萬一與痘相值。痘即極順降而爲險矣。險自可知。以痘之最惡。無如外剝。外剝必有於癢。瘡則未有不癢者。痘即可免而瘡爲之招。連痘亦沸然矣。或得瘡老稀疎。間瘡而出者。即癢或可禁止。設若稍密。其必遶瘡四畔。攢集其窠。以瘡爲壑矣。水從下流。毒從虛發也。至痘起脹時。浮浮一片分瘡痘。一擦而身無完膚矣。雖有善者。何能濟其患哉。世人不諳者多。恒置而不問。有誤認瘡痘總是一毒。反暢其發。以爲稀痘之計。不知痘係交媾慾火之

毒感於娠之先者。瘡乃成孕之後受母腹之積熱。或生下後濕熱流火所發。與痘絕不相侔。累月經年。何能致稀一粒。亦有瘡後而果稀者。適相濛也。與瘡何與。又有無稽之言。云嬰兒體膚柔嫩。瘡藥一及滲入骨髓。發痘不出。舉世訛傳。誤人不淺。但治瘡有法。當以漸而施。先於胸腹。次日肩背。又次日四體。結末頭面。治其一。緩其三。周而復始。以愈爲度。乃爲良法。不則治之太驟。柔體不勝。反致變矣。不可不知。

### 附治驗

余甲寅生一兒。百日內。生肥疥瘡。曩時亦惑於人言。而不敢治。漸漸通身布滿。無容針隙地。日夜啼號。乳食減半。余思痘固當慮。尙在日後。而况未確瘡毒。如此猖獗。危在旦夕。孰緩孰急。當務自在。選合掌丸。如前法治之。內以忍冬解毒湯。減紅花加黃栢生地。佐參。治及半月而愈。後來出痘頗密。而透發甚易。人言不足憑如此。嚴琢菴老先生。吾宗儻如。芋奕啟兄。諸公。郎俱百日內。生胎毒瘡。其瘡成暈。

成圈中低陷浮突。宛如梅毒。目之可畏。有遶臍者。有在耳畔者。有遶臍門者。餘處難。以數紀。俱以牛黃八寶丹五分。一丸日進二服。外以化毒丹調入胭脂內。一一貼之。週時一換。更佐以忍冬解毒湯。加羌活。佐參黃栢桃仁赤芍。減紅花與丸間服。乳母忌魚腥麵食。姜椒奕。啟子幾百日而愈。憫如子愈而復發。幾及兩載而痊。惟嚴先生所藏牛黃金寶色。川中亦不偶者內。服與外治兩倍於二子。不及兩月全愈。嗣復出痘。皆收功無恙。臧顧渚老先生一孫。廣師兄之子也。生雙胎。先下地者。三朝便生毒瘡。細似針沙。赤如紅霞。三日後。連成一片。一擦而膚剝去。偏體如焚。以痘前瘡。當任其生。不事醫藥。十數朝即斃。其次焉者。於十朝後亦發此瘡。與前無異。予曰。是瘡於母腹中受積熱。積毒而發。名爲血霞瘡。治之不早。有性命之憂。不但不利於痘也。余言及此。追悔無已。云初生者。昨已斃於瘡矣。今治之。可無恙乎。余授雙仙化毒丹。并牛黃八寶丹二方。一治其內。一治其外而愈。厥後出痘。何嘗受治瘡之累。如此治驗。難以筆記。聊存一二以證焉爾。

### 誤治之戒

吾郡有爵尊望重。年逾五旬者。一鄉紳。止有一公郎。兩月內生胎毒瘡。與前三症宛肖。竟憑老嫗婢尼之言。以痘前瘡。宜發不宜醫。反令乳母食魚鮮雞笋以發之。其瘡日盛。延一不韻者。以是瘡似梅毒。與大人梅毒同治。用川椒一兩。全蝎五錢。與奶母假道於乳。亦妄冀震拔其毒。服及過半。其瘡愈大。圈愈突。陷愈深。隙地復增。血點細瘡。無不徧滿。熾熱如火。膚赤如霞。目紅口燥。徹夜煩擾。邀予往視。勢猖獗矣。以兩月芽兒。如是之毒。如是治法。不覺爲之愴然。予大戒其乳母忌口。急錄牛黃八寶丹方。令速修合。將如治三家之法治之。容或可挽。先以消癍化毒湯。減蟬蛻二劑後。猖獗之勢。亦得稍緩。嗣復聽卜云。爻象無咎。但別有天醫。以余方爲廢紙。老嫗輩仍復主張。將所餘震發之劑。罄盡當忌之物。大啖。遂至不救。惜哉。

### 失治之戒

姚世所老先生。三歲一愛瘡。將愈矣。惟兩小股至足。尙未結靨。而痘繼之。九朝漿

及下部。痘與瘡統成一片。浮浮痒沸。十朝愈甚。兩股交擦。和皮剝去。痛狀可慘。惜頭面及身。成痂過半。因兩足作楚。連垂成者。亦歸於敗。十一朝而斃。瘡之惡也。如是夫。

### 論大黃

有客過余而問曰。伏火伏毒。非清解之能事。攻之固不容已矣。然大黃之力。斬關奪門。爲蕩滌之將軍。元梟毒火。當之尙爾。退聽於氣血。則獨無所虧乎。氣血若虧。孰爲領載。孰爲化解。而終始其功也。子曰不然。有病則病受。病受其藥。則鎖鎔在邪毒。邪毒銷鎔。則氣血不爲邪毒桎梏。而融通灌溉於痘矣。不第於氣血無損。正以救護氣血之地也。邪正相乘。一負則一勝。負既在此。則勝自在彼。恒當衡其輕重。所重在補。養正則邪自除。所重宜攻。驅邪則正自復。何虞氣血之受損乎。蕩滌之法。古來不數見也。間有用者。不過錢許。至三錢一劑。至二劑。要不出便閉者。方用。便利即止。若錢許以至兩計。自放點以至落痂。甚至瀉利者用之。而便反實。

有純利清水。而攻猶未已。是豈索隱行怪。好奇示異哉。奈世運變遷。甲子以來。痘瘡迥別於前。是年曾有一痘。磊落粗綻。肥紅光澤。圓滿如珠。目之者咸贊其爲狀元痘。予按其身熱如火。口中乾膩。予思痘象固佳。不宜熱渴如此。謂其父曰。是痘氣血強旺。又得內無伏毒。外象故好。然熱渴大甚。火毒非輕。速宜涼血清火。不可懈也。此人全不之信。不事醫藥。至九朝帶火乾收。燥硬焦痂。有如瀝青。盤彙肆溢。有似紫霞。喘急燥亂。而莫能挽矣。以如是之痘。縱失醫藥。亦何至於此地。乃竟以一熾熱。一膩渴之嫌。便同於逆。可遞而推之。熾熱而更頂陷者。當何如。頂陷而更紫滯者。又何如。紫滯而更稠密者。又何如。稠密而更加貫珠堆簇者。又何如。貫簇珠堆而更內多惡症者。又何如。是知清解所不効者。當破其凝滯之毒。而佐之以清解矣。至破滯而不能取勝者。當進而攻其伏藏之毒。而佐之以散達矣。放點凶惡攻之而起脹。得以清徹則已。起脹未應。攻之而成漿。得以暢遂即止。乃至有收結而始盡浮者。有落痂而始霍然者。然其所以然者。原非有怪異也。前之毒盛者。

至起脹時毒盡發於外。所謂毒出一步。內虛一步。至行漿時痘稠密者。惟有氣血不繼。故必以保元爲要。一失內拓。必至白陷。灰陷。錫皮皴。濕氣離血散而敗。今有毒盛者。恒多伏藏於內。輕則內擾。重者內潰。內擾者。猶可以清解疏達而起。即有不應。蕩滌之。而自鬆透矣。若內潰者。臟腑糜爛藥。卽金丹亦爲無用。而况清解乎。故內毒甚者。無論發始半途卽結尾。收成餘殃未疹。當如除惡務本。必期於盡。但盡之之法。又當察其輕重緩急。而因應之。不可執成見於我也。純熟於此。不特險之重者。得以轉危就安。卽鄰於逆者。施功於已發未發時。儘可挽回。若腰如被杖。叫喊不已。空竅失血。蚤癩蚊迹。紫背浮萍。纏腰兩截。托腮鎖項。睫毛倒豎。稠密細碎。面目豫腫等症。前賢往哲。列於不治之條。皆可以起。尤宜治之於早。乘毒無定位。內未受攻。乃克有減。若至三日期。其內已受攻。亦無如之何矣。

### 論石膏

石膏名爲白虎。湯火泡燃。桐油調敷。痛卽如失。性果何如其寒也。人有言疹要清

涼痘要溫。琴連犀角尙不敢輕投。恐傷脾胃。用之而且兩許。更有始終不徹。不惟無傷於脾胃。而更得益焉。何也。喜溫之說。前人言氣虛之痘。若犯血熱。熱而且甚者。內煎熬而外沸騰。五內之地。輕則恣其鎖爍。重則爲其焦枯。蓋以先天毒火。火而出之於毒。不啻一熱而已。毒而濟之於火。其猛烈。當何如已。石膏雖大寒。僅足以制其亢寧。有餘寒。而傷及於脾胃乎。儘有落痂之後。火邪盡淨。復起牙疳。目生翳障。但有未盡之餘。不見有過寒之症。總不越有病病受。若使中病即已。不必盡劑。容可過乎哉。何爲中病。假令身熱如火者。熱火爲中。大渴不已者。渴緩爲中。紫艷焮紅者。紅舌爲中。何爲未中。如口熱如爐。空竅失血。唇焦舌黑。狂煩譫語。其勢未殺。病猶未中。雖多何畏焉。藉令泥古方拘日期論劑數。則誤矣。

### 論豬尾血

諸血居補。惟此血最活動。而搜剔凝結之瘀。所以產婦多有食之。取其能破敗惡露也。論痘非血不載。非血無漿。况補血之功不易。何反取其破敗爲哉。毒鬆透者。

血得載毒而出。痘雖稠密。色必紅活。自無疑滯之患。若毒火雄烈。萌動即熾。血遇之即凝結而瘀矣。血本載毒者也。瘀則連。血亦爲毒血矣。不第此瘀爲毒已也。一有瘀毒。并周身之血。悉爲此毒攝伏。而不得灌輸於痘。以故痘有空殼。以故有與肉色一般。此痘之最惡者也。如女人懷娠通身之血。朝毓于娠。上乳下經。皆絕響矣。不則天下有無血之孩乎。其次則乾紅晦滯紫艷乾焦。或蚤癩蚊迹。種種皆內瘀之符也。然此瘀非猶犬血塊癰瘕之類。無論小大皆係殺身之毒。但小則日期緩。大則日期迫耳。緩則桃仁地丁紅花赤芍。亦能取効。迫則必需于此。猪血固能破瘀。而出自尾尖。尤爲活動緊關之處。而且取破血下流之義。得冰片爲佐開洩腠裏。通達內外。內結散。而外滯疏。此瘀一活。則一身之血皆得灌輸于痘。而立轉紅活矣。是以血活血。猶之以血補血。草木之味。烏能及焉。如用之輕必蓋許。重則四五盞或十數盞。方可取効。如方書所云一二點。此亦習聞而未能經驗者也。

論濁陰

何爲濁陰。無價散。雞矢醴。人中黃。人中白。童便。秋石。金蓋散。金汁。糞青。女人經布。男婦襦褳之類。均爲濁陰。辛甘爲陽。苦寒爲陰。輕清爲陽。重濁爲陰。此等穢惡。尤爲陰中之陰。濁中之濁。痘犯烈火。苦寒所不能勝。非此莫制。予孟兒。喉間忽然鯁痛。身即躁熱如焚。俄頃而音聲即啞咽。傍有兩蛾相對。如圓眼。大先以蘆刀刺之。令出惡血。色甚紫滯。予見勢重。即以大黃石膏黃連荊芥牛旁生地。甘桔木通連服二頭汁。不應。滿腹如火炙。不醒人事。前方用大黃五錢。生地石膏各一兩。日服三頭汁。如此服過三日。勢不稍殺。而且日甚。燈與幃帳相去丈餘。畏明若刺。口中謔語音啞。不知所訟。如此三日。所服之劑。水之交石。予思陽光烈火。非苦寒所能駕馭也。遂想濁陰以勝之。濁陰之中。無如雞矢。雞矢之中。雖糖而若乾醬者爲最。此又濁中之濁。陰中之陰。能治疔瘡立効。其濁陰無匹。可見取有尖頭者。佳。以六一散調爲丸。如菉豆大。另以六一散。一二匙。研入冰片少許。爲衣。以安其臭。且得以開洩竅。脉用燈心湯送服。一二刻後。從來燥熱如火。忽爾身體振戰。汗洩如漿。

發出一身惡疹。與牛皮癬一般。自來疹子無痂。及回後。徧身脫下痂皮。如厚油紙。而諸症悉愈。若非此品。斬將摹旗以奪之。諸藥終歸無用。一奪其勢。諸藥亦與有力焉。濁陰能制陽光。先言堪世則矣。人畏大黃爲將軍。石膏爲白虎。此症用及各有勛餘。如水交石。賴此開先而始奏効。所以藥貴對病。寒熱攻補是在用之者。何如耳。

瑣言備用良方

清肌透毒湯 治痘瘡已發未發。爲風熱所感。腠裏阻塞者。此湯主之。

荊芥穗 三分 乾葛 八分 前胡 一錢 桔梗 四分 甘草 二分 山查 二錢 蟬蛻 三錢  
生姜一片

直達透肌散 治痘將出未出。無甚外感。亦不至內傷。但身熱嘔吐。眸子眊焉者。此湯主之。

蟬蛻 山查 陳皮 前胡 葛根加薑一片 嫩葶頭一個

溫肌透毒散 治痘已發未發。爲寒邪固閉者。此湯主之。

防風 五分 麻黃 色蜜炒三分 川芎 八分 蟬蛻 三分 山查 二錢 桔梗 三分 甘草 二分

陳皮 六分 加薑五分

寬中透毒飲 治痘已發未發而飲食內傷者。此湯主之。

山查 三錢 青皮 六分 葛根 四分 陳皮 五分 前胡 八分 萊菔子 七分 桔梗 三分

蟬蛻 二分 麥冬 一錢 加薑三分

疏肝透毒散 治痘前驚。跌而發搐者。此湯主之。

僵蚕妙四 蟬蛻 三分 薄荷 二分 鈎藤 六分 青皮 七分 木通 三分 前胡 六分

山查 二錢 羌活 四分 荆芥 三分 加燈草 一分 薑 二分

清熱解毒湯 治痘放點。乾紅色滯壯熱如熾者。此湯主之。

荆芥穗 紅花 蟬蛻 木通各三 牛旁 一錢 丹皮 青皮各七

生地 二錢 山查 二錢 滑石 三錢 前胡 七分 地丁 四分 黃連 六分 加燈心 一分

調中湯 治未痘時先因吐瀉裏虛。隨感時行見痘目眶低陷神情困倦者。此湯主之。

人參 五分 陳皮 四分 蟬蛻 三分 川芎 八分 甘草 一分 扁豆 一錢 枸杞 二錢

穀藥 六分 加薑二分 大棗二枚 此權宜之劑也 精神稍醒即當加減

涼血攻毒飲 治痘毒火內伏煩渴躁亂。身體反涼痘色紫滯。礬紅散夜無眠者。此湯主之。

大黃 二錢 荊芥穗 五分 木通 四分 牛旁 丹皮 紫草 各一錢 赤芍 八分

葛根 七分 蟬蛻 四分 青皮 七分 生地 四錢 紅花 四分 加燈心 一分

髮肌通聖散 治痘腠裏阻塞。血凝氣滯。窠粒隱隱於肌肉之間。痘色乾紅晦滯。神情悶悶者。此湯主之。

羌活 荆芥 紫草 紅花 木通 赤芍 地丁 青皮 牛旁 山查 蜂房 當歸 防風 加蘆笋 胡荽

清涼攻毒飲

即黃散

治痘瘡大熱如火。紫艷深紅。煩渴顛狂者。此湯主之。

石膏

三錢至一兩

黃連

三錢至一錢

大黃

三錢至六錢

木通

紅花

荊芥穗

各四分

牛旁

一錢五分

犀角

磨汁三分

丹皮

一錢

青皮

七分

生地

一兩至五錢

地丁

一錢

加燈草一分

清暑透毒湯

治痘直酷暑神情煩悶。不時哈舌大渴思冷。灑然汗出。或身涼如

暈。痘瘡淹滯。此因暑氣閉塞故也。此湯主之。

陳皮

厚樸

各四分

葛根

三分

澤瀉

香薷

各五分

黃連

七分

滑石

三錢

青皮

七分

蟬蛻

三分

甘草

四分

扁豆

一錢

加燈心一分

疏邪實表湯

治症屬氣虛。皮薄色淡。身涼體靜。兼有表邪外束者。不拘漿前漿後。此湯主之。

黃芪

防風

荊芥

甘草

川芎

白芷

桔梗

加薑

一片

胡荽

一錢

必勝湯

治痘血瘀氣滯。窠粒實而不鬆。痘色滯而不活。或乾紅。或紫黯。或癢點

諸般痛楚。或貫珠。或攢簇。毒火兩伏。此湯主之。

教編

頤言

備用良方

一百十九

北京共和印刷局代印

大黃

小劑七分至三錢大劑三錢至一兩 青皮 五分至 桃仁 二錢至

紅花

五分至 赤芍 錢半 木通 八分至 荆芥穗 三分至 葛根 錢半至 生地 兩半至

牛旁

七分至 白項地龍 廿一條至 紫花地丁 小劑三錢中劑七錢大劑一兩五錢 蟬蛻 二分至

山查

大劑一兩五錢中劑一兩小劑五錢 蘆根 三兩 三味煎湯代水煎

既濟湯 治痘火毒太盛時值隆冬閉塞此湯主之。

荆芥穗

麻黃 去根蜜炒將黑 葛根 石膏 黃連 大黃 蟬蛻

牛旁加薑二片芫荽一錢陰陽水煎

清金攻毒飲 治痘毒壅于肺聲音不清喉間痛楚煩渴壯熱痘不起者此湯主

之

桔梗 甘草 牛旁 大黃 芫荽 前胡 枳壳 山查 蟬蛻 僵蠶

山豆根 荆芥穗 加燈草一分

涼膈攻毒飲 治痘熱毒于上焦胸膈煩悶壯熱發渴揭衣棄被痘色紫艷深紅

者。此湯主之。

大黃 黃連 石膏 荊芥 地丁 位參 黑山樞 赤芍 生地 桔梗  
木通 甘草 牛旁 薄荷 枳壳 加燈草一分竹葉三十片  
消癰快毒湯 治痘有夾疹夾癍。膚紅如醉者。此湯主之。

連翹 位參 生地 牛旁 木通 蟬蛻 丹皮 荊芥穗 黃連 甘草  
地丁 赤芍 極熱者加大黃 加燈心二十莖

窮源透毒散 治痘瘡毒火深潛。累日不起。色有乾紅。有紫滯。或煩燥或昏沉。身體不熱者。此湯主之。

大黃 青皮 穿甲 紫草 歸尾 地丁 木通 牛膝 羌活 荊芥  
紅花 加蘆笋十枝

錢氏百祥丸 治痘瘡黑陷。便閉裏實者。

紅芽大戟不拘多少煮極軟去骨。日中晒乾。復于原汁中煮盡汁焙乾研末水

跌爲丸粟米大每服十九至二十丸研赤芝麻湯下。

神應奪命丹 治痘瘡毒盛透發不起者。

劈砂一兩囊于白紗內外配升麻麻黃各五錢。紫草連翹各一兩四味同八紗囊中於砂鍋內用新汲水將桑柴火煮一晝夜取出辰砂研末仍將煮砂藥汁將綿濾清晒乾爲末聽用 麻黃不去根節蜜酒拌炒焦色地上出火氣八分蟬蛻洗淨去足翅一錢紫草酒洗三錢紅花子一錢五分真蟾酥五分穿山甲酒拌炒一錢五分共研細末用猪尾血杵爲丸桐子大週歲者一丸二歲者二丸其餘三丸爲則酒漿化服厚蓋取汗澤天醫生氣日合

散結湯 治痘血滯氣滯色乾紅而囊不鬆者。

青皮 羌活 赤芍 紫草 地丁 山查 荆芥 升麻 川芎 木通

牛旁 丹皮 加蘆笋十株鮮葶頭三個

養榮附氣湯 治痘窠囊蒼老歸附不厚而淡白者。

當歸 熟地 川芎 紅花 生地 甘草 加薑二片

寶氣飲 治痘血至而氣不至。歸附則厚。乳殼不長或平或陷而不充肥者。

丹皮 荆芥 青皮 山查 穿甲 牛旁 木通 赤芍 僵蠶 蟬蛻

加蘆笋十珠臨服和大桑蟲

瀋榮散 治痘氣至而血不至。乳郭飽滿而根窠晦者。

紅花 歸尾 紫草 丹皮 荆芥穗 地丁 牛旁 木通 赤芍

加地龍三條臨服和猪尾膏半盞

滌邪救苦湯 治痘毒火下注大腸。邪毒逼迫。欲解不解。毒垢穢臭無倫者。

黃連 大黃 牛旁 紅花 滑石 木通 蟬蛻 荆芥 澤瀉 青皮

赤芍 山查 加燈心二十莖陰陽水煎

萬兩黃金散。一名無價散 一名四聖散治痘瘡氣爲毒滯而陷。血爲火灼而黑者。

人糞 猫糞 猪糞 犬糞

臘月收取四糞乾結者用礬糠火煨黑存性爲末各等分研細以密水調服每服三分至七分

豬尾膏 治痘瘡細如麻芥實而不鬆黯而不活諸般惡形惡色惡症累日不起者。

取小雄豬尾尖血少則蛤殼多則一盞以絹絞淨每盞和梅花冰片二厘即調于煎劑內服以痘轉爲度如小豬不得即大者亦可

養榮透毒湯 治痘瘡血虛淡白并囊窠不起者。

桔梗 甘草 當歸 川芎 熟地 紫草 山查 蟬蛻 木通 穿甲

加蘆筍十珠

蟬針法 治報痘有紫硬有黑陷有歪斜并諸痘內色紫黑根腫硬獨大于衆痘者用之。

取水蛙大者放于患處將蛤殼合于蟬上用軟絹束之吮出毒血次以藥胭脂

膏封貼如無此物以銀針挑破令奶母含金銀汁以吮之。

散火鬆毒飲 治毒爲火鬱透不能透發。色紫滯而囊不鬆者。

荆芥穗 青皮 木通 連翹 防風 赤芍 露蜂房紫草 青皮

牛旁 山查 加燈心半分

平順清解飲 痘至起齊。不犯氣虛無甚血熱稍用清解者。以此湯主之。

桔梗 甘草 山查 僵蠶 木通 連翹 紅花 牛旁 白芷 生地

加炒占米百數粒

托裏無憂散 痘至六七日身不熱。痘不燥。亦不甚紅。囊不充肥者。以此湯主之。

黃芪 人參 甘草 僵蠶 白芷 桔梗 當歸 川芎 加炒占米

大棗

養金化毒散 治痘內有伏毒。啼號不已。經日不起。并發癰發疔者。以此散用蚤

湯調服。痘若搔傷或攢簇堆聚。或報點臬惡。乾焦紫黑。板硬等象。悉以此散

調入油胭脂內。用線紙做如膏藥樣以貼之。

乳香

沒藥

各一錢出研細配藥

川貝母

去心炒

雄黃

黃連

天花粉

各一錢生用

大黃

半炒半晒各二錢

甘草

七分生

赤芍

二錢炒

冰片

一分半

牛黃

二分

珠子

四分以無聲為度

保元八珍湯

治痘一切氣血兩虛。囊薄色淡身涼體靜。頂平頂陷。漿清皺軟者。

此湯主之。

人參

黃芪

甘草

當歸

淮熟地

川芎

枸杞子

山查

外加薑二片炒糯米百數粒

回陽返此湯

治痘氣血虛劇。皮薄漿清。錫皮灰白。虛惕寒戰者。此湯主之。

人參

黃芪

鹿茸

酒炙剉片用酒煎膏配藥

當歸

川芎

肉桂

甘草

山查

熟附

外加大棗二枚

實脾固本湯

治痘脾虛滑瀉此湯主之。

人參

白朮

茯苓

十香

廣皮

訶子

炙甘草

肉菓

完穀不化者加麵裹煨用

外加薑棗

納穀散 治痘神不煩熱不熾。痘不燥。而飲食不思者。此湯主之。

人參 白朮 茯苓 廣皮 山藥 炙甘草 外加陳倉米大棗煨薑

瀉黃納穀散 治痘邪熱犯胃。唇口燥烈。口中膩渴。甚至舌起芒刺。嘴黑如煤。兼

後身猶壯熱種種燥熱。而不思食者。此湯主之。

石膏 黃連 生地 丹皮 木通 甘草 炙用生甘草 牛旁

山查 查荆穗 重者加大黃 外加燈心

補液湯。治痘津液不足。而發渴者。以此湯主之。

人參 麥冬 五味 訶子 桔梗 甘草

清金解渴湯 治痘金被火燥。而咽乾口渴者。以此湯主之。

石膏 生地 黃連 桔梗 荆芥 甘草 牛旁 連翹 葛根 天花粉

加燈心 莖竹葉 片

安神散 治痘後邪毒淨盡。心虛不寐者。

人參 棗仁 茯神 甘草 當歸 麥冬 白芍 栢子仁

加燈心 蓮肉

清宵忘晝飲 治痘邪熱擾亂。心神不寧。夜不成寐。不拘首尾。以此湯主之。

黃連 丹皮 生地 木通 甘草 荊芥穗 黑山梔 加燈心竹葉

硃砂六一散 治痘出炎天。煩渴不寧。或熾熱紫艷。心胸煩悶者。

嫩滑石 水飛淨 六兩 生甘草 為末 桑皮紙 篩過 一兩 辰砂 澄過 五錢 涼燈心湯調服。或雪水梅水俱

可。

金蓋散 治痘腐爛不收。和皮脫去。以此散撒在褥席上。令兒眠上。若以絹袋盛

之。通身撲之亦可。取黃牛糞尖。晒燥。碧糠火煨黑。存性研細用。

滑肌散 治痘漿足半靨。紅暈未收。壯熱未和。以此散包于絹內撲之。

滑石 六兩 甘草 二兩 菘豆粉 三兩 為極細末用

水楊湯 治痘板實不鬆。或礬紅或紫黯。八九日不行漿。甚至有作痒者。以此湯沿之。

取水楊柳達枝帶葉剉斷四兩長流水十數拘煎十數滾去查將三分之一傾于脚桶內以手探之不可大熱亦不令太溫先以應服之藥服之而後浴其湯漸漸添下浴後以細絹收乾逾時以燈照之隱隱鬆浮漿脚動矣冬月宜於帷帳中更備脚爐旺火于兩旁不使寒侵爲妙○此柳生於水灘四月間纔有其柳不生旁枝長者三尺許粗者如細篠其葉較垂楊葉尙厚帶有白意至五月葉下開細細紫花者是此名水楊柳非忍冬藤亦非等閒柳樹也須預備風乾得用其性最能活血脉利筋骨大人有患拘攣手不能握足不能步者用酒煎服不能酒者水煎其效有靈氣

保元回漿散 痘有身涼體靜漿不滿足膿囊漸闊至收靨自是不齊此湯主之。

人參 當歸 甘草 黃芪 白芍 米仁 茯苓 加薑棗

活絡透毒飲 治痘收靨時熱毒留連愁容可掬將來餘毒在所不免却不易來

者以此湯預活之。

羌活 紅花 荊芥 牛旁 木通 當歸 牛膝 蟬蛻 青皮 連翹

外加地龍

忍冬解毒湯 治痘痲初起大局無虞疤少榮潤熱欠青和防餘毒竊發者此湯

主之。

金銀花 土貝母 甘菊 荊芥穗 牛旁 紅花 甘草 木通 連翹

地丁 外加胡桃

撥雲散 治痘後熱毒在肝兩目通紅甚至起障生醫者以此湯。

生地 黃連 木通 荊芥穗 穀精草 甘草 赤芍

羚羊角 大黃一分至二分 木賊 甘菊 金銀花 羌活 望月沙

加燈心白芙蓉葉

消疳解毒散 治痘後牙疳

薄荷 五分 兒茶 一錢 冰片 一分 人中白 三錢 天花粉 一錢 甘草 五分 青黛 一錢

黃連 五分 牛黃 一分 珠子 二分 兩前茶 五分 白礬 一錢

研極細以無聲爲度先以濃茶拭淨方吹

加味內托十宣散 治痘後餘毒白而不紅平而不起按之不熱愁容可掬此本

氣血兩虛漿不滿足而致乎毒也以此湯主之。

人參 黃芪 當歸 牛膝 金銀花 甘草 白芷 羌活

紅花 木通節 川芎 皂角刺 加胡桃二枚

回漿合宜散 痘瘡血收漿足別無燥熱之症以此湯飲之。

白芍 防風 米仁 甘草 茯苓 山查 扁豆 加大棗

溫粉撲肌散 治汗出不止者。

黃連 貝母 牡蠣粉 粳米粉 各五分 一升共磨細末包于絹內撲之

百花膏 治痘收靨燥熱痂皮濺起作痛者。

蜂蜜不拘多寡大約四兩配大黃細末一兩和滾湯攪勻以鵝翎拭之亦易落。

快肌膏 治痘恒炎天膿漿燥實徧體如霞煩熱如火身無安放者

生大黃晒燥為末一兩敗草散五錢調入豬膽汁宜薄不宜厚以鵝翎輕輕間拭之不可通身塗滿

牛黃八寶丹 不拘已痘嬰兒諸般惡瘡惡毒此丹有靈氣

牛黃 二分 珍珠 四分 劈砂 五錢 飛川黃連 三錢 羚羊角 各三錢

雄黃 五錢 青黛 三錢 川貝母 錢 淨冰片 二分 琥珀 二錢 羌活 三錢

佐參 五錢 瓦上 焙或晒 燥乳香 沒藥 各三錢 出汗盡

右十五味如法製為細末聽用外將揀淨金銀花 二兩 甘菊 一兩 甘草 五錢

胡桃肉 二兩 碎紫花地丁 雜根帶藥理淨勿斷 二兩 長流水五碗砂鍋內慢火煎至

及半取汁將渣絞乾以綿濾清桑柴火熬膏入煉熟老蜜盡許再熬至粘  
筋將前未和丸每丸二分一歲左右者日服一九三歲左右者日服二丸  
密調服

奏凱和解飲 痘瘡收痂厚而滋潤寢食俱可安以弗藥而調理和解者以此湯

金銀花 土貝母 牛蒡 山藥 扁豆 山查 荆芥 當歸 人參

甘草 加核桃肉蓮肉

參歸化毒湯 治痘餘毒留連 血虛弱何以取驗淡白不振身涼愁困者是也

人參 當歸 黃芪 甘草 金銀花 牛膝 紅花 貝母 山查

皂角刺 白芷 加胡桃肉

和脾宣化飲 治痘後飲食過傷氣壅飽悶叫喊者不已者。

廣皮 萊服子 半生 炒前胡 卷舒 炒 大服皮 去黑髮黑 洗麥芽

山查 一兩至二兩 煎湯代水

雙仙化毒膏

麻油二兩

錦紋大黃一兩

剉皮麻黃

去根  
錢剉斷

將二味入於油內煎如煤

之黑取油去查於水盆內頓出火氣 將煮熟雞蛋十個去白取黃於小銅杓

內細細搗碎熬至黃沫泛溢繼而焦黃至極焦黑青烟將起油將來矣漸有漸

逼以盡爲度亦於水盆內出火氣與麻油合併濾清聽用

復用大黃一兩一半晒燥一半與風化石灰同炒炒至石灰如桃花色去灰取

黃地上出火氣共爲細末 松香五錢爲末入於葱管內用苧絲紮葱口於銅

杓內煮葱黃熟去葱取松香爲末 用黃柏去粗皮淨五錢一半晒燥一半將

豬膽汁炙透其爲細末 青黛水飛五錢合前藥總調於藥油內其搽法如擦

合掌丸以漸而施

